



Bericht Von der waren gegenwertigkeit des leibs vnd bluts vnsers Herrn Jesu Christi in seinem H. Abendmal,

<https://hdl.handle.net/1874/433611>

4
Bericht

**Von der waren gegenwertigkeit des leibs vnd bluts vnfers
Herrn Jesu Christi in seinem H.
Abendmal / gestelle**

Durch

M. NICOLAYM SELNECKER.

**Samt notwendiger vnd Christli-
cher erklärung IOSVAE LAGI
POMERANI.**

**Item / Bedencken Herrn Philippi
Melanchthonis vber der spaltung
vom H. Abendmal.**

Matth. 13.

**Wee der Welt der ergernis halben / Denn
es muß ergernis komen / Aber doch wee
dem Menschen / durch welchen
ergernis komet.**

M. D. LXV.

Correctur

Solto 5. b. l. 1. dz es. f. 11. l. 16. brauch des brots. f. 25. l. 10. Chaffe
warer. f. 36. l. 25. der wort. f. 42. b. l. 10. sangutis. f. 57. l. 16.
Dazu ist. f. 61. b. l. 13. lieber vnserm. l. 16. jrer lere. f. 66. b. l. 18.
war er. f. 71. l. 6. gegenwertig. f. 72. b. l. 17. mit der. f. 78. b. l. 10.
vnwirdig. f. 84. l. 7. vngegründten. f. 86. b. l. 13. vnd sol viel.

Vorrede an den

Christlichen Leser.



Sist offenbar vnd am tag/
wz mercklichen schadens vnd man-
cherley vnrahts auß der langweri-
gen vnd jämerlichen spaltung ober
der Lere vom H. Abendmal des
Herrn / in Teutschen landen erwachsen vnd ent-
standen / dz nemlich dadurch den feinden der Göt-
lichen warheit / die Kirchen / in welchen Got recht
erkent vnd angeruffen wird / zum höchsten zuuer-
leunden anlaß vnd vrsach gegeben / viel schwache
Gewissen irz vnd zweiuellhafftig gemacht / vieler
Christen herzkē gegen einander schwerlich verbit-
tert vnd betrübt / die Christliche einigkeit zutren-
net / vnnnd rechte anruffung Gottes verhindert
wird. Sind derwegen alle Christen schuldig mit
stetem vnd herzlichem seufftzen Got anzuruffen /
daß er ein gnediges einsehen haben / solche gefär-
liche schäden heilen / oder ja lindern / vnnnd seine
Kirche von allen irthumen erlösen vnnnd entledi-
gen wölle.

Vorrede.

Darneben auch / demnach es dem Sohn Gottes nach seinem wunderbaren Racht vñnd gerechtem Vrtail also gefellet / seine Kirche mit diesem streite zuüben vñnd zuprüfen / gebüret es einem jeden in sonderheit / nach seinem beruff vñnd höchsten vermögen sich zubefleissen / daß die warheit vertediget / vñnd den einreißenden irthumen gewerret werde / Welche ursach denn auch mich zufförderst gereizet vñnd bewegt / diese erklärung der in Gottes wort gegründten Lere vom H. Abendmal / vñnd Gegenteils irthumen in öffentlichen Truck zuuerfertigen. Neben ansehung aber solcher meines Berufs gebür / hat mich auch hiezu verursacht / daß ich von vielen Christlichen Leuten beide Dienern des Worts vñnd andern in meinem lieben Vaterland / schriftlich vñnd mündlich ersucht vñnd ermanet bin / inen die Lere von Sacramentē / so in dieser ort Kirchen bekent vñnd gesüret wird / vñnd derselbigen Grund aus Göttlichem Wort in schriften verfasst zuzuschicken / damit sie vrtailen möchten / ob die beschwerlichen auslagen / mit welchen gemeldte Kirchen verunglimpft / sich in der warheit also befünden / als daß sie solten in Glaubens sachen allein ihrer Vernunft / one vñnd

Vorrede.

vnd wider Gottes Wort / nachfolgen / Die All-
 mechtigkeit Gottes vnd die ware gegenwert des
 Leibs Christi inn seinem Abendmal verleugnen/
 vnd aus dem Sacrament des Leibs Christi nur
 ein blosses vnd leeres Zeichen machen / vnd der-
 gleichen / Welches ich inen / nach erforderung nit
 allein meines gegen inen freundlichen Gemüts/
 sonder auch meines Amts vnd Gewissens / vnd
 der Lere S. Petri / der da befehlt daß man alle
 zeit bereit sein sol jederman seines Glaubens re-
 chenschaft zugeben der es fordert / keins wegs
 hab abschlagen können.

Damit aber inn dieser Erklärung vnd Be-
 kenntnis / nicht allein die rechte Lere von des Her-
 ren Abendmal / vnd andern Sacramenten /
 obgemelten Personen / auch andern die es zule-
 sen begeren / klärlich dargethan würde / Sonder
 auch desto leichter vrsach zusehen were / warumb
 wir der jenigen meinungen / die vns am meisten
 beschuldigen / nicht beifallen können / Vnd desto
 süglicher Grund gegen Grund gehalten / vnd be-
 dacht möchte werdē / welches teils Lere dem wort
 Gottes gemess oder ungemess sey / Hab ich vnsers
 Regentils meinung / mit iren beweisungen / die

Vorrede.

sie wollen für die fürnemste gehalten haben/ vnd diese Erklärung neben einander gesetzt.

Warumb aber ich dis N. Seln. büchlin zu solcher gegeneinanderhaltung hab wollen brauchen/ ist dis die Vrsach/ daß es kurz/ vnd die fürnemeste Gründe des widerparts inhelt/ Vñ auch darumb dz sich befunden/ dz solches schreiben bey etlichen Leuten zu nachteil vnd ver hinderung der warheit gelanget / Wie denn auch der Dolmetscher rhümet/ dz etliche ein besonders gefallen daran haben / vñnd auch hohe Personen dasselbige zuuertuschen von im begeret.

Weil denn nu dis ein Hochwichtige sache ist/ welche die Ehre Gottes vnd das Gewissen angehet/ So wollen alle Gotsfürchtige hertze/ sie seien hohes oder nidern stands / so inen dis N. Seln. büchlin haben gefallen lassen/ bitlich vnd trewlich ermanet sein/ sie wollen diese antwort vnd gegenbericht omb der ehre Christi vñ irer selbst heil vnd seligkeit willen/ mit vnparteyischẽ gemüt lesen vñ erwegen/ vñ die warheit nit vnuerhöret verdammē. Den̄ solchs auch in weltlichẽ als viel geringern sachen se billig/ dz man beide teil anhöre/ well eins Mañs rede nur ein halbe rede ist. Da solchs gesche-

Vorrede.

geschehe wird/bin ich tröstlicher hoffnung zu Got/
es werde meniglich vernemen/dz vnser Segenteil
nit allein bey dem buchstäbischẽ verstand der wort
Christi/welche er in einsetzung seines Abendmals
gebraucht/ nit bleibe/wie sie den gemeinen Mann/
ire sache zuschmückẽ / biß anher beredt habẽ/ son-
der auch ire auslegung vnd deutung new vnd bey
menschen gedencen erfundẽ/vñ mit keinem buch-
stabe .h. schrift möge erhaltẽ werdẽ/Dagegẽ aber
wir bey der Auslegung des Herren Christi selbst/
des .h. Apostels Pauli vñ aller alten rechtglaubig-
ge Christlichẽ Lerer/so in die 800 jar nach der ge-
burt Christi gelebt/ ehe der grewel Pãpfflicher ab-
götteren ingerissen ist/verharren / Vñ werde sich
also befinden / dz mit alles Gold ist wã da gleisset/
sonder viel holz/ hew vñ stoppel vnter der Gold-
sarb/võ diesen barweistern auf dẽ einigen grund
des Christlichẽ glaubẽs/ welcher Jesus Christus
ist/gebawet/welchs die zeit vermittels Götlicher
hülff ein mal wird offenbaren / Solchs bitten wir
den Sohn Gottes vnsern Herrn Jesum Christu/
dz er allen so in vnd seine warheit lieben/ zuerken-
nen gebe/vñ endlich seine Kirche von aller Abgöt-
teren vnd irthumen gnediglich erlöse / Amen.

Faint, illegible text, possibly bleed-through from the reverse side of the page. The text is arranged in several lines and is significantly obscured by a large, irregular water stain in the upper center of the page.

Bericht

Von warer gegenwer-

tigkeit des leibs vnd bluts vnser

Herrn Jesu Christi in seinem

H. Abendmal.

Durch M. Nicol. Selnecker:

So viel schweren vnd hefftigen di-
 sputationen vnnnd spaltungen vom H. Abend-
 mal vnser Herrn Christi / finden sich fürnem-
 lich drey puncten / darüber man streittig ist /
 Vnter welche der Erst vom rechtem verstäd-
 der wort Christi in der einsetzung des Nacht-
 mals / Der Ander von der gegenwertigkeit des leibs vnd bluts
 Christi / Der dritte von der Manducation / das ist / wie Chri-
 sti leib vnd blut im H. Abendmal geessen vñ getruncken werde.

Erklärung.

Es hat der weise vnd löbliche Fürst Herzog Friderich
 Churfürst zu Sachsen / hochlöblicher gedächtnis / dis
 wort offte gebrauchet / Die sachen weren wol zuvertra-
 gen / wenn die leute nur zuvertragen weren. Also mag man
 auch wol sagen vonn der disputation vom H. Abendmal /
 das sie an ihr selbs nicht schwer / vnd wol zuvertragen / So
 man allein auff die gemeine lere vnnnd auff die weise zu reden
 von diesem vnd allen andern Sacramenten achtung gibe /
 vñnd nicht auß eigenem gutduncken vñnd lust zu zanken /
 frembde / mit den Articulen des glaubens / vñnd der art aller
 Sacrament streittige meinungen einfürt. Die drey von
 A M. Sels

Von den Worten der einsetzung

M. Selnecker gemeldte puncten aber/hangen also an einander/das wer von einem recht vnterrichtet ist/sich bald in die andern schicken kan/ Da könnē alle drey / auß den Articulis vnser̄s allgemeinen Christlichen glaubens/vnd der lere vnd einsetzung dieses vnd aller andern Sacramenten/leichtlich erkläret vnd verstanden werden.

Bericht.

Das Erste theil/ Von den Worten der einsetzung.

Die wort mit welchen das 3 Abendmal eingesetzt / sind diese/ Nemet hin/ Eset/ trincket/ Das ist mein leib/ Das ist mein blut/ &c.

Erklärung.

In den Worten der einsetzung / sollen nit mit stillschweigen vbergangen werdē diese wort des Herrn/ Der für euch gegeben/vnd/ Das für euch vergossen wird zur vergebung der sünden. Denn darauff offenbar/daß das brot vnd wein nicht eigentlich vnnnd nach laut des buchstabens können der leib vnnnd das blut Christi sein / weil sie nicht am Creutz für vns gegebē vnd vergossen sind. Item diese wort des Herrn/ Dis thut zu meinem gedächtnis/ Welcher inn diesem büch M. Selneckers also wird vergessen / das sie kaum ein mal werden angerürt / gleich als sie zum Nachmal nicht gehöreten/ So doch dieselben nicht one grosse vrsach von Christo geredet / vnd von Paulo fleissig widerholet vnnnd erkläret sind. Denn sie erstlich den rechten brauch dieses Sacramēts leren/ Nemlich/ das wir dis thun/ das ist/ Wie S. Paulus sagt/ von diesem brot essen / vnnnd von diesem kelch trincken sollen/

sollen zur gedächtnis Christi vnd verkündigung seines todtes/das ist/das wir vns durch diese eusserliche niessung/ der innerlichen niessung vnnnd gemeinschafft Christi erinnern/ vnnnd vnser glaub als durch ein gewisses/ sichtbares pfand vnd zeugnis gestercket werde/Auff das wir also Christi vnd aller seiner wolthaten je lenger je mehr theilhaftig werden. Zum andern werden auch dadurch die vorgehenden wort erklaret/ das nemlich/ das brot vnd der kelch also der leib vnd das blut Christi sind/ wie ein gedächtnis vnnnd warzeichen dasselbe ist/ des man dadurch erinnert vnd versichert wird/ Diem Weil Christus beides sagt/das brot sey sein leib/vnd wir sollen es zu seinem gedächtnis essen.

Bericht.

Diese wort müssen das fundament vnd richtschnur sein/ darauff die ganze lere vnd alle fragen von des Herrn Nachtmal sollen gegründet vnd erditeret werden/ vnnnd wer darauff bleibet/ hat fürwar schon anfänglich inn diesem verwirreten handel halb gewonnen.

Erklärung.

Das die wort der einsetzung/ die ganze lere vnnnd diesem Sacrament begreiffen/ vnnnd das man sich darauff müsse gründen/ Ist recht geredt/ Aber doch also/das sie nit halb/ sonder ganz genommen/ vnnnd in irem rechten verstand werden gelassen/den ihnen die ganze Schrifft/ vnnnd die erklärung Christi vnnnd seiner Apostel selbst gibt. Denn wer also darauff bleibet/ der hat freilich nicht nur halb/ sonder ganz gewonnen/ vnd ist in dieser handel nicht verwirret/wie denjenigen die sich selbst in menschlichen gedichten verwirren/ sonder klar vnd richtig.

Von den worten der einsetzung

Bericht.

Dann in gemelten worten werden bald im anfang / zwe-
ne grewliche irthume außgeschlossen / Einer der Papisten/
welche die opinion vnd meinung / so in Griechischer sprach
Metuosis, vor zeitē Metapisis, Auff Lateinisch Transformatio, Trans-
elementatio, zu letzt auch Transsubstantiatio genent / vortreibigen/
Das ist / die da sagen / die substanz des brots werde verwand-
elt in die substanz des leibs Christi /c.

Erklärung.

Die Papistische Transsubstantiation oder verwandlung
des brots in den leib Christi wird billich als ein vnleiblicher
grewel verworffen. Inn dem aber M. Selnecker / alle Pares
oder alte Christliche Lerer / welche diese wort / Mutatio, conuersio,
Transelementatio, vom Nachtmal vnd andern Sacramenten
brauchen / wil zu Papisten machen / gibt er öffentlich an tag/
das er entweder fre schrifftten nie gelesen / oder inn denselben
nicht viel mehr verstehet / denn die vngelernten münch / die vns
ter dem Pappstum die Transsubstantiation erdichtet / vnd
gemeldte wort der alten Scribenten / mit den haren darauff
haben gezogen. Denn weil diß ein mal gewiß ist / das den Pa-
tribus von der Transsubstantiation nie getreumet hat / vnd
aber sie dennoch sagen / Das brot werde inn den leib Christi
verwandelt / so muß se darauff folgen / das sie solches vom
keiner wesentlichen / Sonder allein von der Sacramentli-
chen verenderung verstehen / durch welche nicht das brot zu
fleisch / sonder zu einem Sacrament des leibs Christi wird /
wie auch auß dem wasser im Lauff / durch die Göttliche ord-
nung / das blut Christi / Das ist / ein Sacrament wird / wel-
ches das blut Christi bedeutet / vnd bezeuget / das wir damit
von

von sünden gewaschen werden/ Vnd also erklären sich auch die Patres selbst an vielen orten/ wie anderstwo ist angezeigt.

Bericht.

Der ander / der Sacramentirer / welche keine gegenwertigkeit vnd empfangung des waren leibs vnd bluts Christi bekennen / sondern machen allein blosser figuren darauß / so in Griechischer sprach *Typus, Tropus, vnd Allegoria*, genennet / darvon nachmals weiter.

Erklärung.

So jemand sagt / als die widerteuffer vnd ires gleichen / das Nachmal sey allein ein blosser figur oder *Allegoria* vnd sey darinnen keine gegenwertigkeit vnd empfangung des waren leibs vnd bluts Christi / desselben meinung verwerffen vnd verdammen wir als falsch / vnd vnchristlich mit mund vnd mit herzen / So aber alle die / Sacramentirer sollt sein / die da leren / das brot im H. Abendmal sey nicht der ware wesentliche leib Christi selbst / sonder ein warzeichen / gedecknis vnd pfand desselben / vnd derhalben auch ein mittel vnd werckzeug des H. Geists / dadurch er vnsern glauben stercket / vnd vns des waren wesentlichen leibs Christi warhaftiglich theilhaftig macht / Vnd das derhalben die wort Christi / Das ist mein leib nit wie d buchstab lauter / sond nach gewöhnlicher art vñ diesem vñ allen andrn Sacramentē zuredt / sind zuuerstehen / So müssen abermal / alle Patres / welche ein heilig das brot / *signum, sacramentum, symbolum, figuram, typum corporis Christi*, das ist / ein zeichen / geheimnis / warzeichen / figur / anbildung des leibs Christi / nennen / als Sacramentirer verdamt werden / Ja auch Christus selbst / der dieses brot zu seinem gedächtnis essen heisset / vñ dennoch kein bloßes noch

Von den Worten der einsetzung/

leeres zeichen darauß mache/sonder ein krefftiges mittel vnd
werkzeug des H. Geistes/ damit vnd durch welches er vns
mit dem warē leib Christi speiset. Heißt aber zubedencken/das
neben den gemeldten zweien Irthumen in den Worten der ein
setzung auch der dritte Irthum außgeschlossen wird/ nemlich
das der leib Christi wesentlich in dem brot verborgen/ vnd
mit dem leiblichen munde geessen werde. Denn so wenig als
Christus hat gesprochen/ das brot werde wesentlich zu seinē
leibe/ Sder sey nur ein blosses leeres zeichen seines leibe/
Eben so wenig hat er auch se gesprochen/ In dem brot sey
sein leib/ Sonder hat gesagt/ Das/ nemlich das sichtbare
brot/welchs er nam/brach vnd den Jüngern gab/ sey sein
leib/Vnd erkläret sich nach gewönllicher weise vnd art
von Sacramenten zureden/also/man sol
lees nessen zu seinem ge
dächtnis.

Bericht.

Das j. Capitel/ Von der Transsubstan tiation.

DIE Papisten haben Transsubstantiation genēnet ein
verenderung vnd verwandlung der substanz vnd we
sen des brots inn den leib Christi/ vnd verwandlung
des weins in die substanz des bluts Christi/ gleich wie
anff der hochzeit zu Cana in Gallilea das wasser in wein ist
verwandlet worden/ Also meinen etliche/ werde das gesegne
te brot im Abendmal verendert in die substanz vnd wesen des
leibs Christi/ dermassen/ daß vonn der substanz brots vnd
weins

weins / one die eufferliche gestalt / nichts vberbleibene. Diese ir-
rige meinung ist gar nichts weret / es ist auch darvon kein freit
zwischen denen die zu dieser zeit von des Herren Nachmal dia-
sputiren. Dann beiden theilen ist vorkangst bewußt / das solche
verwandlung oder Transsubstantiation nimmer mehr stat
haben kan / Sintemales der 3. Paulus beide zuvor / vnd nach
dem er die wort des Nachmals erzelet / Das ist / nach dem
brod vnd wein geheiliget sind / doch brod vnd kelch nennet /
da er i. Corinth. 10 cap. spricht / Der gesegnete kelch / welchen
wir segnen / ist der nicht die gemeinschafft / oder aufsteilung
des bluts Christi: Das brod das wir brechen / ist das nicht die
gemeinschaft des leibs Christi? Sie hören wir / Das Paulus
nicht sagt / Der kelch oder der wein / wird also inn das blut
Christi verwandelt / das der wein nicht mehr wein sey /
oder das das brod inn die substanz des leibs Christi wer-
de verwandelt / Sonder er nennet den kelch vnd das
brod / die gemeinschafft des bluts vnd leibs Christi /
Das ist / der kelch ist das mittel / durch welches vnns
mitgetheil / ausgespendet / vnd zugeeinet wirdt das blut
Christi / vnd das brod / so empfangen wird / theilet vnns mit
den leib Christi.

Erklärung.

Das brod vnd wein im Abendmal / mittel seind /
dadurch vnns der leib vnd das blut Christi mitgetheil
vnd zugeeignet werden / Ist recht geredt / so es recht
verstanden wird / Nemlich / wie das wort oder predig
des Euangelij / ein mittel dieser mittheilung oder zu-
eignung ist / also das der heilig Geist den glauben / da-
durch wir Christi theilhaffig werden / durch das wort
anzündet / vnd durch den brauch der Sacrament erhelt
vnd stercket / vnd also nach maß vnd zuremen des glaubens
jimmer

Von den worten der einsetzung/

Immer je mehr vnd kreffziger in vns wonet / vnnnd vns mit dem waren natürlichen leib Christi / als die glieder mit ihrem haupt / vnd die reben mit frem weinstock vereiniget vnd verbinder / das wir sein fleisch vñ beine / vñ also seines lebts / vñ seiner herzigkeit in ewigkeit theilhaftig werden. Da man es aber also verstehen will / das brot vnnnd wein solche mittel sind / darinnen der leib vnd das blut Christi verborgen / vnd den glaubigen vnnnd vnglaubigen in den leiblichen mund / durch des dieners hand gegeben werde / *Dij ist ein Abgöttisches vnd der Papisischen meinung de opere operato.* Das ist vnnnd dem werck das on glauben geschieht / nicht vngleiches gedicht. Denn das ganze predigamt / das ist / beide die predig des Göttlichen worts / vnd brauch der H. Sacrament / dar zu eingesetzt / das es ein werckzeug vnnnd mittel sey / mit einer leiblichen / sonder der geistlichen gemeinschaft Christi / welche one waren glauben in Christum / weder durch predig hören / noch Sacrament brauchen / jemanden kan widerfahren. Rom. 1.

Bericht.

Wie dann auch S. Ireneus (da er anzeuht den spruch S. Pauli / Gott rufft dem das nicht ist / das es sey) sprüche / Gleich wie das brot / so auß der erden ist / nach dem es vnnnd Gott genennet (nemlich da Christus sagt / das ist mein leib) nicht mehr ist gemein brot / sondern Eucharistia / Das ist ein Sacrament / welches bestehet in zweyen dingen / einem irdischen vnd einem himlischen / das irdische ist das brot / das himlische ist der leib Christi / Also auch vnser leibe / wenn sie das Abendmal empfaben / sind sie schon nicht mehr vergänglich / sonder ewig / vnd haben die lebendig hoffnung der aufferstehung / *ic.*

Erklärung.

Das Erste theil.

5

Erklärung.

Auff diesem spruch Irenei folget wol/das das brot nit
wesentlich inn den leib Christi verwandelt werde/ Es folget
aber nicht darauff/das der leib Christi im brot sey/Da bleibe
denoch die lere Irenei/das das Abendmal in zweien dinge ste-
he/dē jrdischen vnd himlische/also war vñ gewis/dz es auch
nit des Herrn Nachtmal were/da nit dz brot vns versicherte/
das der leib Christi für vns gebrochen/vnd vns zur speiß des
ewigen lebens gegeben werde/Vnd derwegen nit allein das
brot/sonder auch der leib Christi/aber doch jedes auff seine
weise vnd art/darinnen geessen würde/ Das jrdische brot vff
jrdische weise/das ist/mit dem leiblichen munde/ Das himli-
sche aber auff himlische weise/nit mit dem eusserlichen/son-
der mit dem innerlichen munde des hertzens/Das ist/mit ei-
nem waren lebendigen glauben/durch einwohnung vnd wir-
kung des H. Geistes. Derhalben stehet das Abendmal/wie
auch der Tauff/in zweierley dingen/jrdischen vñ himlische/
Vnd werden diese beyde in rechtem brauch der Sacrament/
mit einander empfangen/ Ob gleich die himlischen ding nit
wesentlich in den jrdischen seind/vnnd nicht leiblicher weise
mit den jrdischen/auch den Gottlosen werden gegeben. Sol-
ches beweiset auch klar die gleichniß so Ireneus braucht/
nemlich/das vnser leibe vnuergerlich sind/wie das brot
der leib Christi ist. Denn es sind vnd werden vnser leibe vn-
uergerlich von Ireneo genent/nicht das sie schon vnsterb-
lich weren/wie die erfahrung leret/vnd er selbst sich erkläret/
sonder das sie die lebendige hoffnung der aufferstehung ha-
ben/das ist/der selben gewis vnd versichert sind. Derhalben
wil er freilich auch/das das brot nicht von wegen einer leib-
lichen gegenwert des fleisches Christi im brot/sonder darinn

B

der

Von den Worten der einsetzung
der leib Christi sey vnd heisse / das er vns der gemeinschafft
desselben gewiß mache vnd versichere.

Bericht.

Das ij. Capitel /

Warumb die alten Christlichen Lerer in die-
sem handel bißweilen diese wörtlein gebraucht /

Symbolum, Signum, Figura.

Sfenbar ist es / das die Christliche alte Scribenten die
wörtlein *Symbolum, Signum, Typus*, das ist / zeichen vnd si-
gur gebraucht haben / ganz vñ gar nie auß der versach /
als ob sie damit wolte die gegewertigkeit vnd niessung
des waren leibs vnd bluts Christi verneinē / sonder allein dem
obgemelotem irthum von der verwandlung oder Transsub-
stantiation zuwidersprechen.

Erklärung.

Die *Patres* widersprechen mit dieser auflegung vber die
wort Christi / Das ist mein leib / nit allein der Transsubstan-
tiation / sonder auch der newerdichten Consubstantiation /
das ist / der leiblichen gegenwert Christi vnter dem brot. Wel-
ches erstlich auß diesem zusehen ist / das sie öffentlich vñ viel-
fältig leren / Christus hab daruñ dz brot seinen leib genēt / dz
es desselben ein Sacramēt / warzeichen / *Figura, signū, Symbolum,*
typus, etc. sey / Nirgend aber sagen sie / Es werde daruñ dz brot
der leib genent / das der leib in dem brot wesentlich verborge /
vñnd leiblich damit geessen werde / Welchs wunderbarliche
ding / so es also were / sie on zwetuel nimmermehr würde ver-
schwiege habe. Derhalbē reden sie hiemit nit allein wider die
Transsubstantiation / von welcher zur selbē zeit noch niemad
etwas wuste / sonder leren fürnemlich / wie die wort Christi zu
uerstehen

versehen seind / da er das brot seinen leib neät / Vñ warzu die
 ses brot genossen werde / Nemlich das es vns ein sichtbares
 wort / wie es Augustinus neät / verheißüg / zeugnis vñ pfad
 sol sein / des für vns gebrochenen / vnd vns zur speiß des ewi-
 gen lebens gegebenen leibs Christi. Zum andn ist solche mei-
 nung der Väter auch darauß offenbar / das sie vberal leren /
 diese weise zureden sey im Abendmal / wie in alle andern Sa-
 cramenten des alten vnd newen Testaments / zuuerstehe / da
 freilich vmb keiner leiblichen gegenwert der vn sichtbarẽ him-
 lischen ding / in od vnter den sichtbaren vnd irdischen / sond
 vñ der bedeutung vñ versicherung willen / die irdische ding
 mit dem namen der himlischen ding genennt werden. Vnd
 zum dritten / das sie in iren schriffren der leiblichen niessung
 vnd gegenwert des leibs Christi an allen oder an vielen ortẽ
 nicht allein niergend gedencen / sonder auch öffentlich ein-
 heilig vnd heffig zuwider sind.

Bericht.

Also redet offte Theodoretus / als im ersten Dialogo / am sie-
 benden blat / Gott thut den sichtbarlichen zeichen die ehr an /
 daß er sie nennet seinen leib vnd blut / nicht das er ire natur en-
 dere / sonder diereil er seine gnad leget zu irer natur. Vñ im an-
 dern Dialogo am 3. blatt. Die eusserliche ding im Sacrament
 sind zeichẽ / zeugnis oder symbola des Herren warhaffrigen leibs
 vñ bluts. Vnd bald hernach sage er / Das brot ist brot / der wein
 ist wein / vorder consecration / oder heiligung. Nach der Conse-
 cration aber / sage ich nicht schlechte / daß brot ist brot / sonder
 ich sage von dẽ brot / dz es sey d leib Christi / vnd von dẽ wein /
 das er sey dz blut Christi / vnd ich glaube / daß ich Christi leib
 vñ blut empfabe vñ esse. Vñ weiter spricht er / Nach d segnüg
 od consecratiõ bliere die eusserliche symbola des Sacraments ire
 eigne natur nicht / sonder bleiben in ihrer vorigen substantz /

Von den Worten der einsetzung

gestalt vnnnd figur / sein sichtbar vnnnd greiflich / wie vor der heiligung / Man verstehet aber / vnd glaubet / was sie worden sind / vnnnd verehret sie / als solche ding / dafür sie der glaub erkennet.

Erklärung.

Zuuerwundern ist sich / das dieser Scribent Theodorum anziehen darff / welcher durchaus so öffentlich der leiblichen gegenwert des leibs vnd bluts Christi / in oder bey den sichtbaren zeichen / zuwider ist / vnnnd nichts also hefftig treibet / denn das der leib Christi nicht mehr denn an einem ort sey zu einer zeit / vnd derhalben das brot darumb der leib Christi genent werde / das es ein Sacrament vnnnd warzeichen desselben ist / Wie auch seine allhie angezogene wort bezeugen / das nemlich Christus darumb also geredt hab / das er seine genad zu der natur des zeichens gesetzt / das ist / das er die verheissung der genaden daran gehengt / welche freilich von keiner leiblichen / sonder allein von der geistlichen nieszung vnd gemeinschaft Christi vnnnd aller seiner wolthaten redt. Denn das wort genad begreiffet die gemeinschaft vnd wolthaten Christi / so im Euangelio den glaubigen verheissen / vnnnd niemanden anders denn durch waren glauben an Christum zutheil können werden. Also sagt auch wol Theodorus / das im Abendmal der leib vnd das blut Christi genossen werde / Setzt aber niergend darzu / das solches leiblich oder mit dem munde des leibs geschehe / Sonder sagt dargegen Dialogo 1. Das den reichen vnd armen / obern vnnnd vnterhanen / ein Abendmal des Herren fürgetragen werde / vnd ein Glaubiger niesz so viel als der ander. Eben auff diese meinung sagt er auch / das auß brot vnnnd wein der leib vnnnd das blut Christi werden / vnd dieselben / nicht wie im

Papstum.

Papstum für Christum angebetet/sond als Sacrament vñ
Göttliche warzeichen des leibs vñnd bluts Christi in ehren
gehalten werden/Wie er sich an vielen orten erkläret/vñnd
anderstwo ferner ist angezeigt.

Bericht.

Auff diese weiß brauchen auch Augustinus vñnd andere
Väter / die wörlein zeichen vñnd figur/nicht das sie die ware
gegenwertigkeit Christi damit auffheben/

Erklärung.

Die ware gegenwertigkeit Christi in seinem Abendmal
wird durch diese wort nicht auffgehoben / sonder viel mehr
geleret vñnd bestätigt. Denn weil die Sacrament/als sicht-
bare zeichen vñnd sigll an die verheissung des Euangelij sind
angehenget / vñnd Gott in seinen warzeichen eben so wenig
als in seinem wort/vñns kan betriegen/ So muß die gegen-
wertigkeit vñnd gemeinschafft Christi in den Sacrament
eben so gewiß sein/als in der predig des Euangelij. Die leib-
liche gegenwert aber in dem brot/welche nicht ein rechte vñnd
ware/ sonder one vñnd wider Gottes wort erdichte gegenwer-
tigkeit ist/wird damit freilich auffgehoben/Dieweil das Sa-
crament vñnd warzeichen des leibs vñnd bluts Christi/ nichts
anders/denn ein sichtbares wort oder verheissung des Euan-
gelij ist / welche alle glaubigen angehet/ Vñnd derhalben die
zeichen / so mit augen werden gesehen / kein andere gegen-
wert vñnd gemeinschafft Christi verheissen vñnd bestätigen
können / denn die predigt des worts leret/wel-
che mit ohren gehöret.
wird.

Von den Worten der einsetzung

Bericht.

Sonder zu bezeugen / daß sie on alle Transsubstantiation / im Abendmal zwey ding erkennen vnd annemen / als nemlich die eusserliche Element / brot vnd wein / vnd darneben auch vnfers erlösers Christi leib vnd blut.

Erklärung.

Diese zwey ding erkennen vnd nemen auch wir an / Aber also wie die Schrift vnd alle Väter in dem wort vnd allen Sacramenten / sie vns annemē leren / nemlich / die sichtbar leiblich / die vnsichtbare geistlich / mit warē glaubē an die verheissung / die in d' predig mit ohren gehöret / vñ in Sacramente mit augen geschē wird / Vñ aber in beidē ein vergeblich gedōne vnd spectacul bleibet / so sie nit wird mit glaubē gefasset.

Bericht

Es ist auch diß offenbar vnd gewiß / daß sie an denen orten / da sie die wortlein zeichen vñ figur brauchen / nur allein von einem theil reden / nemlich von dem eusserlichen vnd sichtbaren Element oder zeichen / welches ist brot vnd wein / vnd nicht von dem gantzen Sacramēt. Das ist vnwidersprechlich war bey allen Gottsfürchtigen Christē / Kan auch / sonb zweuel / an keinem ort anders erweisen werden.

Erklärung.

One allen zweuel ist diß gewiß vñ vñwidersprechlich / daß nit das vnsichtbare fleisch vñ blut Christi / sonb allein dz sichtbare brot vnd wein / zeichen der genaden sind / vñ bey allē recht lernenden geneüt werdē. Darauf aber folget / daß die sēnigz weit fehlen / die auß dē vnsichtbaren vñ mündlich genossenen leib Christi wollē ein zeichen d' genaden machē / da durch vnser glaube bestättiget solle werdē / So doch in allen Sacramenten die zeichē eusserlich vnd sichtbar / die vnsichtbare

baren ding aber nichts andere / denn eben dieselben im Euange-
lio verheiffene gabē vñ wolthaten sind / welche mit glaubē an-
genommen / vñ allen außerselten gegeben / vñ durch die sicht-
bare zeichen vñ vnser schwachheit willen vns bestättiget vnd
je mehr vnd mehr mitgetheilet werden. Es ist auch allhie wol
zumercken / daß M. Selnecker hie außdrücklich bekent / Daß
die alten / diese wort Christi / das ist mein leib / also verstanden
vnd erkläret haben / dz brot ist ein zeichen meines leibs / vñnd
nimt solche erklärang an / die auch wir für Christlich vñ recht
halte / vñ wissen dz sie Gottes wort gemess ist. Sol denn nu ne-
ben dieser erklärang vñ alte Christlichen lehrer / auch seine außle-
gung bessehen / So muß er je mit Schrift beweisen / daß die
gemelte wort Christi auch also vil heisse als diese rede / In die-
sem brot ist mein leib / Vñ darthū / daß diese erklärang / diß brot
ist ein zeichen des leibs Christi / so viel vermöge als diese / inn
diesem brot vñ zeichē ist wesentlich vñ leib Christi verborgē / zc.
Welches er aber noch nie gethā / vñ auch hinsüro lassē wird.

Bericht.

Allhie ist auch nüt vñ gut / daß mā diesen vnterscheid halte /
Nämlich / daß etliche zeichē nur blossē bedeutung sind / wie Ge-
deons fell mit vñ wollē / vñ viel andē figurē im alte Testamēt.
Etliche aber sind also zusagē / vbergebende zeichen / welche die
ding / derē zeichē sie sind / zugleich bey sich habē vñ vbergeben.

Erklärung.

Diß ist auch recht geredt / so es recht verstandē wird. Die
Sacramēt sind vbergebēde / dz ist / solche zeichē / dadurch vns
Got seine gabē vñ wolthatē gibt vñ mittheilet / Aber also wie
durch dz wort / nit leiblich / sond geistlich / dz ist / also / dz vñ H.
Geist durch dz wort den glauben in vnsern herzen wircket /
vñnd durch die Sacramēt denselben erhelt vñnd stercket
durch

Von den Worten der einsetzung

durch welchen glauben er je lenger je reichlicher in vns wohnt/vnd vns Christi vnd aller seiner wolthaten theilhaftig macht. Des gleichen/so diese rede/ das die zeichen dieselben ding/ welcher sie zeichen sind/ zugleich bey sich haben/ also wird verstanden/das die vn sichtbaren gaben/ mit den sichtbaren zeichen/in rechtem brauch/den glaubigen warhaftig widerfaren/ so ist sie zuleiden/ So man sie aber also verseyhet/dz die vn sichtbaren ding leiblich in oder bey den sichtbaren zeichen sind/Mag sie nicht bestehen. Denn auch durch das wort eben/dieselben gaben vns werden mitgetheilet/die wir inn Sacramenten empfangen/ Item/ Es ist auch das wasser im Tauff ein vbergebendes zeichen/wie es Selnicker nennet/des bluts Christi vñ der vergebung der sünden/ Bñ werden wir im Tauff Christo eingeleibet/ wie 1. Corinth. 12. sehet/ Ist aber dennoch da keine leibliche gegewert des laibs vñnd bluts Christi/in oder bey dem wasser. Item/ Es sollen auch die Sacrament des alten Testaments/die Beschneidung/ Osterlamb/2c. nicht also verkleinert werden/ als weren sie nicht vbergebende zeichen gewesen/ vñnd die glaubigen im brauch derselben nicht zugleich deren ding weren theilhaftig worden/welche durch dieselben Sacrament bedeuert wurden/Dieweil die ganze Schrifft von einerley seligkeit leret/ vnd Paulus 1. Corinth. 10. ausdruecklich zeuget/ das die vñter dem altem Testament/Christum so wol haben geessen als wir/ Der vnterscheid aber der alten vnd newen Sacrament allein darinnen stehet/das jene auff den künfftigen/ diese aber auff den gesandten Messiam weisen/vnd derhalben die vñferm/weniger/klärer vnd tröstlicher sind den die alten. Vñnd ist in diesem ganken handel fleissig zumercken/ das auß derselben

Selben lere / die von allen Sacramenten in gemein gehalten vnd bekant muß werden / nichts besonders von dem Abendmal oder einigem Sacrament kan geschlossen werden. Der halben weil alle andere Sacrament so wol als das Abendmal / vbergebende zeichen sind / vnnnd dennoch in keinem andern / ein leibliche vbergebung der vnsichtbare gabe zudichten ist / kan auch im Abendmal kein solche vbergebung des leibs vnd bluts Christi darauß folgen.

Bericht.

Also war die Taube ein zeichen des H. Geistes / also ist das brot ein zeichen des leibs Christi / vnd der wein ein zeichen des bluts Christi.

Erklärung.

Daß der leib Christi also bey dem brot sey / wie der H. Geist wesentlich bey der Tauben gestalt war / folget nicht. Erstlich darumb / daß die natur vnd das wesen des H. Geistes vnendlich vnd vnbegreiflich / vnd zu seder zeit an allen orten gegenwertig ist / Der leib Christi aber ist vor vnd nach seiner verklärung vnd herligkeit / wie die Schrifft lehret / zu einer zeit nicht an mehren denn an einem ort. Zum andern darumb / daß Gott mit d' taubengestalt / wie auch mit andern sichtbaren gestalten / in denen er sich hat offenbaret / seine wesentlichliche gegenwert vñ wirkung an dieselb ort / da sie erschienen / wolte bezeugen / Mit dem brot aber wil Christus nicht bezeugen / daß sein leib in oder bey dem brot oder in dem mund oder leib der niessenden sey / sonder daß er für vnser sünde gecreutziget / vnd vns die speiß des ewigen lebens sey / laut seiner verheissungen / Welches keiner leiblichen gegenwert bedarff.

Von den Worten der einsetzung

Bericht.

Vnnd darauff gehen diese zwen schönen sprüch / welche wol wert sein daß man sie mercke / vnnd recht betrachte. Der erste ist Hilarij / vnnd lautet also. Der leib Christi / welches wir am Altar theilhafftig werden / ist ein figur / so fern man cusslich für augen sihet vnd fühlet brot vnd wein / das warhafftige wesen aber / so fern mit rechtschaffenen hertzen der leib vnd blut Christi geglaubt werden.

Erklärung.

Dieser spruch Hilarij / des Römischen Bischoffe / welcher stehet in *Decretis Gratiani, de consecratione Distinct. 2. cap. Corpus* ist der leiblichen gegenwert vnnd niessung des leibs Christi stracks zuwider. Denn er leret / Daß von dem Tisck des Herren / (welchen er darumb daß er das creus / darauff Christus geopffert ist / bedeutet / den Altar nennet) die figur oder anbildung des leibs Christi / Nemlich / das sichtbare brot vnnd wein genommen werde / welche doch ein solche figur sind mit welcher die Glaubigen das jenige so dadurch wird angezeiget / warhafftig entpfangen / Der ware leib vnnd blut Christi aber selbst / so durch diese figur wird bedeutet / werde innerlich in der warheit geglaubet / das ist / mit warem glauben angenommen vnd genossen.

Bericht.

Der ander ist Augustini. Christi leib ist zugleich warhafftiges wesen / vnd ein figur warhafftiges wesens / dieweil durch krafft des H. Geists / auß der substantz brots vnd weins / Christi leib vnd blut wird. Das man aber cusslich sihet vnd fühlet / ist ein figur.

Erklärung

Das Erste theil. Erklärung.

10

Dieser spruch dienet auch M. Selneckern gar nicht zu seiner sachen. Denn so er nach dem ansehen der wort sollte verstanden werden / würde er nicht die leibliche gegenwert des leibs Christi in dem brot / Sonder die Pöpstliche verenderung der substanz des brots inn das fleisch Christi bestätigen / von welchem allem Augustinus nichts gewußt. Ist der halben diß die meinung Augustini wie auch Hilarij das der ware leib Christi selbs / vnd die figur desselben / der leib Christi genennt werde / vnd sey also das brot ein figur des leibs Christi / aber ein warhafftige figur / das ist / mit welcher wir warhafftig des waren leibs Christi / den sie bedeuten / theilhaftig werden / doch durch wirkung des heiligen Geistes / welcher vnns dieses brot zu dem leib / das ist / zu einem gewissen vnd krefftigen pfand des leibs Christi / vnd also vnns dadurch seiner gemeinschafft theilhaftig macht.

Vericht.

Also haben es etliche / wie Theoboretus / Macarius / vñ andere / genennet Antitypon / welches heist ein ebenbild. welches dem / daher es genomen / gleichförmig ist / wie in dem alten Griechischen verß / *Κα lithos antitypo.* &c. dieses wort gebrauchet wird. Darauß die gelerten leichtlich verstehen / daß dieses wort im Artickel vom heilige Nachmal des Herrn gebrauchet ist worden / anzudeuten / daß zwey ding im Abendmal seyen / die substanz vnd wesen des brots / welchs man eufferlich sieht vnd fühlet / vnd Christi leib / Das ist / ein sichtbarlich vnd ein vn sichtbarlich / ein irdisch vnd himlisch ding. Dann sie haben die Corpora Mathematica. Das ist / solche leib vnd wesen / die wol Leiblich wesen an zu selbst haben / können aber nicht sich

C ij greiffen

Von den worten der einsetzung

greiffen vnd fñhlen lassen / Antitypa genennet / in vergleichung
deren ding / so auch jr leiblich wesen haben / vnd aber sich ein-
ferlich fñhlen lassen. Darumb erklären die Grammatici dieses
wort also / das sie sagen / Was ist das / das ob es schon ein we-
sentlich ding ist / so sihet mā es doch nicht. Antwort / Wir nen-
nen es Antitypon. Aber man halte gleich von diesen vñnd der-
gleichen wörtelein was man wöll / so dienet es doch warhafft-
tig / wie jetz gesagt / alles nur dahin / daß die Transsubstantia-
tion verworffen / vnd in dem Nachmal zwey ding / das auß-
ferlich / brot vnd wein / vnd zu gleich Christi leib vnd blut er-
kent vnd angenommen werden.

Erklärung.

Darneben aber dienen auch diese wort dahin / daß man
den rechten brauch dieses brots vnd weins / vñnd die vrsach
verstehe / warumb es Christus im Abendmal sein leib vñnd
blut hat genent / Nemblich / Daß er vns dardurch / als mit ei-
nem sichtbaren wort / gleichniß vñnd erkund / eben dasselbe
fürbilden vnd mehr versichern wil / daß er vnns von der ge-
meinschaft vnd niessung seines leibs vnd bluts im Euange-
lio leret vnd verheisset.

Bericht.

So man nun darumb die alten Christliche Lehrer an-
klagt vnd verwirffe / dieweil sie in solcher meinung das brot /
symbolum. typum. signum. zeichen vnd figur des leibes Christi ge-
nent haben / so geschicht jnen gewalt vnd vnrecht.

Erklärung.

Die Alten Scribenten vmb dieser lere willen zuuer-
werffen / hat sich bisher niemand / auch die Papisten selbst /
nit dürffen vntersehen / wie etliche dieser zeit newe Scholo-
gen /

gen / so die leibliche gegenwert Christi im brot verteidigen / sich nicht schämen zuthun. Es geschicht aber den *Patribus* nie allein damit gewald vnd vnrecht / so man sie von dieser rede wegen anlagt vnd verwirfft / Sonder auch in diesem / so man ihnen auffdichtet / das sie die leiblich gegenwert vnd niessung des leibs Christi im brot geleret haben / welches sich in iren schrifftten viel anders befindet.

Bericht.

Dann sie damit nicht geleugnet haben / daß Christi leib vnd blut warhafftig gegenwertig sey / sondern haben nur diese wörllein dem irthumb von der Transsubstantiation zuwider gesetzt.

Erklärung.

Die Transsubstantiation ist erst vber etlich hundert jar nach der Väter zeiten geboren. Derhalben sie nicht fürnemlich darauff gesehen / sonder den rechten brauch den brots vnd weins im Abendmal haben hiemit wollen leren / Nämlich / Daß vnns eben dieselbe geistliche gemeinschafft vnd niessung Christi dadurch fürgetragen vnd versichert wird / von welcher das ganze Euangelium prediget. Vnd wird also mit diesen worten / daß das brot ein zeichen / warzeiche / anbildung / Sacrament / sigil / pfand / zeugniß /c. des leibs Christi geneüt wird / von vns vnd den Vätern / die leiblich gegenwert vnd niessung Christi in dem brot verneinet / Die ware / geistliche / inn Gottes wort gegründte niessung aber wird damit geleret vnd verteidiget.

Bericht.

Sieneben aber muß man auch das anzeigen / meniglichen allhie zu warnen / nach dem zu dieser zeit sehr viel sich dieser

Von den Worten der einsetzung

wortlein behelffen / die gegenwertigkeit vnnnd warhafftige
niessung des waren leibs vnnnd bluts Christi damit zu verleu-
gen vnnnd umbzustoßen / vnd solchs wider alle meinung der
Gottseligen alten Lehrer.

Erklärung.

Die warhafftige niessung des leibs Christi wird dar-
rumb nicht verleugnet / ob er gleich nit in dem brot ist / Wie
auch im Lauff die warhafftige besprennung mit dem blut
Christi / darumb nicht wird verleugnet / ob gleich das wasser
nicht ein beheltniß / sonder ein zeichen ist des bluts Christi /
vnnnd das blut Christi nicht wesentlich inn dem wasser ist /
Auch wir nicht leiblich / sonder geistlich damit besprenget vñ
gewaschen werden.

Bericht:

So ist fürwar inn allerweg besser man vnterlasse vnnnd
enthalte sich dieser wortlein / denn daß man mit densel-
ben ursach gebe zu vnchristlichen / schädlichen disputatio-
nen. Denn es ist gefערlich vnnnd ergerlich geredet / so man
sagen will / Das brot ist ein zeichen des leibs Christi / nicht
das diese red an ihr selbst falsch sey / sondern vmb deren wil-
len / die als bald darauß schliessen wollen / Christi leib sey nicht
da gegenwertig / Denn bey rohen / listigen leuten kan niemands
weißlich genug reden.

Erklärung.

Es ist nicht gefערlich / sonder nutz vnnnd not also zure-
den / vnnnd was Sacramentsweise inn der Schrifft geredt
wird / also zuerklären / Erstlich darumb / daß es die
Schrifft selbst / vnnnd folgendes die ganze Christliche kir-
che also

Sie also erkläret vnnnd verstanden hat / Als da Gott selbst
 Genesis am siebenzehenden die Beschneidung den ewigen
 bund zwischen ihm vnnnd Abraham / Vnd das Osters
 lamb den vberschrit / vnnnd gerad darauff ein zeichen dieses
 bunds vnnnd des vberschrits nennet / Item / da Christus
 das brot seinen für vnns gebrochenen leib nennet / vnd bald
 darauff saget. Wir sollen diß brot niessen zu seinem gedäch-
 niß/te. Zum andern darumb / daß mit solcher erklärungs-
 zu keinem irthum wird vrsach gegeben / weil vnns Gote
 nicht leere vnnnd betriegliche / sonder warhafftige vnnnd ge-
 wisse warzeichen seiner verheissungen gibt / Vnd kan
 die art vnnnd der rechte brauch der heiligen Sacrament / an-
 ders nicht eigentlich erkläret vnnnd geleret werden / denn
 eben also / daß sie sichtbare warzeichen vnd zeugnis sind / an
 die verheissung der genaden gehengt / vnsern glauben eben
 deren dinge / die im ganzen Euangelio verheissen sind /
 mehr vnnnd mehr zuuersichern . Vnnnd zum dritten / daß
 durch dz langwerige schreien etlicher leute / Man müsse die-
 se wort / Daß ist mein leib / nach dem buch staben verstehen /
 abgöttische vnnnd mit Gottes wort manigfaltiglich streitten
 de gedanken inn das volck sind getrieben / Welche zuer-
 meiden vnnnd abzuleinen / die jenigen / so zuerkentnis der
 warheit kommen / solche erklärungs der Schrifft vnnnd der
 ganzen Alten Christlichen kirchen / mit guttem ge-
 wissen nicht können vnter die
 bandt stof-
 fen.

Von den Worten der einsetzung
Bericht.

Das iij. Capitel/

Von dem wort *Typus*, vnd widerumb von
den *symbolis*, das ist / zeis-
chen.

Gliche sagen das Sacrament des Altars sey ein beden-
kung / erinnerung / vnnnd vorbild des abwesenden i. b. s.
Christi.

Erklärung.

Abwesende ist vns jekund der Leib Christi leiblich / das
ist / so viel Stadt vnd ort belanget / Gegewertig aber ist er vns
geistlich / das ist / so viel vnseren glauben / vnd die einleibung
inn denselben waren wesentlichen Leib Christi / durch seinen
Geist / belanget. Also ist auch das Haupt vnser Leib seinen
gliedern gegenwertig / das ist / mit denselbē zu einem Leib ver-
bunden / vnd gibt inen allen krafft vñ leben / sie stehen gleich /
Stadt vnd Orts halben / nahend oder fern dauon. Also ist auch
das Blut Christi im H. Tauff leiblich abwesende / geistlich
aber gegewertig / dz ist / wir werde warhafftig dadurch vñ sün-
den gereiniget / ob es gleich nur ein mal am Creuz ver gossen
worden. Vñ in summa / weil die Sacrament / sichtbare wort
vnd verheissungen sind / so muß man bey den sichtbaren zeis-
chen / kein andere gegenwert Christi suchen / denn bey dem
gepredigten wort. Denn Christus bey einem stück seines pres-
digamts eben so wol gegenwertig vnnnd durch seinen Geist
kressig sein wil / als bey dem andern. Vnd derhalben wie es
ein vnchristliche rede were / so jemand sagen wolte / die predig
des Euangelij were den glaubigen darumb ein blosses leeres
wort /

wort/oder der Tauff were inen darumb ein blosses leeres zeichen/das Christus nicht leiblich inn den worten oder in dem wasser ist/Also ist inen auch das Abendmal darumb kein blosses leeres zeichen/ ob gleich Christus nicht leiblich inn dem brot verborgen ist.

Bericht.

Das aber in diesem handel kein solche bedeutung statt haben mög/das macht die einsetzung/oder die wort des Sacraments/welche das jenige dauon gehandelt wird/nemlich/den leib vnd blut Christi/ausdrücklich nennen vnnnd dargeben/also/das man stracks verstehen/vnd mit einseitigem gehorsam des glaubens annehmen muß/was da gesagt wird.

Erklärung.

Die einsetzung hindert gar nicht/sonder fodert vnnnd leret viel mehr ein solche bedeutung des leibs vnd bluts Christi/durch das brot vnnnd wein im Abendmal/wie jetzt vnnnt vns gemeldet/Erstlich darumb/das alle Sacrament darzu von Gott sind eingesetzt/das sie sollen als sichtbare warzeichen eben diß den augen fürbilden/das die verheissung des Euangeltij den ohren verkündiget. Zum andern/Das Paulus vnd Christus selbst in der einsetzung des Nachtmals lehren/diß brot solle vns ein gedächtnis sein/des für vns getöden leibs Christi/Darumb auch alle Christliche alte Scribenten also geredt haben/wie anderßwo ist angezeigt/vnnnd hie zuwiderholen zulang vnd vnnnot were. Das aber ausdrücklich der leib Christi geneßt wird/hindert diesen verstäd nicht. Denn M. Selnecker droben selbst mit den Alten Lehrern bekennt/das diese wort Christi/Dz ist mein leib/so viel heissen/als/Diß brot ist ein zeichē meines leibs. Wo dem nu also/wie im den gewißlich also ist/so kan je auß den worten Christi nit

D

erzwun

Von den Worten der einsetzung

erzungen werden/das sein leib werde leiblich in oder vnner
oder mit dem brot dargericht. Exempel/ wenn jemand einem
ein summa gelds/ oder hauß oder anders dergleichen vberge
ben wil / Reicht jm die verschreibung desselben/ vnd spricht/
Das ist das geld/das hauß oder gut/ 2c. Meinet aber damit/
oder sagt außdrücklich darzu/das ist die verschreibüg deines
gelts/hauses/ guts/ 2c. So kan noch vermeinet freilich nie
mand auß solchen Worten zuerzwingen/das das geld/ hauß
oder gut leiblich vñ wesentlich in dem brief stecke vnd darina
nen oder damit auß einer hand in die ander dargericht wer
de. Also auch dieweil Christus nach einhelligem vnd in Got
tes wort gegründtem verstand der Alten Christlichen kircht/
vnd nach Schneckers mehrgedachtem bekentnis / mit diesen
worten/das ist mein leib/also viel gesagt vnd gemeint hat/
Als / diß brot ist ein zeichen meines leibs/ So kan auß vielge
meldten Worten Christi eben so wenig geschlossen werden /
das sein leib wesentlich vnd leiblich im brot stecke/ als das in
dem brief dz gut stecke. Welches er auch selbst öffentlich le
ret/da er den kelch das new Testament nennet / vnd diß brot
vnd wein zu seinem gedächtnis heist niesen. Ferner/das
die wort der einsetzung den leib Christi dargeben / ist auch
recht geredt / so es von dem geistlichen dargeben verstanden
wird/Wie er auch in der verheissung vnd predig des Euan
gelij dargeben wird/Vnrecht aber ist es/so es von einem leib
lichen dargeben verstanden wird. Denn in allen Sacramen
ten die sichtbaren ding leiblich / die vn sichtbaren geistlich
durch waren glauben / gegeben vñd empfangen werden.
Das man aber stracks verstehen vñd glauben müsse / was
da gesagt wird/sagt wol dieser Scribent vnd seines gleich/
Kan es aber nicht beweisen / vnd glaubt es auch selbst nicht.
Denn

Denn Christus sagt / Das brot sey sein leib / Sol man dieses stracks also wie es lauet / verstehen vnd glauben / Warumb erit er nicht gerad zu dem Papst. Item / Warumb sagt denn er vnd andere / Nicht das brot / sonder in oder bey dem brot / sey der leib Christi?

Bericht.

Es kan auch gar kein gründliche vrsach fürbracht werden / warumb man hie ein solchen Typum. oder figur / wie die Sacramentirer lehren / solle verstehen.

Erklärung.

Fernere vrsachen fürzubringt ist allhie one not / weil Sel necker droben selbst / wie jetzt gemeldt / bekennen muß / daß die auflegung der Alten kirchen recht sey / vnd aber wir keine andern typum oder figur leren / den die Alten gelert haben / doch so jemand ferneren beweiß begeret / So sind die viel vñ lang fürgebrachten vrsachen / daß das brot Sacramentsweise / oder bedeutnißweise / oder gedächnißweise / vñ leib Christi sey / noch von niemande widerlegt / Nemlich die erklärung Christi vnd seiner Apostel / daß dieses brot vnd wein / ein gedächniß des todtes Christi / die gemeinschafft des leibs vnd bluts Christi / Das neue / durch dz vergossene blut Christi gemachte Testament sey / Item / die natur vnd eigenschafft aller Sacrament / vñ gewöhnliche weise vonn denselben zureden / Item / die Articul vnfers Christlichen glaubens / von der wahren menscheit Christi / von der gemeinschafft der glaubigen mit Christo /c. Dargegen aber kan keine gründliche vrsach fürbracht werden / warumb man diese wort Christi verstehen müsse / wie sie lauten.

D is Bericht.

Von den Worten der einsetzung

Bericht.

Sintemal die wort der einsetzung da der Son Gottes spricht / Das ist mein laib / eben so gewiß geglaubt werden müssen / als diese wort / Christus ist mensch worden / Christus hat gelitten / ist gecreuziget worden / auferstanden / gen himel gefaren / sitzet zur rechten des Vatters / &c. Man sol auch dieses glaubens kein andere rechen schaffte gebē / dan daß der Son Gottes diese wort geredt hat / welcher die warheit selber ist / vñ nicht liegen kan.

Erklärung.

Daß man dasselbe glauben sol / daß Christus gesagt hat / darff keines streits. Darauff aber müssen wir sehen / was er geredt hat / vñd wie er seine wort wll verstanden haben / Auff daß wir nicht an stadt seines worts / menschen geacht dacht ergreifen vñd glauben. Derhalben glauben wir jenen Worten Christi / Das ist mein laib / &c. eben so gewiß als diesen / Christus ist gecreuziget / gestorben / auferstanden / &c. Aber jenen nit nach dem buch staben wie diesen / sonder Sacraments weise / wie des Herren Christi eigene erklärung / auch die art aller Sacrament / vñd die Articul des Christlichen glaubens erfordern.

Bericht.

Darumb haben auch etliche vnter den Alten Lehrern / diese wortlein / *Symbolum* vñd *Typus* verworffen / allein auß der ursach / damit in 37 nachmals an der gegenwertigkeit vñd warhafftigen niessung des laibs vñd bluts Christi nicht etwas zweüele / Wie dann Damascenus im vierdten buch / cap. 14. schreibet / da er spricht / Brot vñd wein sind im 3. Abendmal nicht ein figur vñd bedeutung des laibs vñd bluts Christi / das sey fern / sondern des Herren selbst warhafftiger laib mit
der

der Gottheit vereiniget. Dann der Herr spricht selber/ Das ist nicht *typus* oder ein bedeutung meines leibs / Sondern/ mein leib/ Auch nit/ Das ist *typus*, oder ein bedeutung meines bluts/ Sondern/ mein blut. Weiter sagt er am selbigen ort/ Fragst du nun/ wie ist das brot Christi leib? vnnnd der wein Christi blut? Ich sage dir/ der *S. Geist* wirket das vber aller menschen vernunft vnnnd verstand/ Er brauchet aber darzu brot vnnnd wein. Auch *Theophylactus* / den man sonst *Bulgarium* nennet/ da er schreibet vber den Euangelisten *Mattheum*/ spricht/ Dann er sagt nicht / das ist ein zeichen meines leibs/ sondern das ist mein leib / als zeigt er mit einem finger darauff/ darmit niemands gedencke das jenige so man sihet / sey *typus* oder ein figur.

Erklärung.

Erstlich halten wir das brot für ein gedächtniß des leibs Christi/ darumb das es Christus befolhen hat / welchem wir schuldig weren zuglauben / wenn gleich alle menschen anders sagten. Zum andern sind *Damasenus* vnnnd *Theophylactus*/ als die in der lere nicht durch auß rein/ mit den andern alten Scribenten nicht zuer gleichen/ viel weniger sie wider der andern aller öffentliche vnnnd eintrectige zeugniß anzuziehen. Zum dritten / so diese sprüch solten verstande werde wie sie lauten / würden sie nicht die leiblich gegenwert in dem brot / sonder die Pöpstliche verenderung des brots in das fleisch Christi bestättigen/ wie auch das gegentheil selbst muß bekennen / vnnnd der halben nit one vrsach etliche geleerte leute vermutung haben / das fre bücher vnnnd den schreibern vnnnd böshaffigen münchen verfälschet sind. Zum vierden hat *Theophylactus* nur einen außzug geschrieben auß den büchern *Chrysostomi* / welcher weit eines höhern ansehens in der Christenheit gewesen vnnnd noch ist/ denn *Theo-*

Von den worten der einsetzung

phylactus/ Vnd nenne aber Chrysostomus gar offte das
 Nachmal oder das brot/ *mysterium, similitudinem, commemoratio-*
nem, Recordationem, symbolum, signum, Exemplar, &c. Das ist/ ein ge-
 heimniß/ gleichniß/ gedechtnis/ warzeichen/ zeichen/ anbil-
 dung/ &c. wie anderstwo angezeigt. Zum fünfften/ so würde
 auch solcher verstand dieser sprüch von der seiblichen gegen-
 wert/ mit andern orten dieser angezogenen Scribentē/ von
 der menschheit Christi vnd auch vom Abendmal/ nicht möge
 bestehen. Denn Theophylactus schreibe auß Chrysostomo/
 vber die wort Pauli/ 1. Corinth. 10. also/ Wir werden mit
 Christo vereiniget durch dieses brot. Ist derwegen das brot
 nicht der wesentliche leib Christi selbs/ sonder ein mittel/ nit
 durch welches der leib Christi den glaubigen vnd vnglaubig-
 gen in den mund gelegt wird/ sonder durch welches Wir nem-
 lich die Glaubigē mit Christo werde vereiniget/ Welche ver-
 einigung nicht anders denn durch waren glauben vnd Geist
 Christi geschē kan. Zum sechsten/ stehet auch im Theophy-
 lacto diese erklärung darbey/ das brot sey nicht nur allein ein
 zeichē/ Damit er zu verstehen gibt/ daß es nicht ein zeichen od-
 vorbild sey des opffers Christi/ wie die figuren des alten Tes-
 taments waren/ viel weniger ein leeres blosses zeichen oder
 anbildung/ sonder ein Sacrament des newen Testaments
 vnd schon volendetes opffers Christi/ mit welchem die glau-
 bigen warhafftig entpfangē/ das dadurch wird angezeigt/
 Welche versicherung vns wol einzubilden/ Christus nit hat
 gesagt/ das brot sey ein figur oder zeichen/ sonder/ es sey sein
 leib. Vnd können diese sprüch nicht anders/ denn von d' Sa-
 cramentlichen verenderung des brots verstanden werden/
 welche nit das wesen des brots/ sonder den brauch belanget.
 Solchs ist daher gewiß/ daß Damascenus vnd Theophyla-
 ctus

Das Erste theil.

16

etwas nirgend sagen/der leib Christi sey in dem brot/sond das brot werde zu dem leib Christi/Wie zuvor ist gemeldet.

Bericht.

Weitter vber das vierzehende cap. Marci/schreibt er/Das ist mein leib/das/sage ich/das jr empfahe/ dann das brot ist nicht nur allein ein figur / oder bedeutung des leibs Christi. Sprichst du aber/wie daß man das fleisch nit sihetz Antwort. Das geschichte vmb vnser schwachheit willen/darmit wir darvon kein abschewens haben.

Erklärung.

Diese rede / auff die leiblich gegenwert vnnnd niessung vnd verbergung des fleisches Christi in dem brot/ zuziehen/ solten sich die billich schämen / die mit den Capernaitern so gar kein gemeinschaft wollen haben. Denn so diese wort also so zuuerstehen weren / würde darauß ein solche vn sichtbare niessung des leibs vnnnd bluts Christi im Abendmal folgen/ an welcher man/wenn man sie sehen möchte/ einen abschewen würde haben. Was ist aber vnchristlichers zagedencken? Derhalben diese rede Theophylacti/so sie der Christlichen lere gemäß sol sein/nicht kan also verstanden werden/ daß wir den schewen zuuerhütten / das fleisch Christi vnter dem brot verborzen/mit dem leiblichen munde niessen/ Den auff diese weise das abschewen nicht auffgehoben würde/ Sonder ist diß die meinung Theophylacti/ daß wir vns ebe darumb nicht dürffen entsetzen/ weil wir Christum nicht leiblich essen / weder sichtbar noch vn sichtbar / sonder die sichtbare leibliche niessung des brots/ vns ein zeugniß vnd mittel ist / der vn sichtbaren geistlichen niessung des leibs Christi.

Bericht.

Von den Worten der einsetzung

Bericht

Vnd dergleichen zeugniß findet man viel in des Theophylacti büchern/welche alle hie zuerzelen viel zu lang sein würde. Wiewol aber Damascenus vnd Theophylactus etwas grob/der Transsubstantiation gemess reden/so kan man doch daher abnehmen/Daß auch die Alten Lehrer diese wörterlein/signum, Typus, zeichen vnd figur nicht auff einerley weise gebraucht habe. Derhalben es besser/daß man sich dieser wörterlein vil mehr: gar enhielte/denn daß man sie brauchen/vnd den alten Scribenten darinn nachfolgen wil / da jene doch selbst vnter einander hierinnen noch nicht eins sind.

Erklärung.

Die rechten alten Scribenten sind alle eins in rechtem vñ oberklärtem brauch dieser wort/wie anderstwo erwiesen. Vnd sollen solche wort inn der lehre von Sacramenten gebraucht werden/nicht allein darumb / daß die ganze Rechte glaubige kirch also geredet / Sonder fürnemlich darumb/Daß Gott selbst in seinem wort von Sacramenten also redet/vnd solche erklärung/ab göttische irthum zuuermeiden/vnd rechten verstand/vnd fruchtbarlichen tröstliche brauch der H. Sacramenten zuerhalten/nötig ist.

Bericht.

Wir aber sollen vñnd wollen thun wie die Gottseligen je vnd je gewüßt vnd gethan haben/nemlich es dafür halten/das der alten Lehrer spruch vnd meinung nicht sein / oder gehalten sollen werden/als fundamenta vnd grundfest/darauff wir irgend den geringsten Artikel Christlichen glaubens mögen bauen/sonder wo wir vonn einer sachen/Gottes anstößlich wort haben/vñnd als dann der alten Scribenten meinungen mit demselbigen vberestimmen/so soll man sie hören vnd

vnd annemen / Gottes wort damit zuerklären / mit nichten
aber vntersehen Gottes wort auff frembde meinung zulen-
cken / wies etwan diesem oder jenem alten Lehrer gefellet.

Erklärung.

Das das brot also der leib Christi sey / wie ein gedäch-
niß das jenige ist / das man dabey gedenckt / lernen wir auß
den worten Christi / vnd stimmen damit alle alte Scribentē.
Das aber der leib Christi im brot sey / diß ist dem wort Got-
tes vnd allen alten Lehrern zuwider. Derhalben gründen wir
vnsere lere vnd glauben allein auff das wort Gottes / Die
Väter aber ziehen wir allein an / die schwachen desto mehr
zuuersichern / vnd zubeweisen / daß des gegentheils lere new
in die kirchen sey eingefürt.

Bericht.

Das iiii. Capitel /

Von dem einfeltigen / warhafftigen vnd
gottseligen verstandt der wort des
Abendmals.

DOben haben wir gemeldet / daß die wort der einsa-
zung / Erstlich die Transsubstantiation / als ein falsch
gedicht / verwerffen / Darnach auch desgleichen offte
meldten Typum oder bedeutung / durch welche die ge-
genwertigkeit vnd niessung des waren leibs vnd bluts Christi
gelengnet wird. Nun wollen wir der H. Euangelisten wort
selbst betrachten / welche also lauten / Matthei am sechs vnd
zwenzigsten cap. Da sie aber assen / nam Jesus das brot / dan-
cket vnd brachs / vnd gabs den Jüngern / vnd sprach / Nemet /
esst / das ist mein leib. Vnd er nam den kelch / vnd dancket /
E vnd

Von den Worten der einsetzung

vnd gab jnen den vnd sprach / Trincket alle darauß / Das ist
mein blut / des neuen Testaments / welches vergossen wird
für viel zur vergebung der sünden. **Marci am 14. capitel.**
Vnd inn dem sie assen / nam Jesus das brot / dancket vnd
brachs / vnd gabs jnen / vnd sprach / Nemet / esset / das ist mein
leib. Vnd nam den kelch / vnd dancket / vnd gab jnen den / vnd
sie truncken alle darauß. Vnd er sprach zu jhnen / Das ist mein
blut des neuen Testaments / das für viel vergossen wird. **Lu-**
ce 22. Vnd er nam das brot / dancket / vnd brachs / vnd gabs
jnen / vnd sprach / Das ist mein leib der für euch gegeben wird /
das thut zu meinem gedächtniß. Desselbigen gleichen auch
den kelch nach dem Abendmal / vnd sprach / Das ist der kelch /
das neue Testament / in meinem blut / das für euch vergossen
wird. Diese wort der einsetzung bey den Euangelisten stim-
men sehr fein mit einander vber ein / welches ein tröstlicher vnd
gewisser grund ist wider alle frembde deutung vnd glosen. **S.**
Matthæus hat im achten jar / nach der himelfart Christi. **S.**
Marcus im zehenden jar / vnd **S. Lucas** im fünffzehen-
den jar / die einsetzung des Herrn Nachmals beschrieben. Vber
das hat auch der Apostel Paulus etwan im vier vñ fünffzig-
sten jar nach Christi geburt gemeldte einsetzung so gar ein-
trechtiglichen widerholet / daß sichs wol zuverwundern ist.

Erklärung.

Die Euangelisten vnd Apostel stimmen one allen zwei-
uel mit einander wol vber ein / Stimmet aber kein buchstab
derselben mit dieser meinung / daß der leib Christi inn dem
brot / vnd sein blut im wein verborgen sey / vnd durch den
mund in vnsern leib genommen werde.

Bericht.

Was nun dieser wort gründliche meinung sey / ist inn
vnserm kinder Catechismo kurz vñ verstendlich also gefaßt.
Erklärung.

Erklärung.

S. Paulus aber / der weit allen andern Catechismus fürzuziehen ist / hat es also gefasset 1. Corinth. 10. Das brot das wir brechen / vnd der kelch der danck sagung damit wir danck sagen / ist die gemeinschafft des leibs vnd bluts Christi / das ist / das Nachtmal ist ein solche niessung des brots vnnnd weins / dadurch vns als durch ein gewisses zeugniß vnd versicherung vnser glaubens / widerferet vnnnd gemehret wird die seligmachende gemeinschafft des leibs vnd bluts Christi / welche gemeinschafft vns zu einẽ leib / an vnserm haupt Jesu Christo macht.

Bericht.

Das Sacrament des Altars ist der ware leib vnd blut vnser Herrn Jesu Christi /

Erklärung.

Der leib vnd das blut Christi / sind nicht ein Sacrament / sonder sind eben dieselbe gab / die vnnns im Sacrament geschenckt vnd dadurch bestärcket wird.

Bericht.

Unter dem brot vnd wein

Erklärung.

Wo stehet irgend in einem text der Euangelisten / das unter dem brot vnd wein / der leib vnd das blut Christi sey?

Bericht.

Vns Christen zu essen vnnnd zutrincken von Christo dem Herrn selbst eingesezt.

Erklärung.

Was niessen denn die Gottlosen vnd vnglaubigen / weil Christus diese niessung allein vns Christen hat eingesezt.

¶ Bericht.

Von den Worten der einsetzung Bericht.

In dieser auslegung wird der eigentliche vnd natürliche verstand der wort des H. Nachtmals deutlich gefaßt/ Dann die wort des Sons Gottes müssen also verstanden vnd geglaubt werden/ wie sie Christus selbsts heraus geredet.

Erklärung.

Wo hat aber Christus je diß heraus geredet/ Daß in oder vnter dem brot sein leib sey?

Bericht.

Darumb sollen alle Gottselige Christen vnd liebhaber der warheit/ diese nötige erinnerung/ welcher sich allzeit recht schaffene Christen gemäß haben gehalten/ zu hertzen fassen/ nemlich/ so bald man vom dem einfeltigen/ natürlichen verstand dieser wort der einsetzung abweicht/ ist nimmermehr möglich vom diesem Artikel des Nachtmals einigen gewissen bericht zu bekommen/ sondern des menschen hertz flattert hin vnd wider/ vnd kan sich hier von nimmermehr vorgewissen vnd zu frieden begeben.

Erklärung.

Wenn man zu rechtem verstand des Nachtmals kommen wil/ muß man die wort Christi verstehen/ wie er selbst vnd seine Apostel dieselben erklären/ wie die art aller Sacrament/ vnd die Articul des glaubens erfordern. Wer von solchem verstand abweicht/ der stehet nit auff dem wort Gottes/ sonder auff menschen gedicht/ damit Gottes wort verflücht wird.

Bericht.

Welches zwar die vnzelige widerwertige deutung/ vñ zusammen gestücklete vnd geflickte Argument vnd vorgeben der

Das Erste theil.
der Sacramentirer augenscheinlich beweisen.

19

Erklärung.

Wir haben nicht mehr denn eine deutung der wort Christi / daß nemlich diß gebrochene vnnnd genossene brot/ vns ein gewisses warzeichen/ pfand vnd zeugniß ist/ daß der leib Christi für vns gebrochen/ vnd vns die speiß des ewigen lebens sey. Derhalben diese vnnnd dergleichen beschuldigungen / das gegentheil billich innen hielte/ biß sie dieselben mit grund hetten dargethan.

Bericht.

Das v. Capitel/

Beweisung / warum die wort der einsatzung einfeltig vnnnd schlecht verstanden werden sollen / wie sie an ihnen selbst lauten.

Erklärung.

Das gegentheil verstehet selbst die wort nicht schlecht/ wie sie an ihnen selbst lauten/ vnnnd lassen sich auch dieselben nicht also verstehen. Denn sie lauten also/ daß das brot der leib Christi sey/ Welches nach dem buchstaben verstanden/ die Papistische meinung / oder etwa noch ein ergere/ sein würde. Drum macht das gegentheil ein solche glos/ Nicht das brot/ sonder in oder bey dem brot/ ist der leib/ Welche glos aber mit dem laut der wort gar nicht stimmt. Derwegen sie selbst mit der that/ alle ihre beweisungen vmbstossen/ mit welchen sie den laut der wort vermeinen zuerhalten.

E ij Bericht.

Von den worten der einsetzung

Bericht.

Die erste/Man sol vnd darff nicht weichen von dem natürlichen/eigentlichen verstand/ welchen die wort selbst dargeben/ es sey denn solcher einfeltiger verstand einem außdrücklichen zeugniß der **S.** Schrifft / oder einem Artikel Christlichen glaubens öffentlich zuwider / Wo sich das finden wird/ soll man sich dann erst der figuren behelffen/ vnnnd durch dieselbige ein andere fügliche deutung suchen. Es ist aber dieser einfeltige verstand der wort des **S.** Nachtmals/ wofür sie lauten/ gar keiner **S.** Schrifft oder Artikel Christlichen glaubens zuwider/ oder entgegen. Derhalben darff man darinnen keinen frembden verstand suchen / sondern allein bey diesem bleiben welchen die wort selbst mit sich bringen. Daß vns aber die Sacramentirer vorwerffen/ dieser einfeltige verstand vielgemelbeter einsetzung/ sey wider die himelfart Christi/ vnd wider das sitzen zur rechten hand des Vaters / Auch wider die eigenschafft menschliches leibs/ vnnnd was dergleichen mehr vnnnen fürbracht wird / Darvon soll bald hernach auch gesagt/ vnd erwiesen werden/ daß der eigentliche/ einfeltige verstand offgedachter wort des Nachtmals / gar keinem Artikel Christlicher lehr entgegen sey.

Erklärung.

Dieser verstand / welchen die wort geben / wie sie lauten / daß nemlich das brot der leib Christi selbst sey / streitet nicht allein mit der waren menscheit Christi / welche nit auß brot ist/ sonder auß Maria der Jungfrawen geboren / vnnnd wares / natürliches / menschliches fleisch vnnnd gebeine hat/ von welchem die ganze Schrifft zeuget/ daß es/ wie alle andere erschaffene ding / zu einer zeit / nicht an mehreren/ denn an einem ort ist/ Vnd mit der waren Himelfart Christi/ welche also inn Gottes wort beschrieben wird/ daß die menscheit Christi

Christi nicht allein im gesicht vnnnd schein/ sonder warhafftig vnnnd mit der that / von der Erden hinauff gen himel ist genomen/ vnd von dannen weder sichtbar noch vnsichtbar herab komt/ biß Christus am end der welt/ wider wird komen vom himel/ wie man in hat sehen hinauff faren / Sonder er streitet auch mit der gemeinschafft aller Heiligen mit Christo ihrem haupt/ welche nicht ein leibliches eingehen des fleisches Christi in vnser leibe/ sonder ein verbindung vnd vereinigung aller glaubigen mit Christo / durch den H. Geist/ der in Christo vnnnd in vns wonet / als der glieder mit ihrem haupt ist/ sie sind gleich im himel oder auff erden/ vnd sel vñ orts halben dem leib Christi nahend oder fern / Item / mit dem rechten Gottes dienst/ welcher nit kan leiden/ daß Christus inn dem brot werde angebetet / oder vergebung der sünden von Gott begeret/ vmb desselben willen/ das inn diesem brot/ in vnser hand vnd mund sey/ Welches aber folgen müste/ da Christus leiblich in dem brot were/ Item/ Mit der art vnd einsetzung dieses vnd aller Sacrament / welche Gott/ keine andere gemeinschafft Christi vnnnd aller seiner guter vns zuleren/ zuuersichern vnd mitzuthailen/ hat verordnet/ denn die er vns in der predig des Euangelij verheisset/ vnnnd durch waren glauben widerfaren leßt/ Item/ Mit der erklärung Christi vnd seiner Apostel/ daß wir nemlich diß brot sollen niessen zum gedächtnis des Herren/ biß er widerkomt/ Item/ daß es sey das Newe Testament vnnnd die gemeinschafft des leibs vnd bluts Christi/ Welches alles vñ keinem leiblichen essen vnd trincken kan verstanden werdē/ Vñ endlich auch/ mit des gegenteils eignen glosß vnd deutung / daß in oder bey dem brot der leib Christi sey. Derhalben dieser beweiß nicht gesten kan/ es sind denn jetzt gemelte vnd andere gründe

Von den Worten der einsetzung

Gründe zuuor widerleget / Welches noch nie geschehen / auch nicht geschehen wird.

Bericht.

Wir sollen vns aber hie ernstlich gesagt sein lassen / vnd wissen / daß man von den Worten der S. Schrifft ganz vnd garnicht darff abweichen / wo kein andere vrsach ist / dann daß sie der menschliche vernunft vngereimt scheinen. Item / daß auch niemand macht habe von Gott vnd Gottes sachen / deutung vnd meinung / nach seinem eigenen kopff vnd gutem duncken zuerdichten / sondern jederman muß also von Gott halten / vnd reden / wie er sich in seinem heiligen wort selber hat offenbaret. Item / daß auch dz Gottes endlicher ernstlicher will sey / welchen er vns in seinem heiligen wort bezeuget.

Erklärung.

Obgedachte vrsachen sind nicht auß menschlicher vernunft sonder auß Gottes wort genommen / Dargegen aber des gegentheils meinung mit keinem buchstaben inn der Schrifft gegründet ist / Vnd streitet derhalben nicht allein mit der vernunft / sonder mit Gottes wort / welches nicht von einem ding / ja vnd nein / schwarz vnd weiß redt / vnd glauben heist.

Bericht.

Die andere / In den Prophetischen vnd Apostolischen Büchern / stehet die höchste vorgewisserung vñ bekräftigung einer rechten lehr / in dem / daß man achtung geb / ob vnd wie der Propheten vnd Apostel zeugniß vnd spruch daselbst vñ einhelliglich übereinstimmen. Nun haben ja drey Euangelisten / Mattheus / Marcus / vnd S. Lucas / samt dem Apostel Paulo also eintrechtlich von des Herren Nachmal geschriben / als wenn sie sich zu solchem vntereinander mit einem eid

verpflichtet hetten. Daß aber die Sacramentirer sich sehr bemühen/zubeweisen / daß die Euangelisten nicht einhellig zusammen treffen / bedarff gar keiner antwort / sintemal jederman bewust / daß ein mechtiger vnterscheid vnter dem ist / ob nur einerley meinung mit ein wenig geenderten worten deutlich werde fürbrachte / oder ob mit den worten der verstand bey den Euangelisten zugleich werdegeendert.

Erklärung.

Diese einhelligkeit der Euangelisten vnd Apostel / bestättiget nicht die leiblich / sonder die geistlich niessung Christi. Dean erstlich ist hierauff zuuor geantwortet / daß die Euangelisten vnd Apostel wol mit einander stimmen / Ir keiner aber stimmet mit dieser meinung / daß der leib Christi in dem brot sey. Vnd verstehet jederman / daß nit folget / Diese oder jene wort sind offte in der Schrifft widerholet / darumb müssen sie den verstand haben den jnen die menschen geben. Mattheus vnd Marcus sagen einhelliglich von augen außrecken / vnd hend vnd füß abhawen / die vns ergern / Item / die Schrifft sagt an vielen orten einhelliglich von henden / füßen / ohren / augen / mund Gottes / &c. Folget aber darumb nicht / daß solches nach dem buchstab zruersehen sey. Zum andern / Weil das gegentheil mit samt vnns bekennet / daß die wort der Euangelisten vnd Apostel vom Nachtmal einerley verstand vnnnd meinung haben / So ist gewiß vnnnd offenbar / so jren einer oder mehr / mit seinen worten den geistlichen verstand gibt / vnd den leiblichen oder buchstabischen außschleußt / daß auch die andern all gleicher weise müssen verstanden werden. Nun ist aber gewiß / daß die wort S. Lucas vnd S. Paulus vom kelch keines wegs nach dem buchstaben oder vnnn einem leiblichen trincken des bluts Christi

Von den Worten der einsetzung

sich lassen verstandē. Deñ sie die wort Christi also sezt/ Dieser Kelch ist das neue Testament in meine blut/ welches für euch vergossen wird. Das neue Testament aber/ wie alle Christen wissen vnd bekennen / ist keine leibliche niessung Christi vnd seines bluts / sonder die einige vnd ewige verheissung vñ gnaden Gottes/ vergebung der sünden vñ ewiges lebens durch Christum/ welcher nicht alle/ auch nicht allein die zum Nachtmal gehen/ sonder allein alle vnd jede auß der welt von anbegin der welt bis zum end können vnd müssen teilhafftig werden durch waren glauben an Christum / Wie die ganze H. Schrift manigfaltig leret/ vnd Christus selbst allhie/ da er sagt / Dies ist das neue Testament / oder der neue bund zwischen Gott vñ den menschen (denn Testament vñ Bund nach art der sprachen allhie ein ding ist / wie auch das gegentheil bekennet) In meinem blut/ Das ist/ welcher bund gemacht wird durch mein blut oder von wegē meines bluts/ Vñ sezt nicht darzu/ das leiblich getruncken wird/ sond das für euch vergossen wird/ zur vergebung der sünden. Auß diesem ist erstlich klar / das das Abendmal nit ein leiblich sonder ein geistlich trincken des bluts Christi ist / weil es dz neue Testament ist/ vñ aber dz neue Testamēt kein leibliche / sond allein die geistliche niessung desselbē durch dē glaubē begreiffet vñ verheisset/ wie jesūd ist erkläret. Darauf deñ auch ein jedermā verstandet/ dz auch kein leibliche niessung des fleisches Christi im Abendmal wird geleret noch verheissen/ dieweil sein fleisch nit anders im Abendmal geessen / deñ sein blut getruncken wird. Zum andern ist offenbar / dz diese wort nicht nach laut des buchstabes/ sond Sacramentsweise können vñ müssen verstandē werde / wie jederzeit alle Rechtlerende in dē Christliche kirchē vñ drobē dieser Scribēt samt jñē auß zwäg der

der warheit bekät. Den je dieser kelch/dz ist/diser eufferliche/
 leibliche sichtbare tranck nit das newe Testament od bund so
 durch das blut Christi gemacht/selbest/ sonder ein sichtbares
 pfand vnnnd warzeichen desselben ist / damit Christus seinen
 gläubige bezeuget/dz sie warhafftig dieses newē vñ ewigē Te-
 staments teilhaftig/od mit seinē blut zū ewigen leben getrenckt
 werde/dz ist/vñ seines blutvergiessens willē durch jren glau-
 ben vergebūg jrer sünde/ H. Geist vñ ewiges leben bekommen.
 Dēßgleichen ist auch gewis/wie obgemeldet/ dz die wort S.
 Pauli 1. Cor. 10. Das brot das wir brechen/ vnd der kelch der
 danck sagung/damit wir danck sagē/ist die gemeinschafft des
 leibs vñ bluts Christi/kein andere den ein geistliche niessung
 des leibs vnd bluts Christi im Abendmal sehen. Denn er nie
 sagt/das es ein leibliche niessung /sonder die gemeinschafft
 des leibs vnd bluts Christi sey. Diese gemeinschafft aber ist/
 das wir durch den H. Geist der in Christo vñ in vns wonet/
 dem waren leib Christi/als die glieder jrem haupt werden ein-
 geleibet vnd vereiniget / vñ vmb seines für vns vergossenen
 bluts willen vergebung vnserer sünden haben. Dis beweisen
 die wort Pauli an diesem ort selbest/dieweil er von einer sol-
 chen gemeinschafft redet/dadurch wir ein leib werden/ vnnnd
 die nit bestehen kan neben der gemeinschafft der teuffel. Den
 er also spricht / Das darumb das brot die gemeinschafft des
 leibs Christi sey / das wir viel / nēlich die gläubige/vnter die
 sich v Apostel zelet/ein brot vnd ein leib werden/welches ge-
 schichte so wir glieder Christi werden/ Item/ Ich wil nit/das
 jr in der teuffel gemeinschafft seit / jr könnt nit des Herze kelch
 trincken vnnnd der teuffel kelch / jhr könnt nicht des Herren
 tisches teilhaftig sein vñ v teuffeln tisches / Damit er leret/
 das sich die jenigē so sich in der teuffel gemeinschafft begebē/
 F ij darinnen

Von den Worten der einsetzung

darinnen denn alle vnglaubige vnd heuchler sind/ dieser gemeinschafft Christi/ dauon er redet/ vnd dero wir im Abendmal theilhaftig vnd versichert werden/ sich berauben. Derhalben je diese gemeinschafft allein die glaubigen angehet/ vnnnd allein durch waren glauben geschicht. Auch wird diese gemeinschafft Christi gleicher weise erkläret an andern orten der Schrift/ Als 1. Johan. 1/ Das wir gesehen vnd gehört haben/ das verkünden wir euch/ auff das auch ihr gemeinschafft mit vns habet/ vnd vnser gemeinschafft sey mit dem Vater vnnnd seinem Sohn Jesu Christo. Item/ So wir sagen/ das wir gemeinschafft mit jm haben/ vnnnd wandeln in finsterniß/ so liegen wir/ vnd handeln nicht auffrichtig/ So wir aber im liecht wandeln/ wie er im liecht ist/ so haben wir gemeinschafft mit einander/ vnnnd das blut Jesu Christi seines Sohns reiniget vns von allen sünden. Vnnnd gedencket die H. Schrift keiner andern denn der geistlichen gemeinschafft. Derhalben lassen sich diese wort Pauli auch mit von einer leiblichen niessung/ oder nach dem buchstaben/ sonder allein von der geistlichen niessung Christi vnd Sacraments weise verstehen. Denn das brot vnd der kelch keines wegs diese gemeinschafft Christi selbst/ sondern ein Sacrament/ warzeichen/ pfand/ sigil/ vnd zeugniß der selben ist/ vnd ein eufferliches mittel vnd werckzeug/ dadurch vns dieselbe widerferet/ Dieweil durch das Sacramēt/ das ist/ das eufferliche/ sichtbare warzeichen so an die verheissung der gnaden Gottes vnd vergebung der sünden angehengt ist/ wie durch das wort/ der H. Geist vnseren herzen zum glauben reisset vñ beweget/ durch welchen glauben wir als dann zu dieser gemeinschafft Christi komen/ Wie auch Paulus die niessung dieses brots nicht als die gemeinschafft Christi selbst/ sonder

der als ein zeugniß vñnd mittel derselben anzeucht / da er spricht/ Wir viel sind ein brot vñnd ein leib/ dieweil wir alle von einem brot essen. Damit er auch erkläret vñnd vrsach an zeigt / warumb er das brot die gemeinschafft Christi selbest neñt/ Nemblich das vñns diese gemeinschafft durch die nieszung dieses brots angeboten / gegeben/ bestättiget vñnd gemehret wird. Weil denn nun gemelte wort S. Lucas vñnd S. Pauls keinen andern denn den geistlichen verstand können leiden / vñnd aber dieselben one allen zweuel auch nach dieses Scribenten bekentniß vñd streitung ganz vñnd gar stimmen mit der meinung dieser wort/ Das ist mein leib/ der für euch gegeben oder gebrochen wird/ Das ist mein blut des neuen Testaments / das für euch vergossen wird / So folget augenscheinlich / daß dieser Consens der Euangelisten vñd Apostel/ darauff das gegenheil so lang vñnd viel gepochet/ am heffigsten wider sie ist/ vñd vnser lehr vñnd bekentniß/ vñd die Alte vñd einfaltige erklärang der wort/ das ist mein leib/ bestättiget.

Bericht.

Die dritte/ Gewiß ist es das nicht das brot/ sondern Christi warer leib/ für vns gegeben ist / Dieweil dan Christus seine Jünger heist mündlich dasjenige empfahen/ das für vns gegeben ist/ so folget ja/ daß in dem Abendmal nicht nur brot/ sondern Christi warer leib/ dargereicht vñd entpfangen werde.

Erklärung.

Auff diesen beweiß ist erslich die antwort / Wenn er gleich könde bestehen / so würde er doch nur das mündliche essen des leibs Christi beweisen/ Aber nit/ daß die wort/ Das ist mein leib/ zuuerstehen sind wie sie lauten / Welches zu

Von den Worten der einsetzung

beweisen Mr. Sel. im hat fürgenomē. Denn daß der leib Christi mündlich geessen werde/vñ daß das brot der selbe leib sey/ ist nit einerley rede / weñ es nach laut d' wort verstandt wird. Zum andern / Sekt er menschen wort / an stadt des worts Christi. Denn die Euangelisten schreiben wol / daß Christus seine Jünger / das brot / das er in die hand genommen / gebrochen / vñnd gereicht / mit dem mund habe heissen essen. Daß er aber seinen für vns gegebenen leib / in die hand genommen / vñnd mündlich zuessen befohlen hab / melden sie mit keinem wort. So aber das gegentheil solches daher wil beweisen / daß er das brot / welches mit dem leiblichē munde wird geessen / seinen leib hat genennt / So nemen sie zum beweiß eben dasselbe darumb die frage ist / vñnd das ihnen zubeweisen stehet / nemlich / daß dieses brot der leib Christi selbs sey / oder denselben leiblich inn oder bey sich habe. Welches dieweil es noch nie bewiesen / dieser beweiß / eben wie die vorgehenden / schlaffen gehet.

Bericht.

Die vierdte / Die so vnwürdig zum tisch des Herren gehen / berühren vñnd beleidigen stracks / on mittel den Heiligen leichnam Christi selbst /

Erklärung.

Daß die würdigen oder vnwürdigen im H. Abendmal den leib Christi berühren / stehet in Gottes wort niergend geschrieben / viel weniger daß er nach dem eingang inn seine herligkeit / von jemanden könne beleidiget werden. Derhalben auch dieser beweiß auff einem vngelegten grund stehet. Vñnd diß alles / wie sie dieser Scribent selber nennet / freilich kindische beweisungen sind / welche mit der stim vñnd klaren

klaren worten Christi / vnnnd dem zeugniß Gottes / gar nicht vberlein kommen / sonder die klare lere der Schrifft vom heiligen Abendmal / mit frembden vngereimten gedichten verdunckeln.

Bericht.

Vnnnd üben gewalt am leib vnnnd blut Christi / wie Cyprianus redet inn der fünfften predigt von denen so im sünd gefallen.

Erklärung.

Diß gewalt üben geschicht auff zweyerley weise / Erstlich an de brot / durch mißbrauch des Sacramēts / welchs Sacramēts weise der leib Christi ist vñ heisset / wie Cyprian. leret / in sermone de chrymate. Darnach auch an dem leib Christi selbst / durch verachtung d' angebottenē gab in diesem Sacrament / nicht durch leibliches berühren oder essen. Denn auch in mißbrauch des Tauffs / vnnnd in aller verachtung der angebottenen gnad Gottes / das blut Christi geschmähēt wird / wie die Epistel zun Hebreern am zehenden capitel sagt / Wenn jemand das gesetß Mosis bricht / der muß sterben one barmherzigkeit / durch zwene oder drey zeugen / Wie viel / meinet jr / erger straff wird der verdienen / der den Sohn Gottes mit füßen tritt / vnd das blut des Testamēts vnrein achtet / durch welches er geheiligt ist / vnd den Geist der genaden schmähēt. Item am 6. capitel / daß die jenigen / so die warheit erkennen / vnnnd doch dieselbe mit warem beständigen glauben nicht annemen / sonder dauon abfallen vnd sie verleugnen / den Sohn Gottes auffo new creuzigen vnd für spot halten. Vnd ist dannoch darauff kein leiblich berühren des leibs vnnnd bluts Christi zuschließen.

Bericht.

Von den Worten der einsetzung Bericht.

Derhalben empfahen die vnwürdigen nicht allein die Ement brot vnnnd wein/sondern warhafftig den leib vnnnd blut Christi/Doch von den vnwürdigen/ vnd was sie empfahen/wollen wir hernach weiter hören. In diesem wenigen vnnnd kindischen beweisungen vnd Argumenten/wollen wir vns vff dißmal lassen genügen / dann dadurch wird ja warhafftiglich dargethan vnd bekrefftiget/das man von dem einfeltigen vnd natürlichen/eigentlichen verstand/ welchen die wort selbest dargeben / mitnichten solle abweichen/ wie dann dieses alles hernacher/auch auß den Worten des Apostels Pauli/basß wird erkläret werden. Es ist aber on not/dasß man den Läser allhie mit mehr Argumenten beschwere / Dannes war ist/wie im alten sprichwort vnnnd den geleerten gesagt / Eine gute sach bedarff nur dreier wort. Endlich/nach dem vnser Heiläd/der Son Gottes/seine liebe kirch vom 3. Abendmal mit klaren außdrücklichen Worten genugsam hat vnterwiesen/gebühret vns fürwar/dasß wir sein wort annemen vnd beherzigen/wie er spricht / Johan. 10. Meine schaf hören meine stimme. Vnd 1. Johan. 5. So wir der menschen zeugniß annemen/ist Gottes zeugniß ja grösser. Item Luce am eilfften capitel. Wer nicht mit mir ist/der zerstreuet.

Erklärung.

Dasß die Gottlosen den leib Christi essen/hat vns Christus mit seiner stim vnd zeugniß nie geleeret. Folget auch diß auß keinem ort der Schrifft. Denn Paulus sagt nicht/dasß man schuldig werde an dem leib Christi/mit vnwürdigem essen des leibes/sonder des brots/ Dieweil damit der leib Christi selbst verschmähet vnd verunehret wird/wie auch alle seine himlische schätze/durch verachtung vñ mißbrauch seines worts vnd ander Sacrament/ebē so wol als des Abēdmals. Bericht.

Bericht.

Das vj. Capitel/

Was es für ein red oder proposition sey/
so man spricht / Das brot ist Christi leib/
vnnnd der wein ist Christi
blut.

Nach dem nun der eigentliche natürliche verstand der wort
Christi angezeigt ist / pfleget man weiter zufragē / ob
man auch recht vnd wol rede / so man sagt / Das brot ist
Christ warer leib / vnd der wein ist Christi waeres blut:

Erklärung.

Sacramentsweise / wie auch Christus geredt hat / ist
es nicht vnrecht geredt. Denn Christus hat je einen waren
menschlichen leib / derhalben dieses brot Sacramentsweise
der selbe ware leib / das ist / ein Sacrament vnnnd warzeichen
des waren für vns gegebenen leibs Christi ist. So man es
aber nach laut der wort verstehen wolte / Das nemlich diß
brot wesentlich der ware natürliche leib Christi selbst sey / we
re solches wider die meinung vnnnd erklärung Christi / wider
alle Schrifft vnd grund des Christlichen glaubens / vnd wi
der des gegenteils eigene lere vnnnd bekentniß / welches nicht
wil / daß das brot selbst der leib sey / sonder daß der leib in dem
brot sey.

Bericht.

Darauff ist dieses einseltiglich die gründlichste antwort/
Es ist kein bessere form oder weiß von diesem geheimniß zure
den / dann die der Son Gottes selbst hat gebrauchet / da er sein
Abendmal geordnet / vnnnd die nach jm die 3. Aposteln / da sie
G diese

Von den Worten der einsetzung

diese lehr vom heiligen Nachmal widerholen/ einmütiglich brauchen. Dieser grund ist so fest/ daß in auch kein teuffel kan vmstossen.

Erklärung.

Diesen grund vmzustossen ist vnser fürnemen nie gewesen. Das gegenteil solte aber bedencken/ daß nicht sie/ sonder wir auff demselben stehen. Denn darauff folget Erstlich/ daß diese form oder weise zureden/ diß brot vnd wein sol zum gedächtnis des für vnns getödteten leibs vnnd vergossenen bluts Christi genossen werden/ biß er komt/ eben so gut vnnd recht sey/ als jene/ das brot vnd der wein ist der leib vnd blut Christi/ dieweil Christus vnnd seine Apostel/ eine so wol als die ander gebraucht haben. Vñ zum andern folget auch/ daß diese formen zureden/ Das brot ist wesentlich vnd nach dem natürlichen laut vnd verstand der wort/ der ware leib Christi selbst/ Item/ inn oder vnter/ oder bey dem brot ist wesentlich der ware leib Christi vn sichtbar vnnd verborzen/ weder gut noch recht/ vnd derhalbē in der kirchē keines wegs zugebrauchen sind/ weil sie nicht allein von Christo vnd den Aposteln niergend gebraucht/ sonder auch der ob gemelten erklärungs Christi/ vnd der ganzen lere von Christo/ vnnd von den h. Sacramenten/ zuwider sind. Derhalbē wir diese form der wort Christi/ das brot ist der leib Christi/ nit allein brauchen vnd zubrauchen gesinnet sind/ sonder auch auff die ursach sehen vnd dringen/ vmb dero willen Christus vñ der h. Geist von anbegin/ von allen Sacramenten also geredt hat/ nemlich vmb vnser lere vnd trost willen/ daß wir nicht allein solten wissen/ wz Gott mit diesen sichtbare zeichen meiner/ sonder auch gewiß sein/ daß wir der vn sichtbaren gaben/ ebē so warhafftig/ als der sichtbaren zeichen/ teilhafftig werden.

Bericht.

Bericht.

Und sagt ja Christus / als er ihnen das brot reichet / das /
das ich euch gebe / vnd jr nemet / ist mein leib /

Erklärung.

Er setzt aber nit darzu / wie das gegenteil / wesentlich / ei-
gentlich / vnd nach dem buchstaben / laut / vnnatürlichen
verstand der wort / 2c. Setzet auch nicht diese auslegung / inn
oder vnter / oder bey dem brot / ist wesentlich mein warer leib /
2c. Sonder spricht also / diß thut / das ist / diß brot brechet vnd
esset / zu meinem gedächtniß.

Bericht.

Vnd Paulus sagt / das brot / welches wir im Abendmal
brechen / ist die gemeinschafft / ausspendung / oder aufsteilüg
des leibs Christi.

Erklärung.

Die gemeinschafft des leibs vnd bluts Christi / leßt Paulus
auff kein leibliche ausspendung oder aufsteilung / oder
nießung deuten / Denn er redt vonn einer solchen gemein-
schafft / welche die Glaubigen / vnter die er selbst sich zelet / an-
gehet / vns zu gliedern eines leibs in Christo macht / vnd mit
der teuffel gemeinschafft nicht mag bestehen. Das brot aber
oder die nießung des brots / ist nicht diese gemeinschafft Chri-
sti selbst / Sonder ein zeugniß vnd mittel derselben / dafür sie
denn Paulus daselbst anzeucht.

Bericht.

Derhalben ist vnleugbar / daß man die weise zure-
den / welche der Sohn Gottes gebrauchet / vor allen andern
auch brauchen vn handhaben solle. Dieselbige lautet nun also /

Von den Worten der einsetzung

Das ist mein leib / *rc.* Was meinet aber der Herr mit dem wörlein Das? Er deutet warlich nicht auff seinen leib / sonder auff das brot / darvon zuvor geredt ist. Denn auch die junge knaben inn der schul mercken können / daß an diesem ort das wörlein / Das / materialiter / das ist / für sich selbst allein vom einem gewissen wesen muß verstanden werden / Als wenn ich frage / Was ist das? Antwort man / Es ist ein liecht / ein tisch / ein haufen / ein kante / vñnd dergleichen. Daher sagt man darnach recht / das ist ein liecht / das ist ein tisch / *rc.* Da diß wörlein / Das / auff die materij zeigt. Als da Adam von Eua sagt / Das / nemlich dz weib / ist ein bein von meine beine / Eben also redet hie d̄ Son Gottes auch / da er das brot nimmet / bricht / d̄ J̄m gern dargibt / vñ spricht / Das ist mein leib. Das / verstehe / diß brot ist mein leib / dz / dz ich auch gebe / Er gibt in̄ aber dz brot / So ist ja dz brot Christi warer leib. Wer nun diese proposition vñnd form zureden verwirfft / er verblüme es wie er wil / so verwirfft er doch warlich / so mans am liecht besihet / des Herrn Christi selbs eigne wort / die er in seinem Abendmal brauchet.

Erklärung.

Daß Christus mit dem wörlein / Das / habe das sichtbare brot gemeint / vñnd dasselbe seinen für vnns gegebenen leib genennt / darff man gegen vns nicht so hefftig streitten / Denn wir solches one das bekennen / mit dem text der Euan gelisten / der solches klärlich gibt / mit Paulo / vñ mit alle alten vñnd newen rechten Christlichen Lerern / vñnd auch mit dem gegentheil / Vñ lassen vns auch dieses nit nemen von etlichen andern / die ein wenig bas sehen / wo die sach hin auß wil / denn M. Selnecker / Vñ darumb sekund gern zurüel ziehen / vñ auß dem wörlein / Das / den vn sichtbaren leib im brot machē wolte. Er solte aber gemerckt habē / daß er nit wid vns sond wid sich selbst alhie disputirt. Den̄ eben auß diesem / Das

Daß Christus das sichtbare natürliche brot / denselben seinen waren / menschlichen / fleischenen vnd beinenen leib hat genannt / der für vnns gegeben ist / folget vnwidersprechlich / daß er solche rede nicht schlecht vnd stracks nach dem buchstaben vnd laut der wort wolle verstanden haben / Wir wollen den sagen / daß entweder der leib Christi bröten / oder dieses brot fleischern vnd beinern / vnnnd von Maria entfangen / für vns gecreuziget / gestorben / auffgestanden vnd genhimmel gefaren were / Welches alles lesterliche vnd schreckliche gedanken weren. Darauß zuerachten wie vnbedächtigt von ihm solche wort außgeschüttet / daß diese rede / das brot ist der leib Christi / diesen reden gleich sey / da man ein liecht / ein tisch / ein hasen / ein kanten zeiget / vnnnd spricht / Daß ist ein liecht / ein tisch / ein hasen / ein kanten / Item / das / nemlich / die Eua / ist ein bein von meinem gebein. Denn was ist dieses anders geredt / denn daß die substanz des brots / die substanz des leibs Christi sey? Welches ein gewel zu hören ist / vnnnd von dem gegentheil selbst nicht vnbillich verworffen wird.

Bericht.

Sie sagen aber die Sacramentirer / Christus hat nicht gesagt / Das brot ist mein leib / der wein ist mein blut / Antwort / die sich dieser einrede behelffen / sind entweder noch vnmündige kinder / vnnnd haben nicht reden gelernet / oder wollen sich vermessenlich darfür außgeben / das sie besser reden können / dann der Sohn Gottes selbst / welcher also spricht / *Tuto est to som amu. Hoc est corpus meum.* Das ist mein leib. Lieber war auff gehet das *Tuto. Hoc. Das.* Da antworten die Sacramentirer / auff den leib / Dann das / vnd leib reimen sich fein zusamen / so viel das Genus in Griechischer vnd Lateinischer sprach antrifft / wie der arme grammaticus Carolo statt sagte / vnd werden nun /

Von den Worten der einsetzung

nach dieses neuen Schulmeisters meinung / die wort Christi
also müssen auff einander gehen / *Tuto soma mu esti, Hoc corpus meū
est.* Der leib ist mein / Soll derhalben forthin niemants sagen /
Hoc est corpus meum. Das ist mein leib. Dann die Teutsche sprach
leidet nicht / daß man sage / das leib.

Erklärung.

Das wir mit Carlstads vngeschickter glos vnd gram
matick / werden beschweret / ist freilich ein los vnnütz ge
schwetz / vnd nicht werd das man darauff antworthe / Denn
Selnecker wol weiß / daß wir mit dieser glos nichts zuthun
haben. Dargegen aber sind nicht wir / wie wir durch das
wörtlein / Das / nichts anders denn das sichtbare brot ver
stehen / Sonder die jenigen des Carlstads deutung nahend
verwand / die das wörtlein / Das / von dem brot / auff den
vn sichtbaren leib im brot sich vnter stehen zuziehen / damit
sie mit einem schein bey dem laut der wort möchten bleiben /
Gleich wie es Carlstad vō dem brot auff den sichtbaren / am
tisch sitzenden leib Christi ziehen wolte.

Bericht.

Aber solch los / vnnütz geschwetz / ist nicht wert daß
man auch die geringste zeit darmit zubringe. Es können ja al
le menschen bald sehen / nicht allein die hierin guten verstand
haben / sonder auch andere die nur reden können / daß diese re
den gleich viel gelten / vnd ein meinung haben / da Christus
spricht / Das ist mein leib / vnd da wir sagen / das brot ist Chri
sti leib. Also auch / das ist mein blut / vnd der wein ist Christi
blut / warum? Daß es ist je offenbar / daß das wörtlein / Das /
ein materj / oder Element bedeutet / nemlich das brot. Wolte
aber jemand sagen / diese reden seind nicht gleich oder einer
ley /

ley / der mußte auch dessen grund vnd vrsach darthun / welches nie keiner hat thun können / oder forthin thun wird. Dann lieber / was mag doch hie für ein vnterscheid sein zwischen dem wörtlein / brot / vnd dem wörtlein / Das? Er spricht / das ist mein leib / was ist aber dasselbige das? Es ist je warlich das brot / welches er darreichet / vnd von welchem er sagt / das ist mein leib. Aber hie schreien die Sacramentirer sewris vnd zeter in allen gassen / ja was ist das anderst / dann die Papistische Transsubstantiation? Wolan darauff geben wir in zweyerley antwort / Erstlich mögen sie dem Herzen Christo einen strich durch seine wort machen vnd sie aufleschen / gelüftet sie es anders / vnd mit demselbigen sich hadern / biß sie wol müd werden. Dann dieweil er also geredet / wie sol es dann vns ein schand sein / eben seine H. wort zubehalten vnd auch zubrauchen.

Erklärung.

Wir begeren dem Herren Christo keinen strich durch seine worte zumachen / schämen vnns auch derselben gar nicht. Wir wollen aber auch denselben keinen zusatz geben / das nemlich das brot wesentlich / vnd nach dem buchstaben / vnd laut der wort / sein warer leib selbst sey / Auch keine frembde vnd mit seiner eigenen erklärung / vnd der gangen Schrifft streittende glosß darüber machen / das nemlich in oder bey dem brot sein leib verborzen sey. Denn die wort Christi machen freilich keine Transsubstantiation / dieweil er selbst erkläret / wie das brot sein leib sey / Nemlich wie ein gedächtniß das jenige ist / daran es vnns erinnern soll. Damit aber ist diese rede des gegenteils / das brot sey eigentlich vñ nach dem laut d wort / d ware leib Christi selbst / d
Transsub-

Von den Worten der einsetzung

Transsubstantiation nicht entlossen. Denn zwischen dieser vnd des Herrn Christi rede/ein grosser vnterscheid ist.

Vericht.

Zum andern/so wirt hie mit nichtē die Transsubstantiation zugelassen/ Dañ jedermā bewusst ist /dz man nach angebotener rechter art aller sprachē/also pfleget zuredē/dz mā dz jenige welches mā vbergibt/ vñ welchs in d̄ hādlung dz fürnemste ist/in d̄ rede auch fürnemlich nennt/ob es schon in einem andern begriffen. Als wann man spricht/Der becher ist aufgetruncken/so man doch den wein meinet / Oder so man sagt / Man gebe einem den wein/so man jm doch die kanten mit dem wein gibt/vnd wird weder die kanten in den wein/ noch der wein inn die substanz der kanten verwandelt. Diese rechte antwort kan jederman wol verstehen.

Erklärung.

Diese antwort stößet das jenige selbst vmb / das man damit zuerantworten vnd zuerhalten meinet/ Denn ist das brot also der leib Christi / wie der becher oder die kanten der wein/ So ist es nit also der leib / wie Eua das bein / oder wie das liecht/hafen/tisch/kantē/ zc. darauff gezeiget wird / ein liecht/hafen/tisch oder kanten ist/ Diweil selber etwas sein/vnd etwas in oder bey sich haben/nimmermehr ein ding/rede/oder meinung ist/vnd wenn eins für das ander wird genommen/in gemeinem brauch zureden/niemand so vnbescheiden ist/der solches stracks nach dem laut der wort verstände/ob gleich die meinung solcher rede ein jeder leichtlich versteht.

Vericht.

Aber die Sacramentirer sind vortheilhaffige leut / das erste stück das wir men vorhalten/das Gottes Son selbst also ge-

so geredt / wissen sie sein artig zuüberhupffen / vnd erzwakeⁿ
 nur das andere stück / darvon jetzt gemeldet / rüffen vberlaut /
 ihr behaltet doch auch nicht die einfältige bedeutung vnnnd ei-
 genschafft der wort Christi / sonder macht ein figur darauß /
 welche synecdoche heisset. Wöllen derhalben von dieser figur sy-
 necdoche auch kurzen bericht thun.

Erklärung.

Die wort Christi / da er das brot seinen leib nennet / zu-
 überhupffen / sind wir nicht gesinnet / sonder viel mehr diesel-
 ben dem gegenheil vnter die augen zuhalten / vnd sie damit
 zuüberzeugen / daß sie bissher one allen grund den leuten mit
 diesem geschrey / die ohren gefüllet haben / sie bleiben bey dem
 einfältigen laut der wort Christi / So sie doch dieses weder
 thun / noch thun können.

Bericht.

Das vij. Capitel /

Von der figur Synecdoche.

Gestlich muß man hie zweyerley fragen wol vnterschei-
 den / vnnnd wissen / daß es ein anders ist / so man in einerley
 red oder proposition von einem jeden wort in sonderheit
 fraget / ob es in seinem natürlichen / oder inn einem fremb-
 den verstand / gleichnißweiß gesezet sey / vnd aber einanders /
 so man von einer ganzen red fraget / was nemlich für ein form
 zureden gebrauchet werde in den geheimnissen Gottes /

Erklärung

Es sey gleich die frag von einem wort inn sonderheit /
 oder vonn der ganzen rede oder proposition / Ob sie stracks
 wie sie lauter / oder anders zuuerstehen sey / So ist doch ge-
 nug /

Von den Worten der einsetzung

wug/das wir dieses erhalten/vnnd auch das gegenheil ont
dancck bekennen muß / Man könne vnd müße nicht bey die-
sem verstand bleiben/welchen diese rede/ Das brot ist der leib
Christi/wie sie an jr selbst/vnd nach dem buch staben lauter/
vñ vergeblicher behelff vnd auffsucht / wider die öffentliche
vnwidersprechliche warheit.

Vericht.

Welchenicht natürlicher / sonder vbernatürlicher weiß
zugehen.

Erklärung.

Die ganze lere des Euangelij ist vbernatürlich/ Das ist/
der Natur vnd vernunft vnbekant. Nicht desto minder aber
hat sie Gott vmb vnser schwachheit willen/ mit vnsern wort-
ten vns lassen fürschreiben/vñ von den vbernatürlichen din-
gen/solche wort vñ weise zureden gebraucht/ die auch in den
natürlichen dingen gebreuchlich sind. Vnnd sind derhalben
in Gottes sachen vnnd wort/eben so wol als in natürlichen
vnd menschlichen sachen vnd Worten / etliche reden schlecht
wie sie lauten/ etliche aber anders denn sie an jnen selbst lau-
ten / zuuerstehen / welche vmb gewisser vrsachen willen ge-
braucht / vnd nach andern orten der Schrift/ vnd nach an-
deren dingen daruon sie reden/ sollen verstanden vñ erklärt
werden. Also ob gleich die nießung brots vñ weins/vns kein
Sacrament oder warzeichen Göttlicher genaden sein könn-
de/so es Gott nit sonderlich vnd außser der natürlichen ord-
nung vnd verstand/also geordnet/vnd durch sein wort/vns
solche seine ordnung offenbaret hette / So redt er doch vmb
vnser trosts willen von diesem vnd andern Sacramenten/
wie sonst von zeichen vnd warzeichen zureden gebreuchlich ist.
Folget

Folget derhalbē keines wegs / D̄ in d̄ Schrift alle worte od̄ redē zuuerstehē sind / wie sie nach dē buch staben lautē / daruff̄ d̄ sie von Göttlichen vñ vbernatürliche d̄ingen redē. So diß jemand leugnet / der redt so öffentlich wider alle bekante warheit / daß er billich keiner antwort werd̄ ist. Wollen jehund geſchweigen / daß vnter dem deckel der vbernatürliche geheimnis Gottes / das erdichte mirakel der leiblichen gegenwert Christi inn dem brot / bezgeschoben wird / vonn welchem die Schrifft kein wort nicht meldet.

Bericht.

Zum exempel / wen man spricht / Dieser mensch Christus ist Gott. Sie entstehen zwo vnterscheidliche frage / die erste / von einem jeden wötlein inn sonderheit / vñnd ist hie ja war / daß diese beide wort / Mensch vñnd Gott / ohn alle frembde deut̄ig oder Tropum in ihrem eigentlichen vñnd natürlichen verstand gebrauch̄ werden. Die andere Frage ist / was diese ganze proposition / für ein art zureden sey. Dieselbige haben etliche gelehrten / ein vngewöhnliche art oder weiß zureden genennet. Lutherus hat es genennet *synecdochen* / darumb dieweil diese zwo wort / Mensch vñnd Gott / zwo vnterschiedliche naturen / die Gottheit vñnd die Menschheit in einer einzigen person vereinigt / anzeigen. Also sind auch hie zwo vnterschiedene fragen / so man sagt / das brot ist Christi leib / die eine von einem jeden wötlein inn sonderheit / die andere / was es für ein art zureden sey. So viel die einzige wötlein für sich selbs belanget / ist hie kein figur / oder verborgener heimlicher verstand / sonder man muß bey dem natürlichen eigentlichen verstand der wort / brot / vñnd leib / einseitiglich bleiben. Was aber die ganze weiß zureden / oder die predication betriß / habens etliche ein vngewöhnliche art zureden / oder predica-

tionem inusitatam genennet.

S ij

Erklärung.

Von den Worten der einsetzung

Erklärung.

Es hat Philippus Melanchthon seliger vnd würdiger gedächtnis/ vngebreuchliche/ oder vngewöhnliche weisen zu reden genennt/ dieselben reden/ die von Christo allein gebraucht werden/ Als Gott ist mensch/ Das wort ist fleisch worden/ Dieser mensch ist Gott/ &c. Damit anzuzeigen/ daß also von der person Christi geredet wird/ von wegen der sonderlichen vnd wunderbaren vereinigung der Gottheit vnd menschheit in Christo/ Dergleichen exempel vnd reden in andern dingen nicht zu finden sind. Dis haben sekund etliche newe Theologen ergriffen/ vnd auff die art von Sacramenten zureden/ ganz vnbescheidenlich/ vnd wider Philippi vñ aller alten Scribenten meinung gezogen. Denn Philippus außdrücklich *inuisitatas predicationes* nennt/ allein die obgemelten vñ dergleichen reden von der person Christi. Dargegen aber setzt er die Sacramentlichen reden/ vñ mit namen diese reden vom Abendmal/ Dieser kelch ist das newe Testamēt/ oder/ das ist mein blut/ &c. *inter figuratas predicationes*. Das ist/ vñter die verwechselten reden/ welche nach laut des buchstabens einen vnrechten/ Aber nach gebürlicher erklärung/ einen rechten verstand geben/ Wie denn im grund alle Sacramentsweise geredten sprüche sind. Derhalben in diesen Worten/ das brot ist der leib Christi/ kein vngebreuchliche weise zureden ist/ dieweil von allen Sacramenten/ ja auch von andern Göttlichen vnd menschlichen zeichen vnd warzeichen/ also zureden gebreuchlich vñ gewöhnlich ist/ Daß man ein zeichen dasselbe nennt/ welches damit wird bedeuert vñ angezeigt/ Das gegentheil aber vñter diesem new erfundenen deckel/ sein erdichtes mirakel der leiblichen gegenwert Christi im brot/ vermeint zuuerkauffen.

Wricht.

Das Erste theil. Bericht.

31

Lutherus nennet es *synecdochen*, beide wider Papisten/ vnnnd wider die Sacramentirer. Die Papisten nemen die substanz vnd wesentliche natur des brots hinweg/ Aber die Sacramentirer nemen die substanz vnd wesentliche gegenwertigkeit des leibs Christi hinweg. Dieweil man aber/ vermög der wort in der einsetzung / diese stück alle beyde zugleich muß behalten/ vnd nach dem spruch Irenei/ zwey stück in dem 3. Abendmal sind/ eins jrdisch/ das ander himlisch/ also/ daß die substanz des brots ist vnd bleibet brot/ vnd die substanz des leibs Christi zugleich warhafftiglich da ist vnnnd empfangen wird/ So hat es D. Luther *synecdochen* genennet / Dieweil mit vnd neben diesen sichebarlichen dingen/ brot vnd wein/ Christi leib vnd blut warhafftig vnnnd wesentlich / wiewol vn sichtbar / da ist/ vnd dargereicht wird.

Erklärung.

Synecdoche heist man inn schulen ein solche rede / da man ein stück eins dings für das ganz/ oder das ganz für ein stück nennet/ Als wenn man spricht/ Es zogen 70. seelen mit Jacob in Egypten/ Das ist/ 70. menschen. So nun jemand diese art zureden/ Das brot ist der leib Christi / wil *synecdochen* oder anders nennen / in diesem verstand/ daß mit dem brot/ in rechtem brauch des Nachtmals/ der leib Christi warhafftiglich genossen werde / aber doch auff seine/ nemlich auff geistliche weise vnd art/ Mit dem wollen wir nicht zancken / So man es aber also wil deuten/ daß in dem brot der leib sey/ Als wenn man die kanten den wein nennt/ drum daß der wein darinnen ist/ diß were ein solche *synecdoche*, welche die Schrifte vnd die art aller Sacrament nicht leiden kan. Denn wie nu oft gemeldet/ wir nicht die substanz vnd wesentliche gegenwert

Von den Worten der einsetzung
wert vnd niessung des leibs Christi im Abendmal/ sonder ds
abgöttische gedicht der leiblichen oder wesentlichen gegen-
wertigkeit des leibs im brot hinweg nemen/ vnd es vns nicht
vmb die schulworte / sonder vmb die reine lere vnnnd rechten
Gottesdienst zuthun ist.

Bericht:

Das viij. Capitel/

Was es für ein proposition oder art
zureden ist / Das ist mein
leib.

Nach dem / wie jetzt gesagt / Luthers diese Proposition
oder red / Das ist mein leib / auff s synecdochen zeuhet / vn-
terstehen die Sacramentirer bald daher zuschliessen / Es
sey ja eine figur oder tropus darhinder / darumb solle man
es figuratiuam predicationem heissen / man köne auch bey dem ein-
feltigen / natürlichen verstand der wort Christi nicht bleiben.

Erklärung.

Ein jede solche rede / die man anders muß verstehen/
denn sie nach dem buchstaben lautet / ist figurata oder tropica
Das ist / ein verwechselte rede. Nu ist aber gewis vnd vn-
widersprechlich / Das alles was per synecdochen geredt ist/
nicht stracks kan verstanden werden / wie es an ihm selbst
lautet / Man wolle denn das ganze vnnnd ein stück desselben
für eins halten / Derhalben schleuße sich selbst bey
allen Rechtsinnigen / das prædicatio

Synecdochica, figurata

sey.

Bericht.

Bericht.

Aber droyen haben wir angezeigt / wie weit sich die *synecdoche* erstreckt / nicht so viel in sonderheit ein jedes einzelige wort betriffe / dann dieselbigen muß man inn ihrem eigentlichen klaren verstand behalten / sondern so viel die art der ganzen rede belanget / vñnd das wider der Papisten *Transsubstantiation*.

Erklärung.

Es sey gleich ein wort oder die ganze rede anders zu verstehen denn sie lautet / So bleibet doch dieses fest stehen / daß man bey dem buchstaben nicht bleiben könne / Sondern den verstand suchen müsse / wie sich in einer verwechselten rede gebüret.

Bericht.

Weiter inn andern Exempeln durch diese figur zurechen / behelt der andere letzte theil der proposition / nemlich das *predicatum* . nicht seine eigentliche bedeutung / sonder entlehnet ein andere newe. Als da der Herr Christus sagt : Herodes ist ein fuchs. Der erste theil dieser rede / das wort / Herodes / bleibt inn seiner eigenschafft vñnd natur. Von dem anderen letzten theil aber / weiß jederman / daß es nicht von einem vierfüßigen / vnvernünfftigen thier verstanden werden solle oder könne. Also verstehet man auch die rede / Tyrannen oder wütherich sind wölff / Item diese Johannis am fünffzehenden / Ich bin der weinstock / Ihr seid die reben / Mein vatter ist ein Ackerman / vñnd des gleichen.

Von den worten der einsetzung Erklärung.

Die figur oder *tropus* / das ist / verwechselung der wort / pflegt nicht allein im letzten / sonder auch offft im ersten teil der proposition zusein / Als / Alles fleisch ist hew / Jte 70. seelen zogen in Egypten. Das ist / 70 menschen / 2c. Welches darumb anzuzeigen / das man sehe / wie diese leute jnen eigene vnd newe Regeln jres gefallens dichten.

Vericht.

Dargegen aber in dieser proposition / Das ist mein leib / bleiben beide erste vnd ander theil der proposition in jrer eigentlichen vnd natürlichen bedeutung / vnd wird geredt vom der substanz des wesentlichen vnd natürlichen leibes Christi / darumb / dieweil außdrücklich darbey stehet / Mein leib / der für euch gegeben wird. Es ist ja kein erdachte figur des leibes / ob *corpus phantasticum* für vns gegeben / Es sey denn daß wir vnsern nüglich mit der Manicheer vnd Marcioniten ketzerey wollen besfleckt sein / sondern das warhaffte fleisch vnd blut Christi ist für vns gegeben.

Erklärung.

Das brot ist nicht ein erdachte / sonder von Christo selbst eingesezte figur vnd warzeichen seines leibs. Darauß aber folget nicht / daß ein figur sey für vns gegeben. Denn wir sagen nicht / Das brot selbst sey für vns gegeben / sondern es sey ein figur oder warzeichen des waren für vns gegebenen leibs Christi. Viel weniger folget / daß Christus darumb ein fantastischen / Manicheischen oder Marcionische leib habe / daß sein leib durch das brot bedeutet wird. Wie auch nicht folget / daß ein zeichen für vnser sünd vergossen sey / oder Christus ein fantastisch blut habe / darumb daß im Tauf

Auff das blut Christi durchs wasser bedeutet wird / Sonder schliessen viel mehr darauß die alten Lerer / weil der leib Christi durch das brot / als durch ein gegenbild wird bedeutet / so müsse je Christus einen waren natürlichen leib haben / damit diese anbildung nicht falsch vnnnd vergeblich / sonder warhafft sey. Dargegen aber sehen die zu / was sie Christo für einen leib andichten / die da wollen / daß er sichtbar im himmel an einem ort / vnnnd vn sichtbar zugleich an vielen / oder wie jesund etliche andere fürgeben / an allen orten / im himmel vnd auff erden sey.

Bericht.

So ist nun das brot ein sichtbarlich Element / vnd bleibt in seinem eigentlichen vnd natürlichen verstand. Das ander / nemlich das wort / *Corpus* / leib / redet eigentlich von der wesentlichen substanz / welche für vnns am stam des creuzes aufgeopffert ist worden. Das mittelste wort / *Est* / Ist / bindet die zwey wort / brot vnd leib / also zusammen / daß eine vollkomene verständliche proposition drauß wird / welche anzeiget / daß mit den sichtbarlichen dingen brot vnd wein warhafftig vnd wesentlich außgespendet vnnnd dargereicht werde Christi warmer leib vnd blut.

Erklärung.

Alhie ist erstlich zusehen / wie sich dieser man selbst in die backen hawet / dieweil er zuvor so lang gefochten hat / es müssen alle wort in dieser rede / Daß brot ist der leib Christi / stren eigentlichen natürlichen verstand behalten / vnnnd aber jesund das mittelste wort / *Ist* / also aufleget vnd deutet / daß es heiße / mit den sichtbaren dingen außgespendet vnnnd dargereicht werden. Denn ob das wort / *Sein* / in seinem ge-

Von den worten der einsetzung

wöhnlichen/eigentlichen/natürliche verstand/also viel heist/
als mit einem ding aufgespendet vnnnd dargereicht werden/
Vnd ob diß heist bey dem laut vñ buchstaben der wort blei-
ben/wenn man für diese rede/ Das brot ist der leib/also sagt/
Mit dem brot wird der leib aufgespendet vnnnd dargereicht/
geben wir einem jeden Christe vñ verstendigen in seinem ge-
wissen zuurtheilen. Zum andn ist auch zusehen/ daß diese er-
klärung der wort Christi/ Dis brot ist vns ein warzeichen leib
gewisses pfand/ daß wir mit dem für vnns gegebenen glau-
ben/ zum ewigen leben gespeiset werden/ eben so viel ist/ als
wenn man sagt / Mit diesem brot niessen wir in rechten
brauch des Abendmals warhafftig den leib Christi. Vnnnd
wir derhalben diese rede/inn ihrem rechten verstand/eben so
wol als die ander/nicht allein annemen vnd brauchen/son-
der auch bestendiglich verteidigen. Daß aber der leib Christi
mit oder in dē brot/leiblich/durch die hand des dieners/aufge-
spendet vnd dargereicht werde/ist ein zusatz/ vnd in Gots
tes wort niergend gegründte deutung. Darumb solchen zusatz
glaubē/weder D. Luthers/noch jergend ein es menschen wort
oder ansehen vns bewegen soll.

Vericht.

Dieses ist ein besondere art zureden/welche eilliche/wie offte
gesagt/ derhalbē ein ungewöhnliche od vngewöhnliche predi-
cation nennen. D. Luther nennet es *synecdochen*, mit das hie ein
figur verstanden/oder nur ein zeichen/erinnerung/oder bedeu-
tung des leibs Christi empfangen werde/sondern anzuzeigen/
daß zugleich mit den sichtbarlichen dingen warhafftig vnnnd
wesentlich (wiewol vn sichtbarlicher/vnerforschlicher/wiese)
Christi warer leib vnd blut gegenwertig sey/ vnd dargereicht
werde. So hören wir wol/sagen die Sacramentirer/*synecdoche*
ist bey

Ist bey euch kein figur oder tropus? Antwort/ Es sey vnnnd bleib
 ein figur in andern sachen/ doch wissen alle geleerten/ das vn-
 ter allen figuren keine mit der gemeinen natürlichen art zuredē
 sich besser vergleichet dann diese/ also / das man es bey nahe
 kein figur möchte nennen.

Erklärung.

Das heist den pelz waschen vnd nicht naß machen. Die
 synecdoche macht hie eben so wol/ das man von dem buchsta-
 ben der wort auff den verstand muß gehen/ als in andern sa-
 chen/ Derhalben bleibt sie allhie eben so wol ein figur vnnnd
 wechseltrede als anderßwo/ vnangesehen/ das sie diesen ne-
 wen Artisten ein figur sein vnd nicht sein muß/ wo es ihnen
 gefelt. Denn sie sey der gemeinen natürlichen art zureden
 nahend oder fern/ so ist doch diß genug/ vnd wird damit er-
 wiesen/ das sie nicht lest den buchstaben vnnnd laut der wort
 behalten. Nach dem aber gewiß ist/ das man muß ein aufle-
 gung der wort suchen/ so ist als denn ein andere vnnnd neue
 frage/ welches die rechte auflegung vnd verstand sey. Vnd
 muß diese frage/ eben so wol als die erste/ nicht auß menschen
 gedanken/ sonder auß grund Göttliches worts erörtert wer-
 den. Diß allein ist hie wol zumercken/ das der gegenheil mit
 seinem eigenen zeugnis vberwiesen wird/ das die leibliche ge-
 genwert Christi im brot/ keinen grund inn der Schrifft hat/
 Dieweil sie bekennen/ es sey derselben kein ander grund zusit-
 chen/ denn die wort Christi/ Das ist mein leib/ Vñ aber weil
 diese wort nichts solches vermögen / wenn es zum treffen
 come/ sich in der that befindet/ das sie sich nicht auff die wort
 Christi/ wie sie die leut wollen vberreden/ sonder auff ihre eige-
 ne gloss vnd deutung gründan / die sie one vnnnd wider allen
 grund der Schrifft/ den Worten Christi geben.

Von den worten der einsetzung Bericht.

So aber jemandts darüber viel zanken vnd hadern wil/
dem antworten wir hie mit den worten Cyrilli/also / Gott laß
sich die ordnung der natur nicht binden.

Erklärung.

Er bindet sich aber selbst willig an seine wort vnd war-
heit/Also daß er wider dieselbe nicht wil handeln.

Bericht.

Sondern so oft er wider den gemeinen lauff der natur
wirken wil / mag in nichts weder in himel noch auff erden/
weder die Regel der Dialectiken/ noch alles was er geschaffen
hat/hindern oder auffhalten/ &c..

Erklärung.

Er hat aber inn seinem wort niergendt offenbaret/ daß
er diß wolle wirken/daß der leib Christi ins brot come.

Bericht.

Wo aber die Sacramentirer vor der synecdoche gar keine
ruhe haben können oder wollen / thun alle Gottsfürchtige
vnd rechtgläubige besser daran / daß sie das wort synecdoche
gar auffen lassen vnd fliehen/ehe sie dardurch die Sacramen-
tirische bedeutungen vnd zeichen/gestatten vnd zulassen/Wel-
cher gestalt dann auch Doctor Luther hierinnen zuhandlen
offt gerathen.

Erklärung.

Auß diesem vnd dergleichen stücken ist zusehen / wie
diese leut irer sachen gewiß sind/vnd mit sich selber stimmen.
Jetzt wollen sie stracks bey den worten bleiben / Bald ma-
chen sie ein synecdochen darauff / Jetzt ist jnen synecdoche ein sta-
gut/

gur/Bald muß sie jnen keine sein. Wer sihet aber nit/wenn sie könden den buchstaben der wort erhalte/das sie one zweuel nicht würden die *Synecdochen* machen noch zulassen/vnnd wenn sie könden erhalten/das die *Synecdoche* nit ein figur oder verwechslung der rede were/das sie dieselbe nicht so bald widerumb würden auß den henden werffen: Die warheit ist nicht so vnbestendig auff irer rede.

Bericht.

Endlichen ist das auch hie zumelden/das diese art zureden/Dz ist mein leib/so sie genehet wird *in usitata predicatio*. Das ist ein vngewönlliche weise zureden/mit nichten also verstanden sol werden/als wenn sie diesem exempel/Johan. 1. Das wort ward fleisch/gantz vnd gar ehlich vnd gleich sey. Dañ man muß diese gegenwertigkeit des leibs vnnd bluts Christi/welche Christus selber dem brot vnd wein zueignet/wol vnnd gar weit vnterscheiden vonn jener vngewöhnlichen wunderbaren predication oder red/vonn welcher daselbst Johannes schreibet/Da er redet von persönlicher vereinigung zwoer vnterschiedlichen naturen in der einigen person Christo/Wie allwegen die Christliche kirch geleret hat/vnnd anderswo rechte vnd gründlich erkläret wird/Dann von der persönlichen vereinigung beyder naturen kan vnd sol niemands sagen/mit diesem menschen Christo ist Gott/Aber von der wesentlichen gegenwertigkeit Christi bey diesem Sacrament/redet man auff dieselbige weis recht vnd wol.

Erklärung.

Dieweil denn diesen Scribenten sein gewissen treibe zubekennen/Das zwischen den reden vonn Christo/welche Philippus Melancthon obgemeldt/hat vngewönlliche reden genennt/vnd dieser rede/Das ist mein leib/so ein grosse
J. iij. vngleich

Von den Worten der einsetzung

vngleichheit sey / warumb darff er sie vnter die vngewöhnlichen setzen / so doch diese art zureden / die Christus allhie gebraucht / von allen Sacramenten gebreuchlich ist: So man ihm gestatten solte / der vngebreuchlichen weisen zureden so viel zudichten als er wolte / so könde er vber keinem spruch der Schrifft so ein vngewre glos herfür bringen / die er nicht mit diesem schirmschlag verfechten möchte / Es were ein vngebreuchliche art zureden. Da solte zu lest ein schöne Theologj vnd Religion drauß werden.

Bericht.

Das ix. Capitel/

Von den wörtlein in / vnter / vnd
mit dem brot.

DOben haben wir gesagt / welches hie vnd allwegend wol zu behalten ist / das von des Herren Nachmal niemand besser könne reden / denn eben mit den Worten / mit welchen der Son Gottes dieses Sacrament selbst hat geordnet vnd eingesetzt. Das man aber zu dieser zeit pflegt also zureden: Mit dem brot / in dem brot / vnd vnter dem brot / ist Christi leib gegenwertig / vnd wird genossen /

Erklärung.

Christus hat weder also geredt / noch etwas das diesen verstand gebe. Derhalben so ihm zu folgen ist / diese reden zu dem handel nicht dienstlich sind. Vnd weil sie zu dieser zeit sind erfunden / sollen wir billicher mit der Schrifft vnd der Alten rechtglaubigen kirchen reden / denn nach diesem neuen brauch.

Bericht.

Bericht.

Das geschicht alles den irthum von der Transsubstantiation zu vermeiden.

Erklärung.

Der Herr Christus aber hat den irthumb der Transsubstantiation zu vermeiden/also geredt/Diſ thut zu meine gedächtnis/Vnd S. Paulus also/So offte jr von diesem brot esse/solt jr den tod des Herren verkündigen/Item/Dz brot das wir brechen ist die gemeinschaft des leibs Christi/vñ alle Alte Christliche Lerer also/das brot ist ein zeichen/gedächtnis/gegenbild/anbildung/bedeutung/warzeichen/ıc. des leibs Christi. Darzu brauchet das gegenteil seine weise zurenden/das in oder vnter oder bey dem brot/der leib Christi sey/nit allein/die Transsubstantiation zu vermeiden/sond auch seine newe erdachte Consubstantiation/das ist/die leibliche gegenwert vnd verbergung des leibs Christi in dem brot/zuerhalten/welche nicht viel besser als die Transsubstantiation/Da der halben sich für einer eben so wol als für der andern/im glauben vnd im reden zu hüten ist.

Bericht.

Vnd werde diese wörterlein gebrauchet nur wider obgemeldte jrung/den handel etwas deutlicher zu erklären/

Erklärung

So diese wort des gegentheils deutlicher denn des Herren Christi/vñnd ein erklärang der wor Christi sind/was schreiet vnd schreibt man denn so lang vnd viel/von den hellen klaren worten Christi/bey denen man solle vñnd wolle stracks vñnd einfältig bleiben/wie sie an jnen selbst lauten/vnd keine erklärang darüber zulassen?

Bericht.

Von den worten der einsetzung

Vericht.

Wit als ob sie jergendt das geringste fundament oder grund-
feste dieser Lehr sein solten.

Erklärung.

Seind sie nicht das fundament der sachen / wie sie auch
inn der warheit nicht sollen sein / warumb helt vnnnd streitet
man denn so hefftig darüber / vnnnd gibt alle die dem Teuffel/
die sie nicht helfen lobent

Vericht.

Dann allein auff die wort des Sons Gottes / da er spricht:
Das ist mein leib / ic. ist dieser ganzer handel gegründet.

Erklärung.

Auß diesem grunde aber / folget / daß diese wort nicht
nach dem buchstaben / sonder Sacramentsweise zuuerste-
hen sind / weil das brot nicht der leib Christi selbst / sonder ein
warzeichen vnd gedächtnis desselben ist / vnd felt dargegen
diese meinung / Daß inn dem brot der leib Christi sey / weil
Christus nicht sagt / In dem / sonder / Das / ist mein leib.

Vericht.

Damit nun die Papisten nicht vrsach haben falschlich
zubichten / daß die substanz des natürlichen brots zu nicht /
vnd in die substanz des leibs Christi verwandelt vnnnd vere-
bert werde / so brauchet man diese wörlein / In / vnter /
vnd mit /

Erklärung.

Wenn wir die Papisten nicht anderst hetten zuwider
legen / denn mit diesen menschlichen gedichten /
so hetten sie die sach lengst ge-
wonnen.

Vericht.

Bericht.

Doch eben in dem verstand vnd meinung wie Paulus re-
bet/ Das brot ist die gemeinschafft/ oder anstellung des leibs/
Der wein/ oder kelch/ ist die gemeinschafft des bluts Christi.

Erklärung.

Aufteilen heist ein ding vnter jr viel also teilen/ das ein
jeder ein stück darvon bekomt. Daß aber die gemeinschafft
des leibs Christi/ darvon Paulus sagt/ ein leiblich aufteilen
des leibs Christi/ da ein jeder ein theil/ oder den ganzen leib
Christi/ in seinen mund vnd leib entpfahe/ oder ein leibliche
gegenwert in dem brot heisse/ ist noch nie bewiesen/ kan auch
disß der text Pauli nicht leiden.

Bericht.

Es sind auch diese wort nicht newlich erdichtet oder er-
funden/ sondern von den alten Lehrern/ Chrysofomo/ Augusti-
no/ Cyrillo/ vnnnd andern gebraucht worden. Vnnnd das vmb
zweyer vrsachen willen/ das falsche gedicht der Transsubstan-
tiation zuwerwerffen/ Darnach den rechten glauben/ von wa-
rer vnd wesentlicher gegenwertigkeit des leibs vnd bluts Chri-
sti in seinem S. Abendmal/ zu bekrefstigen.

Erklärung.

Wie dioben ist gemeldet/ daß die Alten Lehrer also pfle-
gen zureden/ das brot sey der leib/ oder auß dem brot werde
der leib Christi/ der für vns gecreuziget ist/ zc. Diweil diese
weise vonn Sacramenten zureden/ in der kirchen so gemein
vnnnd bekant war/ daß sie sich nichts weniger versehen oder
besorget/ denn der Papistischen verwandlung des brots in
das fleisch Christi/ Also haben sie auch nicht gefürchtet/ daß
leut hernach würden komen/ die da für geben/ der leib Christi
were wesentlich im brot verborgen/ vñ würde damit leiblich
durch

Von den Worten der einsetzung

Durch den mund eingenomen vnd geessen/darumb haben sie
vne schew bißweilen auch also geredt / daß in oder vnter brot
vnd wein der leib vnd das blut Christi genossen werde / aber
weit nicht in diesem verstand / auch nicht mit diesem zusatz/
wie sie sekund das gegenteil braucht/ Nemblich/ daß In oder
vnter dem brot wesentlich vnd leiblich das fleisch Christi ge-
genwertig sey / Sonder erklären sich also/ daß wir inn oder
vnter dem brot vnd wein / den leib vnd das blut Christi ent-
pfangen / als inn oder vnter einem Sacrament/ geheimniß
oder zeichen / Das ist / nicht also daß der leib wesentlich im
brot sey/ sonder daß er dadurch bedeutet/ vnnnd vnser glaube
dadurch als durch ein Göttliches pfand vnnnd werckzeug des
H. Geistes gestärket werde/ durch welchen wir glich Christi
werden. Also entpfangen wir Christū vnd alle seine wolthaten
auch in oder vnter dem wort. Denn auch die Sacrament/
sichtbare wort sind. Vnd ist gebreuchlich / daß man sagt inn
oder vnter einem geheimniß oder zeichen sey vnd werde ent-
pfangen das jenige so dadurch wird angezeigt / nicht vnn
wegen einer leiblichen oder wesentlichen gegenwert desselbe/
das bedeutet wird / in oder vnter dem zeichen/ sonder von we-
gen der bedeutung.

Vericht.

Warumb bleffet man sich aber nicht an dieser wort einem ge-
nügen/ sonder braucht iren drey: Antwort / Darumb/ damit zu
gleich dadurch angezeigt werde/ daß niem and fürwitziglich
grübeln dürffe/ auff was weiß / oder wie Christi leib gegenwer-
tig sey/ sonder dasselbige dem lieben Gott heimgesteilet werde/
welcher das zugesagt / vnd geordnet hat / welcher warhafftig
ist / vnd keinen betrug je geredet hat / welcher auch Allmächtig
Gott ist / vnd thun kan was er wil / in himel vnd auff er-
den. Derhalben folget mit nichten auß dem gebrauch dieser
wörter

würlein/ daß Christi leib ins brot werde eingeschlossen. Man
leret auch nicht / wie groß oder wie klein Christi leib empfan-
gen werde / Man lehret auch nicht / daß Christus alwegen von
himmel herabfare / vnd sey räumlich an dem ort / da das Abend-
mal gehalten wird / vnd sonst nirgends anderswo. Son-
der wann man sagt / inn dem brot / ic. werden außgeschlossen
alle falsche meinungen / welche fürgeben / Christi leib sey nicht
warhafftig zugegen / vnd wird hinvördermb angezeigt / die
warhafftige vnnnd gewisse gegenwertigkeit / vaneichung oder
Gemeinschafft des leibs vnd bluts Christi.

Erklärung.

Diese vnd dergleichen protestationes vnd bedingungen ent-
schuldigen die lere des gegenteils ganz vnd gar nicht. Denn
wir nicht fragen / wie der leib Christi in das brot / oder zu dem
brot come / oder was gestalt oder größe er darinnen oder da-
bey sey / Sonder allein ob er leiblich vnnnd wesentlich da sey /
da das brot ist. Weil die auß Gottes wort nicht mag erwie-
sen werden / ziehen sie vergebens die Allmächtigkeit Gottes
an / ihr vnsehbares mirakel zuerhalten / ehe denn sie haben
bewiesen / daß Gott solches zu thun im willen habe.

Bericht.

Weil aber niemands / wie oben gemeldet / erforschen kan
oder darff / auff was weiß vnd wie dieses geheimniß geschehe /
vnd vnser augen vnnnd mund diese gegenwertigkeit nicht ent-
pfinden / so haben die alten diese drey wort / vnter / in / vnnnd
mit dem brot / ic. gebrauchet / wie die vnser / noch auff den
heutigen tag reden. Es soll aber doch mentlich wissen /
daß gar ein grosser / mechtiger vnterscheid ist zwischen
der weiß zureden / die vnser Herr Christus selbst gebrau-
chet hat / vnnnd zwischen dieser vnnnd dergleichen worten vnd
weisen zureden / die nachmals inn der kirchen auff kommen
B ij vnd

Von den Worten der einsetzung

vnd gebraucht sind worden. Vnsers Herren Christi wort sollen vnd können auß keiner vrsach nimmermehr vnd nirgends geändert / verworffen / oder überhupfft werden. Aber was andere nachmals angenommene weiß zureden belanget / sage D. Luther recht / daß wir schuldig vnd erbötig seyen / so sie der reinen lehr des glaubens nachheilig vnd der einigkeit in warer bekentnis verhinderlich sein wolten / dieselbige ganz vnd gar zimerwerffen.

Erklärung.

Wenn das gegentheil dieses thete / so were der streit lang gestillt.

Bericht.

Vnd die einige / allgerwisseste form / welche der Son Gottes selbst braucher / herzlich anzunehmen vnd zuziuchen.

Erklärung.

In dem verstand / den die ganze Schrifft vnd Christus selbst seinen Worten gibt.

Bericht.

Als wann man diese wort / Christi leib wirt vns / in / vnter / vnd mit dem brot gegeben / nichts anders / dann also verstanden wolt / es were eben geredt / als wann ich sagte : Er hat mir in versigleten brieffen vnd verschreibungen / diese oder jene zins / garten / wiesen / acker vnd hauß gegeben. Oder wann ich sagte / Er hat mir durch vbergebung des schlüssels / ein abwesend oder anderswo gelegen hauß gegeben. Als dann / sage ich / wolten wir diese form zureden / in / vnter vnd mit / von wegen der falschen deutung vnd mißverständnis ganz vnd gar fallen vnd ungebraucht lassen. Also siehest du nun / durch Gottes gnad / wie fer / vnd wann man sich in den kampff dieser wort halben solle einlassen / oder nicht.

Erklärung.

Erklärung.

Die alten Lerer haben diese wort an keinem ort anders gebrauchte / denn in diesem verstand der zuvor erkläret / vnd allhie vonn diesem Scribenten verworffen wird. Lassen sie auch die erklärang Christi / dis thut zu meinem gedächtniß / vnd die manigfaltigen zeugniß aller alten Scribenten / anders nicht verstehen. Derhalben auch wir in solchem verstand vnd mit solcher erklärang / sie zugebrauchen vns nicht scheuen. Dargegen aber / so man sie nicht Sacramentsweise / sonder nach dem buchstaben will verstehen / können wir sie keines wegs billichen noch zulassen. Denn sie mit dieser weise eben so wol eine frembde vnd mit Gottes wort streitten de meinung würden geben / Als die wort Christi / da er das brot selbst / seinen leib neüt / so man sie nach dem buchstaben wolte verstehen. Denn Christus eben so wenig lehret / daß sein leib im brot verborgen sey / als daß das brot sein leib selbst sey. Vnd weil droben von jm bekant / daß die wort / das ist mein leib / Recht also von den Alten erkläret sind / das brot ist ein warzeichen meines leibs / So müssen freilich auch diese redt / das brot wird zu dem leib Christi / In oder vnter dem brot wird der leib Christi gegeben vnnnd genossen / eben also verstanden werden / sollen sie anders mit der meinung Christi stimmen. Daß aber in diesem sichtbaren zeichen / der leib Christi wesentlich vnd leiblich gegenwertig vnd verborgen sein solle / diß wird von dem gegentheil daran geflicket / one vnd wider alle zeugniß Göttlichs worts vñ der alten Christlichen kirchen. Derwegen wir je billich bey dem das gewiß vnd vnwidersprechlich ist / bleiben / vnnnd die newen abgöttischen gedicht vnd zusätze der menschen / lassen faren.

Von den Worten der einsetzung

Bericht:

Das 1. Capitel/

Von den wörtlein / warhafftiglich/ leiblich/wesentlich/realiter.

Durch diese wörtlein haben die Alten wollen anzeigen/
das im 5. Abendmal Christi leib vnd blut nicht allein
zeichens oder bedeutungsweise / auch mit allein nach der
geistlichen krafft vnd wirkung / sonder nach seiner ei-
gentlichen warhafftigen substanz / wesen vnd natur / gegen-
wertig sey / dargereicht vnd empfangen werde. Der alte Lerer
Hilarius brauchet hierin diese wörtlein / warhafftiglich / natür-
lich / leiblich / vnd nach dem fleisch. Cyrillus brauchet diese /
leibliche vereinigung / natürliche gemeinschaft / nicht allein
geistlich / sonder auch leiblich / nach dem fleisch / wesentlich /
warhafftiglich. Chrysostomus sagt / Christus vermischet sei-
nen leib vnd vnsern leib / also das ein ding darauß wird / vnd
daz thut er durch diese speiß / da er spricht / Traget / esset /c. Trä-
reißt /c. gewißlich vnd mit der that /c. Augustinus / vnsehbar-
lich Lyra spricht / Christus ist in der 5. Tauffe nach seiner Göt-
lichen krafft vnd wirkung / Aber im Sacrament des 5. Nacht-
mals ist er mit seinem wesen vnd substanz.

Erklärung.

Was Hilarius / Cyrillus / Chrysostomus / Augustinus
vnd alle alte glaubwürdige Scribenten vom Abendmal vnd
von der nießung des leibs vnd bluts Christi leren / ist anderß
wo auß fren schriften angezeiget / darauß leichtlich zuersee-
hen / das sie mit der Schrift vnd mit vns leren / das wir mit
allein des verdiensts vnd der eigenschafften / sonder auch der
substanz vñ wesens des waren natürlichen leibs Christi teil-
hafftig

hafftig werden/doch nit also das d̄ leib Christi in vnsern leib
 kome/sond̄ dz wir demselb̄ durch seine Geist als glieder dem
 haupt eingeleibet vnd gleichförmig werden. Also sagt Hila-
 rius vnd Cyrillus/dz wir natürlich vnd leiblich mit Christo
 vereiniget werden/vnd in in vns wonende habe/Verstehen
 aber damit nit dz sein leib in vnsern leib kome/dest̄ erstlich ses-
 hen sie darzu/das nit allein Christus in vnns/sond̄ auch wie
 in Christo sind/So doch one zweuel/vnser leibe nit leiblich
 in den leib Christi eingehē/sonder wir mit jm/gleicher natur
 vnd art/vnd durch seinen geist mit jm verbunden vnd verei-
 niget werden. Zum andern lehren sie außdrücklich das solche
 vereinigung mit Christo nit anders denn durch wonung des
 geistes Christi in vns geschehe. Dest̄ vber den spruch Christi/
 Johan. 16. So ich nicht hingehe/so kom̄t der tröster nicht zu
 euch / schreibt Cyrillus also / Denn es war von nöten / das
 wir seiner natur teilhafftig/vnd in ein neues vnerhöretes le-
 ben verwandelt würden / welches anderst/denn durch die ge-
 meinschaft des H. Geists/nicht geschehe kunde. Zum drittel
 zwingen vnns die wort Chrysostomi selbst/das wir sie geist-
 lich müssen verstehen/nemlich/vō der verbindung vñ gleich-
 förmigkeit Christi vnd seiner glieder/durch seinen in jm vnd
 in vns wonenden geist. Denn des Herren Christi vñnd vns-
 ser fleisch je nicht leiblich mit einander vermischet vñnd
 zu einem leib wird / wir wolten denn das fleisch Chris-
 ti auch der durfftigkeit vñnd vn sauberkeit vnser flei-
 sches / vñnd endtlich dem todt vñnd der verwesung vnters-
 werffen. Zum vierdeen / nennet Chrysostomus / Hila-
 rius / Cyrillus vñnd andere / diese vermischung des
 leibs Christi vñnd vnser leibs / die wonung Christi inn
 vns / die einleibung inn den leib Christi / die vereinigung der
 glieder

Von den Worten der einsetzung

glieder mit dem haupt Christo/ die verwandlung vnsero fleisches in des Herren Christi fleisch/ &c. Wir achten aber nicht/ daß dieser Scribent oder jemand des gegenteils/ also vnbesonnen oder frech sein werde/ daß er sagen dürffe/ das Christus auch in den Gottlosen vnd heuchlern wort/ vnd sich also mit jnen vermische vnd vereinige/ &c. Darauß denn offenbar ist/ daß diese vereinigung mit dem leib Christi/ welche vns/nach der Alten Lehrer bekenntniß/ durch die nießung des brots/ als durch ein eusserliches mittel vñ werckzeug des H. Geistes/widerferet/ allein die glaubigen angehet/ vnd nicht anders denn durch waren glauben an Christum geschicht. Lyram/ als einen Papistischen Scribenten/ hett er wol dahinden gelassen. Paulus sagt dargegen/ daß wir im Tauff eben so wol des leibs Christi teilhaftig werden als im Abendmal/ 1. Cor. 12. Wir sind alle in einem Geist in einem leib getaufft/ vnd zu einem Geist getrenckt.

Bericht.

So sind nun diese wörllein vnd weise zureden nicht neuwlich erfunden/ vnd den alten vnberuost/ sonder von den alten Christlichen Scribenten auch gebrauchet worden. Nicht auß der ursach/ als ob sie damit wolten beschreiben vnd abmalen wie Christi leib vnd blut gegenwertig sey/ oder als ob sie das geringste von d. groben/ sichtbarlichen fleischlichen nießung/ wie die tölpische Capernaiten lesterten/ jnen treumen ließen/ sonder nur allein damit anzuzeigen/ daß Christi leib im Tachtmal gegenwertig sey/ vñ den Communicanten dargereicht werde/ nicht allein nach der krasse vnd geistlichen wirkung/ sonder auch nach seiner eigentlichen substanz vnd wesen/ wie Lyra recht vnd wol redet.

Erklärung.

Die alten reden nicht allein von keiner groben oder Carnaitischen/sonder auch von keiner leiblichen oder mündlichen weise den leib Christi zuessen/Dargegen aber leren sie allein vonn der geistlichen niessung vnnnd gemeinschafft des waren leibs Christi. Denn alle die ort / da sie obgemeldter wort gebrauchen / reden vonn der vereinigung mit Christo/ vnd wohnung Christi in vns/welche die glaubigen allein angethet/Vñ nicht allein im Nachtmal / sonder auch im Tauff vnd predigt des worts/vnd zu jeder zeit/da wir glauben/geschicht/Im Nachtmal aber in vns bestättiget vnd gemehret wird/vnnnd ewiglich weret. Welches wol zubedencken/denn darauff offenbar ist/ daß eben dieselben ort der alten Scribenten/am hefftigsten wider das leiblich / mündlich/ vnnnd den glaubigen vñ vnglaubigen gemeine essen streitten / vnd den noch vonn diesenleuten angezogen werden / als dieneren sie vberaus jnen wol zu jrer sachen.

Bericht.

Also sind zu vnsern zeiten diese wörtlein bey den vnsern auch im brauch/auff jez gemeldter vrsach / wie sie dan stehen im zehenden Artickel der Augspurgischen Confession / vnnnd auch in derselbigen Apologia/da oben erzelete wort Cyrilli gesetzt vnd angezogen werden/Defgleichẽ auch in der widerholung der Confession/vnd an vielen anderen orten.

Erklärung.

Was die Augspurgische Confession / Apologi / vnnnd widerholungen derselben/vom Abendmal vermögen/ist an derswo gründlich vnd genügendlich außgeführt/Alhie zuerholen vnnot vnd zulang.

Von den Worten der einsetzung

Bericht.

Daß aber Paschasius anderswo saget / der leib Christi sey nicht fleischlich / oder fleischlicher weise / im Nachmal. Item / daß auch Augustinus sage / Christus sey jezunder nicht bey vns leiblicher weis / Ist gewiß / das sie daselbst reden von der sichtbarlichen / greifflichen weis der natürlichen fleischlichen gegenwertigkeit. Wie sich in dem Augustinus offte selbst erkläret. Dann Christus gehet jezund nicht also mit vns vmb / daß wir seinen leib sehen vnd greiffen können / wie er vor seinem leiden vnd sterben auff erden gewandelt / vnd wie er nach seiner aufferstehung vierzig tag lang / biß auff die zeit seiner himelfart / sich hat sehen vnd fñlen lassen / wie er auch endlich komen wird zurichten die lebendigen vnd die todten.

Erklärung

Augustinus vnd alle Patres. wissen von der vn sichtbar leiblichen gegenwert Christi nichts / lassen sich auch eben so wenig als die Schrifft selbst / also biegen vnd deuten. Denn sie sagen außdrücklich / daß Christus mit seinem leib zu einer zeit nicht an mehren denn an einem ort sey / man verstehe es sichtbarlich oder vn sichtbarlich / greifflich oder vngreifflich / zc. Denn von diesem vnterscheid der leiblichen gegenwertigkeit Christi / daß sie sichtbar vnd vn sichtbar sein solle / haben die Alten nichts weder gewußt noch gelehret. Drumb ist diß ein falsche erdichte distinction / daß der einige ware leib Christi zugleich im himel sichtbar vnd auff erden vn sichtbar sey / vnd Gott vnd dem Herren Christo zum spott / vnter dem Bapstum / wider alles Gottes wort vnd bekentniß der Alten rechtgläubigen kirchen ertraumet.

met.

Bericht.

Bericht.

Nichts desto weniger aber / ist er doch leiblich gegenwertig bey denen / die inn seinem namen versamlet / sein heiliges Sacrament brauchen ob schon vnser fleischliche augen ihn nicht sehen.

Erklärung.

Zumerken wie der Scribent mit sich selber stimmet / seht wil er / dieweil er sich für der vbiqutet fürchtet / Christus allein im Nachmal vn sichtbar vnd leiblich gegenwertig haben / vnd erst zuuor wolte er mit einem streich alle Patres zurück schlagen / daß sie nemlich wollen / Christus sey nicht sichtbar / aber dennoch leiblich bey vns auff erden / da sie doch von dem abwesen Christi reden / nicht allein im Nachmal / sonder zu aller zeit von seiner auffart an / bis zu seiner widerkunft / vnd derhalben nach dieses Scribenten glos / nicht allein im Abendmal / sonder alle zeit vnd vberall Christus leiblich bey vns müste sein / Welches er nicht wil gestehen / vnnone zweuel vnrecht ist.

Bericht.

Das xi. Capitel /

Von dem wörtlein *Kinonia*, das ist / Gemeinschafft / 1. Corint. 10.

Der Apostel Paulus sagt. Der gesegnete kelch ist die gemeinschafft des bluts Christi / vnnnd das brot ist die gemeinschafft des leibs Christi / gibst er nichts anders zu verstehen / dann daß im Sacrament seyen zwey ding / das brot vnd der leib / vnd mit dem brot sey der ware leib Christi warhaftiglich vñ wesentlich gegewertig / werde außgespendet vñ empfangē. Darinn wird dz Griechische wort *Kinonia*, auff Lateinisch / *Participatio*. recht verteutschet außstellug ob

Von den worten der einsetzung
gemeinschaft / inn welcher vnns mitgetheilt wirt der leib
Christi.

Erklärung.

Durch das wort gemeinschaft meinet Paulus kein leiblich außtheilen oder niessen des leibs vnd bluts Christi / sonder die geistliche niessung oder gemeinschaft Christi / wie der text S. Pauli klärlich zeuget. Denn er selbst diese gemeinschaft also erkläret / daß wir viel ein leib seind / Nu sind wir aber nicht anders ein leib / denn so wir glieder Christi sind / welches nit durch ein leiblich essen des fleisches Christi / sonder durch waren glauben vñ verbindung mit Christo durch seinen in jm vnd in vns wohnenden Geist geschicht. Item er leret weiter am selben ort / daß diese gemeinschaft nicht kan bestehen neben der teuffel gemeinschaft. Derwegen es ein solche gemeinschaft sein muß / welche die glaubigen vñnd glieder Christi allein angehet / das ist / kein andere denn die geistliche.

Bericht.

Daher es auch Hilarius nennet: *sacramentum communicare carnis et sanguis*. Das ist: Ein Sacrament darinn Christi fleisch vñ blut außgeteilt wird.

Erklärung.

Die wort Hilarij lauten also / Ein Sacrament des mitgeteilten fleisches /c. Damit er leret / daß das Abendmal ein Sacrament / das ist / ein zeugniß vñnd warzeichen sey / daß vns Christus seines leibs theilhaftig macht / Wie er vns aber desselben theilhaftig mache / leret Hilarius oft vñnd weitläuffig. De Trin. lib. 9. da er eben diese wort vom Nachmal setzt / spricht er / Also sind wir alle eins / weil der vater in Christo / vñnd

so/vnnd Christus in vns ist/Welches sich nicht von einem
leiblichen vnnd auch den Gottlosen gemeinem essen verstan-
den leset.

Bericht.

Sol derhalben das wort/gemeinschaft/ mitnichten al-
lein von der frucht/nutzbarkeit/vnnd wirkung/ verstanden
werden/ sondern von dem wesentlichen leib Christi/ welcher
mit dem brot dargereicht wird / denen so diß Sacrament
empfaben:

Erklärung.

Wir sagen mit Paulo vnd der gansen Schrifft / vnd
den alten Scribenten / vonn gemeinschafft nicht allein der
frucht/nutzbarkeit vnnd wirkung/ sonder auch des wesent-
lichen natürlichen leibs Christi / Aber nach erklärung der
Schrifft/ Das wir nemlich dem leib Christi als die glieder jre
haupt/vnd die reben jrem weinstock werden eingeleibet/ an-
gehefftet vñ vereiniget / ob gleich weder sein leib in vnserm/
noch vnser leib in seinem ist / wie die glieder vnser leibs alle
an dem haupt hangen/vnnd darauß das leben schöpffen/ob
gleich weder das haupt in den gliedern/noch die andern glie-
der in dem haupt sind.

Bericht.

Wie die wort des H. Nachtmals lauten / dasjenige das
ihr empfabet vnnd nemet / Ist mein leib / der für euch gegeben
wird.

Erklärung.

Allhie vergist M. Selnecker / das er zuuor mit vielen
worten hat gestritten/ daß nemlich Christus in diesen wortē/
Das ist mein leib / mit dem wörtlein / Das / nichts anders
£ iij denn

Von den worten der einsetzung

denn das sichtbare brot will verstanden haben/ vnd dasselbe hat seinen leib genennet. Hie aber wolte ers gern deuten auff den vn-sichtbaren leib/ welchen Christus inen im brot solte geben haben. Darauf zuerachte das diese leute das brot gern auß den augen wolten rücken / dieweil inen jr gewissen sagt/ das dieses nicht anders der leib Christi sein kan denn Sacramentsweise/ Das ist/ ein zeugniß vnd warzeichen/ das wir mit dem für vns gegebenen leib Christi zum ewigen leben gespeiset werde/ vnd also geistlich den leib Christi / leiblich aber das brot niessen / zum zeugniß der vn-sichtbaren geistlichen niessung des leibs Christi.

Vericht.

Damit aber jederman gewis könne schliessen/ das Paulus durch das wort / *Koinonia* ganz vnd gar wolle *participationem* das ist/ Eine aufstellung verstanden haben/

Erklärung.

Das wort welches Paulus braucht/ man dolmettsche es *communicatio* oder *participatio*. heisset eigentlich nicht ein aufstellung/ sonder ein gemeinschafft / da ein einiges ding jr vielen gegeben vnd gemein gemacht wird/ Als die glieder vnd rebe haben gemeinschafft des hauptes vnd weinstocks.

Vericht.

So erkläret er es bald selbst/ da er spricht: Wir werden alle eius brots teilhafftig/ Dann beyde wort Pauli *communicatio* vñ *participatio* geben einerley meinung vnd verstand.

Erklärung.

Chrysostomus aber vnd Theophylactus sagen/ das Paulus darumb mit einem andrn wort die gemeinschafft des leibs Christi geneñt hab/ denn die niessung des brots/ auff dz er es w3 höhers anzeigte / Nemblich die aller höheste vñ genaueste
ver

vereinigung mit Christo. Vnd diesem gibt der text Pauli
 zeugniß/ wie zuuor erwiesen. Darzu/ man brauche gleich ei-
 nerley oder mehrerley wort/ so mag doch nimmer erwiesen
 werden/ daß der leib Christi also genossen oder mitgetheilet
 werde wie das brot. Denn daß der Scribent fürgibt Paulus
 erkläre das wort/ gemeinschafft/ damit/ daß er sagt/ wir wer-
 den eines brots theilhaftig/ hat keinen grund noch schein/
 dieweil Paulus die gemeinschafft zuuor erkläret / da er
 spricht/ Wir viel sind ein leib/ Vñ hernach als zum zeugniß
 vñnd beweiß darzu setzt/ Dann wir werden alle eines brots
 theilhaftig/ daß er also die gemeinschafft des leibs nicht der
 nießung des brots gleich macht/ sond die nießung des brots/
 zum zeugnis der gemeinschafft Christi anzeucht. Denn er
 die Corinthen vñnd den gözenopffern also abmanet/ Wer
 inn der gemeinschafft Christi sein vñnd bleiben will / der
 muß sich de. teuffel gemeinschafft enthalten / denn niemand
 zugleich inn Christi vñnd der teuffel gemeinschafft sein kan
 noch soll. Nu seyet aber ihr/ oder vermeinet vñnd begereet
 ja zusein inn der gemeinschafft Christi. Derhalben solt
 vñnd müßet ihr euch der gözenopffer / darinnen man
 sich zu der teuffel gemeinschafft bekent vñnd begibet / ent-
 halten. Daß aber die Corinthen gemeinschafft Chri-
 sti haben / beweiset er auß dem brauch des Abendmals /
 Welches Christus zum zeugnis vñnd mittel dieser ge-
 meinschaft/ seinen glaubigen hatt eingesetzt. Schleuße
 derhalben also / Ihr wisset ja wol / daß das brot/ das
 wir brechen / die gemeinschafft des leibs Christi ist/
 ic. Vñnd erkläret diese rede also / Wenn wir dieses brots
 theilhaftig werden / so werden wir ein brot vñnd ein leib/
 auß vermög der einsetzung vñnd verheißung Christi/ so

Von den worten der einsetzung

zu diesem Sacrament gesetzt hat. Nu werdet jr aber ja dieses brots teilhafftig im Abendmal. Derhalben seit ihr ja auch/ oder wolt darfür gehalten sein / daß ihr seyet in der gemeinschafft Christi. Mit diesen seinen schlüssen lehret der Apostel klärlich den rechten verstand vnnnd brauch des Abendmals/ Nemblich daß vnns die niessung dieses brots soll ein gewisses zeugniß vnnnd erkund sein der geistlichen gemeinschafft oder niessung Christi.

Bericht.

Also daß das wort *Kinonia*, heisset ein auftheilung / oder theilhafftigkeit / gemeinschafft vnnnd niessung des waren leibs Christi. Im Teutscher sprach hat man darfür gesetzt das wort gemeinschafft / weil man kein füglicher wort weiß / welches die eigentliche Natur des Griechischen wörteleins *Kinonia*, außdrücklich an tag gebe. Aber in der *visitatorn* büchlein, hat D. M. Luther den spruch Pauli also gegeben / Das brot das wir brechen / ist der aufgetheilte leib Christi / oder auftheilung des leibs Christi. Desgleichen hat D. Philippus Melancthon die wort Pauli eben auch also verdeutschet / inn der Antwort auff die Artickel zu Wormbs vnd Regenspurg disputirt / das brot das wir brechen / ist auftheilung des leibs Christi. *Panem quem frangimus, est distributio corporis Christi.* In summa / S. Paulus will also viel sagen. Denen die das Abendmal empfangen / wird gegeben vnnnd dargereicht nicht allein blos brot / sonder dasselbige brot ist auftheilung der gemeinschafft des leibs Christi / nemlich ein solche auftheilung / wie sie die wort der einsetzung / das das ihr nemet / ist mein leib / beschreiben vnd erklären.

Erklärung.

S. Paulus / welcher der beste aufleger ist seiner wort / erklärt

erkläret das wort gemeinschafft also/ daß es sey ein brot vnd ein leib sein in Christo. Drumb das Griechisch wort Pauli am aller füglichsten gegeben wird mit dem wort gemeinschafft/ wie auch alle der sprach nur zimlich kündige wissen. Dargegen aber schickt sich die aufteilung vnd leiblich niefung gar nit hieher/ man wolle denn Sacramentsweise das brot den leib Christi nennen. Denn der leib Christi selbst nit wird in stück oder theil zerteilet / daß man in aufteilen möchte. Auch die erklärüg dieser gemeinschafft/ so Paulus sehet/ nicht leidet / daß der leib Christi ganz oder stückweiß leiblich geessen werde.

Bericht.

Vnd bißher haben wir gehandelt von dem rechten gründlichen verstand der wort des S. Nachtmals/ vnd angezeigt/ daß brot vnnnd wein im S. Abendmal nicht nur bloss zeichen oder bedeutungen sein/ Sonder daß noch etwas mehr vnd höher damit vn darbey nach der einfügung Christi dargereicht/ empfangen vnnnd genossen werde/ vnnnd dasselbige etwas/ sey der S. leib vnfers Herren Christi.

Erklärung.

Der leib vnnnd das blut Christi wird in rechtem brauch des Nachtmals so gewiß vnnnd warhafftig als das sichtbare brot/ geessen vnnnd getruncken/ Aber nicht mit dem leiblichen munde. Denn diß ist noch vnbeuiesen.

Bericht.

Darneben ist auch angezeigt vnd beuiesen worden / daß man also den natürlichen eigentlichen vnnnd klaren verstand der wort der einfügung beständiglich behalten vnnnd verteidigen sol. Nun folgen der Sacramentirer deutung vnnnd glosen vber vielgemelde wort Christi.

Von den worten der einsetzung

Erklärung.

Ist aber auch dargegen angezeigt vnd erwiesen/ daß solches weder sein kan / noch dieser Scribent vnnnd seines gleichen es thun. Denn Christus hat gesagt / das brot sey sein leib/ &c. Diese aber sagen/ Nicht das brot/ sonder im brot sey Christi leib/ &c. Welches nicht die wort Christi sind/ sonder ein deutung derselben/ die noch nie bewiesen ist.

Bericht.

Das xij. Capitel/

Wie mancherley deutung die Sacramentierer vber die wort der einsetzung erdichtet vnd vortbracht haben.

Erklärung.

Dis ganze Capittel ist vol grosser vnd bößlich gesuchter Calumnien / damit der gegentheil vermeint seine sache zu schmücken/ vnd die warheit zu verleumbden.

Bericht.

Dieser einfeltigen vnnnd warhafftigen Lehr/ welche die wort Christi klerlich vnnnd hel an tag geben/ seind die Sacramentschwermer vberaus hefftig zuwider. Dann es seind solche leut/ welche irer armen blinden vernunfft viel lieber anhangen vnd nachfolgen/ dann daß sie vnsern Herren Christi stim wolten hören.

Erklärung.

Die stimm Christi hören wir / welcher das brot seinen leib nennt / vnnnd dasselbe zu seinem gedächtniß essen heisset. Daß aber sein leib im brot sey / ist nicht Christi stim/ sonder menschen gedicht.

Bericht.

Bericht.

Vnd in dem arten sie sich dapffer nach dem Ketzer Seructo, von welchem doch Caluinus schreibt, da man in gefraget, Warum's er doch so ein grewliche versführung angefangen / hab er geantworret, Darumb, die weil ich das nit verstehen oder glauben kan / was man eusserlich weder sibet noch fület.

Erklärung.

Seructo folgen wir nicht nach / Denn wir so viel in göttlichen sachen glauben als vns Gott durch sein wort offenbaret / Es reime sich mit vnser vernunft oder nicht. Dargegen aber mögen die senigen sehen / wem sie nachfolgen / die ihre eigene glossen vnd gedicht / wollen der ganzen welt auffdringen für Gottes wort.

Bericht.

Es spielen aber die Sacramentirer gar mancherley vnnnd seltsam mit den Worten des Heiligen Nachtmals / Also dass schon allbereit dasselbige mancherley vnnnd wunderbarlich glossieren ein starcke beweisung ist / dass ihre deutungen nicht auß den Worten Christi / sonder anderswo her erdichtet vnnnd vorbracht werden.

Erklärung.

Über die wort Christi machen wir weder mancherley noch wunderbarliche glossen / Sonder behalten die einige vnnnd einfaltige meinung vnnnd erklärang derselben / welche wir von Christo selbst vnd auß der ganzen Schrifft gelernt haben / vnnnd bey allen Alten Christlichen Lehrern finden / welche ob sie gleich nicht allezeit einerley wort brauchen / Doch einerley verstand vnd meinung behalten. Ist derwegen diß nit ein starcke / sonder ein faule vnd lame beweisung / wie deß alle des gegenteils / vnd sonderlich dieses Scribentē

M ij bewes /

Von den Worten der einsetzung

beweis/eitel zusammen geflickte vnd vnter allen bencken her für gekrahte/alibackene sabeln vnd calumnien sind. Ja eben dieses vngegründte vngeschickte geschrey / daß wir die wort Christi nicht solten auff einerley meinung auflegen / ob wir schon nicht allezeit einerley wort brauchen (welches in allen sachen / vnnnd sonderlich in diesem handel auch von dem gegenheil selbst geschichte) ist ein starck beweisung / daß sie keinen grund finden vns zuwiderlegen / Vñ derhalbe auff das sie je nicht still schweigen / sonder dem gemeinen man ein bla wen dunst für die augen machen/mit öffentlicher vnwarheit schreyen vnnnd schreiben / vnserer erklärung sey vngleiches verstands.

Bericht.

Carolstadt gauckelt natürlich sein vber dem ersten wort der propositio *Hoc est corpus meum*. Das ist mein leib / Nemlich vber dem wort / *Hoc*. Das / vnd sagt / es zeige der Herr mit dem finger auff sich den Son Gottes selbst / welcher da in andern neben geschessenen auff sich selbst dente / vnnnd sage / das ist mein leib.

Erklärung.

Welcher theil Carolstads gauckeley neher sey / Ist zuvor gemeldet. Darauf abzunemen mit was grund vnnnd gewissen das gegenheil seine sache vertheidiget / weil es dieselbe mit solchem lumpenwerck vermeinet zuslicken vnnnd zuschmücken.

Bericht.

Zwinglin klügelt vber dem andern wort *est*. Ist / vnd derttet / daß es nicht von der substanz vnnnd wesen des / darvon es gesagt wird / rede / sonder / ist / heisse da ein bedeutung / Das ist mein leib / sey so viel gesagt / das bedeutet meinen leib. *Oecolampadius*

das bemühet sich sehr vber dem dritten wort *corpus*. leib / vnnnd wil / leib heisse hie nicht Christi waren menschlichen leib / sonder ein eßenbild / figur vnd bedeutung des leibs Christi.

Erklärung.

Es verstehen auch die kinder / daß den leib Christi bedeuten / vnd ein bedeutung des leibs sein / nicht zweyerley / sonder ein einige meinung / Vnd derhalb auch diß ein gesuchter vnd gezwungener tadel ist.

Bericht.

Calvinus redt allwegen von der heilsamen geistlichen krafft vnnnd wirkung des abwesenden leibs Christi / welchen er nennet *Corpus noiton*. Das ist / einen solchen leib / den man nicht mit dem mund fassen / sondern mit den geistlichen augen des glaubens anschawen vnd ergreifen könne.

Erklärung.

Wir sagen nicht allein von der krafft vnnnd wirkung sonder auch von gemeinschafft des waren wesentlichen leibs Christi selbst / Ob gleich der leib Christi nicht in vns ist wie die krafft vnd wirkung Christi. Desgleichen verantworten *Calvinus* alle seine Schufften genugsam / wider dieses Scribenten entweder grossen vnuerstandt / oder grosse leichtfertigkeit.

Bericht.

Wolan so wir nun hiergegen die wort der einsetzung ansehen / Ist ganz hell vnnnd klar zuschliessen / daß diese alle die wort Christi vnrecht vnd felschlich verstehen / ja auch Christi einsetzung ganz vnnnd gar verkeren / vnnnd so viel an men ist / vnbeschaffen. *Carolstaads* gedicht widerleget der *Euangelist Lucas* / da er spricht / *Tuto ta potirion id est. Hoc poculum uel hic calix.* Das ist / Dieser kelch ist / 16. So deutet ja das wort in / Das mit

Von den Worten der einsetzung

auff den Herren Christum / der da stehet / sonder rehet außdrück-
lich von dem kelch / oder vom wein / der im kelch ist. Zwing-
lium widerleget S. Lucas auch daselbst / da er in seine grund-
darauff er bawet / auffen leffet. Nämlich das wörtlein Es. Ist /
vnd sagt / *Hic calix nouum Testamentum in meo sanguine.* Es solte für-
war das wort / an dem der ganze verstand hanget / inn keiner
sprach vbersehen oder außgelassen werden.

Erklärung.

Dieser schein wird one zweuel von diesem Gramma-
tisten wider sein gewissen fürgewendet / die vngelernten zube-
triegen / darumb er auch die wort S. Lucas Teutsch nicht
hat können darzu setzen. Diemeil nach gewöhnlicher art der
sprach / das wörtlein / Ist / offe nicht außgeredt / aber doch
verstanden wird / vnnnd derhalben im Teutschen muß darzu
gesetzt werden. So nimt auch solche widerlegung Paulus
hinweg / welcher zu den Worten S. Lucas das wörtlein / Ist /
außdrücklich im Griechischen text setzet.

Bericht:

Desgleichen sagt S. Paulus: *Non dijudicans corpus Domini.* Das
ist / damit / daß er nicht vnterscheidet den leib des Herren. Wie
wirstu das verstehen? Da ist auch kein Es. Ist / darauf du ein
significat möchtest drähen.

Erklärung.

Es darff auch keines da sein / diemeil Paulus hienit sagt /
was das brot sey / Sonder wie derjenige sich versündigtet /
der diß brot vnwürdig isset.

Bericht.

Weiter vberzenget S. Lucas auch Oecolampadiū. da er spricht:
Der leib der für euch gegeben wird. Es ist ja der ware natürliche
menschliche leib Christi / vñ kein phantasticum corpus. Dz ist / kein
erdichter leib / für vns gegeben. Erklärung

Erklärung.

Das phantasticum corpus, oder der erdichtete leib/ ist dieses Scribentē vnd seines gleichen phantasey vñ gedichte. Wir wissen vnd bekennen / daß Christus nur ein einigen/ waren/ menschlichen leib hat/ der für vnns gegeben ist / Wir wissen aber auch darneben / daß dieses brot nit ist für vns gegeben/ welches doch folge müste/ so es eigentlich vñnd stracks/ nach dem laut der worte/ d̄ leib Christi were/ wie etliche vnbescheidenlich vñnd wider sich selbst schreien. Glauben vnd bekennen der wegē/ daß das brot im Abendmal/ ein heiliges/ göttliches/ vñnd gewisses warzeichen/ Sacrament oder pfand sey/ nit eines fantastischen oder erdichteten/ sonder des waren natürlichen/ für vns warhafftig gecreuzigten/ vñnd vns warhafftig zur speyß des ewigen lebens gegebenen leibs Christi.

Bericht.

Endlich stößet S. Lucas auch die letzte opinion / nemlich des Caluini von der seligen krafft vñnd wirkung des abwesendē leibs/ samt den vorigē/ vber einen hauffen/ da er sagt/ Der leib/ der für euch gegeben wird/ Aber die krafft vñnd wirkung außershalb dem leib Christi/ ist mit nichten für vns gegeben. Zu dem spricht S. Paulus/ Wer vnwürdig isset vñnd trincket/ der isset vñnd trincket in selber das gericht. Darhalben so müssen diese wort nit nur von der krafft vñnd wirkung/ sonder ganz vñnd gar von der substanz vñnd wesen des waren leibs vñnd bluts Christi auffgenommen/ verstanden vñnd geglaubt werdē. Vñ al so viel sey gesagt vñ verstand vñ deutung der wort d̄ einseitig.

Erklärung.

Weil dieser Scribent vñ seines gleichen jrē gegēteil nicht so fönnē nemē/ so richtē sie inen selbst stropuzen auff/ vñ werdē daran zu Nitern. Wiß die verleugnüg d̄ warē gemeinschaft
des

Von der waren gegenwertigkeit
des leibs Christi habē sie leicht zustreittē/ dieweil dieselbenie
mā verfehlet. Den̄ aber/ so die ware vñ geistliche nteffung
des leibs Christi bekennen/ vnd diß erdichte leibliche essen
verneinen/ ist weder Lucas noch Paulus
zuwider.

Vericht.

Das Ander theil.

Zekunder folgt/ daß wir auch zum andern von der ge
genwertigkeit des leibs vñnd bluts Christi im H. Nachtmal
fürslich meldung thun.

Wiewol aber dieses theils rechter verstand vnd erklä
rung auß dem/ so allbereit angezeigt/ wol könne gefasset wer
den/ doch auff daß der ganze handel verständlicher werde/
ist nus vnd gut/ daß man hierin diese vier stücklein bedencke.
Für das erste/ was im H. Nachtmal gegenwertig sey. Dem
nach/ auß was vrsachen der Herz Christus alda gegenwer
tig sey. Zum dritten/ wie er könne gegenwertig sein/ so
man doch der menschlichen natur ire eigenschafft muß blei
ben lassen/ vnd Christi leib im himel ist. Endlichen/ warum/
vnd warzu er gegenwertig sey.

Das j. Capittel/

Was im H. Nachtmal gegenwer
tig sey.

As ist gewislich die vnverfälschte einfeltige warheit/
daß Christus warhafftig vnd wesentlich in seinem H.
Abendmal gegenwertig ist.

Erklä

Erklärung

Aber nicht leiblich im brot / oder da das brot ist. Denn er hat nicht gesagt / in oder bey diesem brot ist mein leib / ic. vnd nicht desto minder ist sein leib gegenwertig vnd wird geessen im Abendmal / aber geistlich / das ist / durch waren glauben vnd wirkung seines in jm vnd in vns wohnenden Geistes.

Bericht.

Nicht allein nach der Göttlichen ewigen vnd Allmächtigen natur / welche alles in allen orten erfüllet / Sonder auch nach seiner angenommenen menschlichen natur vnd das auß krafft vnd vermögen seiner selbs eigene worten im Abendmal / Das ist mein leib / das ist mein blut. Es leret aber allhie oder bestättiget niemands die vbiqutet / Das ist / daß des Herren Christi leib zugleich allenthalben sey / Auch nicht die localitet / Das ist / daß der Herr Christus an gewissem ort reumlich werde begriffen oder eingeschlossen. Dann hiervon wil Gots fürchtigen leuten nicht gebüren leichtlich vnd vorwitziglich zu disputiren.

Erklärung.

Es leret aber vnd bestättiget dennoch dieser Scribent vnd seines gleichen die leibliche gegenwertigkeit Christi zu einer zeit an vielen orten / Das ist / im himel / vnd an allen denen orten auff erden / da das Abendmal gehalten wird. Welche lere der Schrift eben so wol widerig / vnd der wegen Gots fürchtigen leuten eben so wol vngbürlich ist / als die vbiqutet / oder als die reumliche einschliessung in dz brot.

Bericht.

Sonder man handelt hie vonn des Herren Christi einsatzung vnd befelch / welcher Herr dierweil er außdrücklich sagte

Von der waren gegenwertigkeit
Wie vns die 3. Euangelisten sampt dem Apostel Paulo eine
helliglich bezugen sein leib / vnd sein blut sey alda /

Erklärung.

Christus sagt / Das / nemlich diß brot / sey sein leib / So
saget dieser / Alda sey sein leib / Noch dennoch rühmt er sich
der wort Christi.

Bericht.

Gewißlich gegenwertig / So machet vnd verschafft er
auch / das es also vollkommenlich geschehe. Warumb aber
dem also sey / soll niemands einigerley andere ursach suchen /
ohn allein diese / daß vnser Herr Christus das gesagt vnd ge-
ordnet / welcher seine ordnung vnd einsetzung gewißlich hand-
habet vnd erfüllet. Wer nun diesem Herrn Christo nit wil glau-
ben / der macht in zu einem lügner.

Erklärung.

Was thut aber der / welcher Christo seine wort also of-
fentlich verkeret / vnd seine gedicht vnd glossen für Christi
wort außgibt ?

Bericht.

Das ij. Capitel /

Auß was ursachen Christus vnser Herr
in seinem heiligen Abendmal gegen-
wertig.

Zelgemelte wort der einsetzung / da Christus spricht / Hoc
est corpus meum, Hic est sanguis meus, Das ist mein leib / das
ist mein blut / vermögen vnd bringen zu wegen / daß Chri-
sti leib vnd blut warhafftiglich vnd wesentlich im 3.
Abendmal gegenwertig seind. Dann der Herr Christus leistet
was er zusagt / so muß auch sein leib vnd blut / wie er gere-
det /

der / im Sacrament seines Nachtmals gegenwertig sein.

Erklärung.

Erstlich ist allhie zu mercken / daß es nicht einerley rede ist / wenn man sagt / Christus ist gegenwertig / vnnnd / der leib Christi ist gegenwertig. Denn weil in Christo zwo vnterschiedene naturen sind / die Göttliche vnd die menschliche / So ist diese person Christus / nach irer Gottheit vberall wesentlich gegenwertig / samt dem ewigen vater vnd H. Geist / vnd der halbē auch da das Abendmal auff erden gehalten wird / Doch also / daß er allein in den glaubigen trost vnd ewigs leben wircket. Nach seiner menschheit aber ist Christus nicht vberall / sonder zu einer zeit / nicht mehr denn an einem ort / an welchem er wil / doch one alle trennung der person / weil eben die selbe Gottheit außserhalb des angenommenen leibes an allen orten ist / welche auch in dem leib ist / vnnnd mit jm persönlich vereiniget vnd verbunden bleibet. Derhalben wenn man fragt von gegenwertigkeit der menschheit oder des leibs Christi / bekennen vnd verstehen wir zum Ersten / daß auch der leib Christi inn seinem Abendmal gegenwertig sey. Denn weil er darinnen wird geessen / muß er freilich auch darinnen gegenwertig sein. Daß er aber inn / oder vnter / oder bey dem brot sey / finden wir inn Gottes wort nicht geschrieben / Vnd kan der leib vnnnd das blut Christi sehr wol im Abendmal sein vnnnd genossen werden / ob es gleich nicht im brot vnnnd wein verborgen ist. Zum andern / weil wir sagen / der leib Christi sey im Abendmal / vnnnd sey dennoch nicht im brot / oder auff erden / So ist bald die frage / wie er denn im Abendmal sey ? Antwort / Also ist er im Abendmal gegenwertig / wie er darinnen geessen wird.

Von der waren gegenwertigkeit

Denn weil er eben darzu im Abendmal gegenwertig ist/wie auch das gegenheil vnnnd dieser Scribent bekennet/das wir in sollen essen/als die speysß des ewigen lebens/ so darff auch freilich die gegenwertigkeit des leibs Christi nit anders sein/denn die nießang. Nu ist aber die nießung nicht leiblich oder mündlich/sonder geistlich vnd geschicht durch waren glauben an Christum. Denn wir auß Gottes wort lernen/das Christum essen heisse/in Christum glauben/vnnnd durch den glauben vergebung der sünden/vmb seines sterbens vnnnd blutuergießens willen bekommen / vnnnd durch den heiligen Geist ihm eingeleibet vnnnd gleichförmig werden mit ewiger gerechtigkeit/leben vnd herligkeit. Derhalben weil diese nießung keine leibliche gegewartigkeit erfordert/sonder wir dem leib Christi als die glieder ihrem haupt / werden eingeleibet durch seinen geist/der in im vnd in vns wonet/vnd vns mit ihm verbindet/er sey stell vnd ortshalben vnns nahend oder fern/ So ist offenbar/das der leib Christi im Abendmal keines wegs leiblich oder im brot darff gegenwertig sein/vnnnd dennoch warhafftig/aber doch geistlich/wie die Schrifft erkläret/darinnen gegenwertig ist/vnd geessen wird/ob gleich wir noch nicht droben im himel/sonder herniden auff erden/vnd er nicht herniden auff erden/sonder droben im himel ist. Wie auch das blut Christi im Tauff gegenwertig ist/vnnnd wir damit warhafftig/aber geistlich gewaschen werden/ob es gleich nicht leiblich inn oder vnter oder bey dem Tauffwasser ist.

Bericht.

Das aber die Sacramentierer die ursach dieser gegenwertigkeit nit Christo/sonder viel mehr dem glauben deren so das Nachmal empfahen/vnterstehn zuzumessen/

Erklä

Erklärung.

Diß ist auch ein öffentliche Calumnia / Denn gleich wie Christus bey dem ganken predigamt ist / dadurch wideret / vnd sich samt allen seinen wolthaten allein den glaubigen mitttheilet / vnd dennoch darauff nicht folget / daß solches in der predig des Euangelij oder im H. Tauff / nicht von wegen der barmherzigkeit vnnnd genedigen zusag Gottes / sonder von wegen vnser glaubts geschehe / Also folget es auch nicht im Abendmal / Dieweil der glaub eben so wol / als dasjenige so vnns durch denselben widerferet vnnnd geschenkt wird / allein auß der grundlosen barmherzigkeit Gottes herkompt.

Bericht.

Daran handeln sie mit gewalt wider die wort der einsetzung vnnnd auch wider die wort des Apostels Pauli / welcher sagt / die jenigen so es vnwürdig empfaben / empfaben es in sich selbst zum gericht.

Erklärung.

Daß die vnwürdigen das brot niessen / vnd also schuldig werden an dem leib des Herren / leret wol S. Paulus / Daß sie aber den leib Christi essen / meldet er mit keinem wort.

Bericht.

Daß aber die vnwürdigen den glauben nicht haben / weiß jederman. So sagt auch Christus nicht / so jr glaubig seyet / so ist das mein leib / sonder zu allen Aposteln sagt er / Niemet esset / Das ist mein leib. Derhalben macht die einsetzung vnd die warheit des Herren Christi / daß sein war leib vnd blut da gegenwertig / Vnd mag diese einsetzung vnd warheit Christi in keinen weg durch jrgend einer creaturn glauben oder vnglauben

Von der waren gegenwertigkeit
ben umbgestossen / oder geschwecht werden. Dann das gan-
ze hohe geheimniß der gegenwertigkeit ist auff keines men-
schen glauben gegründet / sonder auff das wort / ordnung vñ
befelch vnsers Herrn Christi. Das ist ja richtig vñnd klar /
bedarf auch bey allen Gottsfürchtigen einfeltigen Christen /
welche Gottes ehre vñnd nicht ihre eigen weißheit suchen / kei-
ner langen disputation.

Erklärung.

Christus hat weder zu den Aposteln noch andern / weder
zu glaubigen noch vnglaubigen je gesagt / in dem brot ist mein
leib. Derhalben fordert die einsetzung des Abendmals vñnd
die warheit Christi kein leibliche gegenwert Christi im brot.
Daß er aber sagt / Das ist mein leib / ist Sacramentsweise
gredet / wie zu vor gemeldet / vñ er selbst erkläret / da er spricht /
Solchs thut zu meinē gedächtniß / Vñ wird damit die geist-
liche vñnd sonst im ganken Euangelio verheißene gemein-
schafft des leibs Christi / alle die zu diesem Sacrament komē /
angeboten / aber allein den glaubigen verheissen / gegeben vñ
versiegelt / Wie auch d bund Gottes in d beschneidung / vñ
die abwaschung der sünden in d Tauff. Denn es sich mit dē
Sacramēten helt wie mit dem wort / daß nemlich in beiden /
die vnsichtbaren gaben vñnd wolthaten Gottes allein durch
waren glauben werden entpfangen / vñnd dennoch der war-
heit Gottes damit nichts wird benomē / Sond' dieselbe viel
mehr als denn würde verlehret / so man sagen wolte / daß auch
die vnglaubigen der gnaden vñnd gemeinschafft Christi theil-
hafftig würden / dieweil diese niemanden / den allein dē glau-
bigen vō Gott verheissen werdē. Darzu sind die Sacramēte
allein den glaubigen zu versicherung ires glaubens eingefest /
Denn vnglaubigen vñ heuchlern aber / sind sie keines wegs
zugebrauchen vergönnet / sonder werden dieselben bey schwe-
rens

rem zorn vnnnd vngnad Gottes darvon abgemanet/wie S. Paulus lehret/1. Cor. 11. Auch können allein die glaubigen den rechten von Gott geordneten brauch der Sacrament halte/ außser welchem keine Ceremoni/ die krafft vnnnd eigenschafft eines Sacraments behelt. Du gehet aber freilich die verheissung der gemeinschafft Christi/ im Nachtmal so wol als inn allen Sacramenten/ allein die jenigen an/ welchen das Sacrament zubrauchen vergönnet vnd befolhen wird/ vnd welche den rechten brauch desselben halten. Derhalbē / ob gleich Christus nit eben also spricht / So jr glaubet/ so ist das mein leib/ so ist doch diß sein will vnd meinung/ daß allein die glaubigen durch dieses Sacrament sollen mit seinem leib gespeiset werden/ die es nach seinem befehl vnd ordnung brauchē. Die sich aber wider die ordnung Christi zu diesem Sacrament eindringen / die essen nicht den leib Christi/ sonder daß brot/ vnd das gericht Gottes vber sie. Vnd ist inen das brot eben der leib Christi/ wie Simoni dem zauberer sein Lauff daß bad der widergeburt war.

Bericht.

Das iij. Capitel/

Wie Christi leib warhafftig vnnnd wesentlich im Abendmal gegenwertig sey.

Je sol jederman zum eingang ernstlich erinnert sein/ daß vns nicht zukehret nach vnserem fürwitz inn diesem geheimniß Gottes zugrübeln/ wie Christi leib vnd blut inn dem Abendmal zugegē/ Dañ dieses in gemein aller menschlichen vernunfft vnforschlich vnd vnbegreiflich.

Erkld.

Von der waren gegenwertigkeit Erklärung.

Wir sollen aber auch nicht miracel dichten one alles Gottes wort / wie die thun / welche die leibliche gegenwert vnd niessung Christi im brot verfechten/sonder von dem willen vnd wercken Gottes so viel zulernen vns befließen/als er vns inn seinem wort offenbaret. Das vns Christus durch seinen Geist zu gliedern seines leibs/fleisch von seine fleisch/beine vonn seinen beinen macht / zeuget die Schrifft / Wie aber solches zugehet bleibe vns dennoch ein grosses verborgenes geheimniß / Ephet. 5.

Bericht.

Es solnoch vermag auch kein mensch darvon mehr wissen/dann das der Son Gottes/welcher dieses sein Abendmal hat eingesetzt/denen so dasselbige Nachtmal empfahen/vnter brot vnd wein seinen waren leib zuessen/vnd sein waren blut zutrincken gebe / welches inn den glaubigen wircket zur seligkeit / In den Gottlosen aber/wa sie nicht bekeret werden / zum gericht vnd verdammniß.

Erklärung.

Das der leib Christi in oder vnter dem brot/vnd sein blut in oder vnter dem wein sey/leiblich geessen vnd getruncken werde/ auch vonn den vnglaubigen/vnd also leiblich geessen in jnen die verdammnis würcke/ stehet in Gottes wort niergend geschrieben. Dargegen aber vermag Gottes wort Erstlich/das wir das fleisch Christi essen/vnd sein blut trincken müssen/so wir ewig sollen leben. Zum andern/Das dis essen vnd trincken sey / in Christum glauben/vnd durch solchen glauben entspahen vergebung der sünde/vnd durch soltigkeit für Gott/vnd H. Geist/ vmb des für vns gegebenen leibs

leibs vnd vergossenen bluts Christi willen/vnnd durch denselben Geist/der in Christo vnd in vns wonet/dem waren leibe Christi/als die glieder dem haupt/vereiniget vnnd eingeleibet/vnnd je lenger je mehr/bis ins ewige leben/gleichförmig gemacht werden/wie Johan. 6. vnd an vielen orten die Schrifft leret. Vnd zum dritte/das Christus dieser niessung vnd gemeinschafft seines leibs vnd bluts vns zuuersichern/vnnd je lenger je mehr theilhaftig zumachen / die niessung brots vnd weins in seinem H. Abendmal hab eingesezt/Vñ solches vns zuleren vnd gewis zumachen/nach art aller Sacramenten / das brot seinen leib/vnnd den kelch sein blut genennt/Sonderlich weil auch er selbst vnd seine Apostel diese wort also erklären / Dis thut zu meinem gedächtnis / Dis ist das newe Testament inn meinem blut/Dis brot vnnd dieser kelch ist die gemeinschafft des leibs vnnd bluts Christi. Derhalben nicht jene/sonder diese lere vom Abendmal zu wissen vnd zuhalten ist.

Bericht.

Also viel können vnnd sollen wir auß dem warhafftigen gewissen wort vnser lieben Gottes wissen. Weiter aber / wie vnd auff was weiß / das geheimniß zugehen vnnd geschehen möge/sollen wir dem Son Gottes/vnserm Herren Jesu Christo/welcher zu gleich Allmechtig vnnd warhafftig ist/beschlen vnnd heimstellen. Vnd nach dem wir Gottes verborgene geheimniß mit vnser blinden vernunft nicht können außgründen vnd fassen/sollen wir derhalben Gottes wort nicht beschuldigen / als ob es dunckel oder vnwarhafftig sey/ viel weniger ist vns erlaubt Gottes wort zubeugen/wie menschliche vernunft die sachen außrechnet. Wir sind der hohen theuren gaben Solichs worts nicht wert/Ich geschweige /

O leut

Von der waren gegenwertigkeit
leut seyen/die da macht haben einigen spruch auß Gottes wort
nach vnserer eigenē gefallē vñ gutdunckē jrgeds hin zuzwingē.

Erklärung.

Das wir Gottes wort nicht sollen beschuldigen/als es
dunckel oder vnwarhafftig were / auch vns nicht sey erlan-
bet/dasselbenach außrechnung vnser vernunft zubengē / ist
recht geredt. Das aber gottes wort die leiblich gegenwertigkeit
vnd niessung des leibs Christi lehre/ist noch von niemand er
wiesen. Derhalben es damit nicht außgerichtet ist / wenn
man von Gott vnd seinen wercken dichtet vnd treumet was
man wil / vnd wenn man oberwiesen wird. das Gottes wort
darwider streittet/als denn ein grosses geheimniß vnd wun-
derwerck darauff macht / vnd dem Son Gottes befehlen vñ
heimstellen wil/wie es zugehen vnd geschehen möge/ Sond
diß heist Gottes spottē / vñ in zum lügner machē / vñ allen ir-
thumē vñ kehereiē / sie sind so gröblich vñ offentlich wid Got-
tes wort als sie wollē / thür vñ thor auffthun. Den Gott wid
sein wort vnd ordnung nit handlē wil / Auch nit allezeit wird
gestattē / dz seine Allmechtigkeit vnd warheit zū schandekel vñ
menschliche gedicht vñ abgötterey gezogen werde. Spricht der
wegē alhie / leider / vñ Scribēt vber sich vñ seines gleichē selbst
dz vrtail. Den nit wir / sond die jenigē Gottes wort nach irem
gefalle vñ mutwillē biege vñ zwingē / welche die wort Christi
da er dz brot / dz wir zu seinē gedächtnis sollen essen / seinē leib
neñet / dahin wollē biege vñ zwingen / dz sein leib im brot sen /
vñ mündlich geessen werde / vñ sölich jr gedicht zuerhalē / die
Artickel vnserer allgemeinē Christliche glaubens / vñ so viel kla-
re sprüch vñ Schrifft / von d warē menscheit / von dem beywe-
sen vñ abwesen / von der niessung vnd gemeinschafft / von d
wonung Christi in dē gläubigē / vñ vñ seinem Abendmal / so
bößlich

bößlich vñ freuentlich mit frebde vñ in d' Ehrlichkeit vnerrhö-
ten glossen/ sich vntersehen zuverdunceln vnd zuuerselsche.

Bericht.

Auff solche weiß möchte man aller fragen/ die vnnötig vnd
ergerlich/ oberhaben sein/ Als da seind/ wie Christi leib im 5.
Machmal gegenwertig sey / Ob die eusserliche Element ver-
wandelt vñ transsubstantzirt werden/ Ob Christus an einem
ort reumlich sey/ vnd sich einschliessen lasse/ vnd dergleichen.

Erklärung.

Diß alles ist durch die erdichte leibliche gegenwert Christi
auff die ban komen/ vnd vor der Pöpstischen Abgötterey vñ
verfelschung der lere/ in der Christenheit vnbekant gewesen.

Bericht.

Dañ wir sollen an dz sprüchlein Cyrilli gedencen vnd dar-
nach vns halten/ nemlich/ Wenn Gott wircket/ sollen wir nit
fragen/ Wie gehets zu: wie ist's möglich: Sonder in den Herzē
sollen wir allein seiner göttlichen werck weiß vnd wege wissen
lassen. Item da er auch weiter sagt: Wenn jemand's in Gottes
wercken kompt mit der frag: Quomodo? wie gehets zu: der lesset
sich bald mercken/ daß er einen stolzen geist habe.

Erklärung.

Darauff ist zweyerley antwort. Zum ersten/ da Gott
nicht offenbaret wie etwas zugehe/ Ist es ein stolz vnd für-
wis zu forschen/ Als/ wie wir durch den H. Geist mit Christo
verbunden werden/ &c. Da er es aber in seinē wort offenbaret
vnd vns zuternien beffhlet/ Ist es ein demütiger vnd ihm ge-
felliger gehorsam/ fleißig darnach forschen/ vñ dargegen ein
stolz vnd verachtung Gottes/ dasselbe nicht wollen lernen/
Als/ wie wir Christum müssen essen / nemlich nicht leibs-
lich/ sond geistlich/ wie obgemeldet/ vñ was dieses essen sey.

D i j Zum

Von der waren gegenwertigkeit

Zum andern/da auß Gottes wort were erwiesen/das der leib Christi im brot sey / vnd durch vnsern mund inn vnsern leib eingehe/ weren wir bereit solches zuglauben / one alle frage/ wie es zugienge/oder möglich were. Weil aber solches noch nte geschehen / darff das gegentheil nit klagen / das wir fürwichtig forschen/wie solches geschehe/oder möglich sey/ Denn wir sind mit einander noch in der vorgehenden frage/ob solches geschehe oder nicht.

Bericht.

Nach jetz gethaner warnung ist leichtlich abzunemen/ wie man der Sacramentierer obiection vnd einred/ von eigenschafften beyder naturen in Christo begegnen solle. Ire einrede ist diese. Diweil Christus einen waren menschlichen leib hat/ So muß man jm auch die art vnd natur lassen/ die menschlichem leib zugehört. Nun ist aber das eines menschlichen leibes art/dasß er zu einer zeit nit allenthalben ist / sondern auff ein mal nur ein gewiß ort erfüllet. Derhalben (sagen sie) kan es nit war sein das Christi warer vñ natürlicher leib im Abendmal außgetheilet vnd empfangen werde.

Erklärung.

Leiblich kan er freilich nicht außgetheilet werden/das ist/also dasß er im brot sey/vnd in vnsern mund gehe. Durch seinen Geist aber können wir wol mit ihm verbunden vñnd vereiniget/vñnd jm als glieder eingeleibet werden/ob gleich er im himel vñnd wir auff erden sind/ Diweil diese vereinigung vnd gemeinschafft dadurch weder gehindert noch gefördert wird/es sey der leib Christi vns stelle vnd ortes halben nahend oder ferne/er mit vñns auff erden/oder wir im himel mit jm/oder wir auff erden vnd er im himel/ıc.

Bericht.

Bericht.

Darauff merck diese gründlicher ware Antwort/ Wenn mā nur vñ einer natur Christi/ d̄ Götliche od̄ menschliche/ in sonderheit handelt/ so behelt man die eigenschafft einer jeden natur allein zugehörig. Dargegen aber so off̄t von der ganzen person/ inndero Christus warer Gott vñnd mensch ist/ inn gemein gered wird/ muß man Christum nicht zertrennen oder von einander reißen/ Sondern verstehen die ganze person/ welche zu gleich warer Gott vñnd mensch.

Erklärung.

Der Seribent thut gleich als wolte er gern sagen/ so er nur döffte/ Wenn man von v̄ menscheit in sonderheit redt/ so ist sie ein ware menschliche natur/ Wenn man aber von der person redt/ so ist die menscheit inn derselben nit mehr ein ware menscheit/ hat auch nicht mehr die eigenschafften einer waren menschlichen natur/ vñnd in summa / Sie ist vñnd ist nicht ein ware menscheit/ darnach vñs gefelt von jr zureden. Was ist aber dieses anders/ denn ein fantastische vñnd Manicheische menscheit in Christo machen? Derhalben wir dar gegē lehre / auß grund Götliches worts / daß die menscheit Christi ein ware menscheit sein vñnd bleiben/ vñnd die eigenschafften beyder naturen müssen behalten werden/ auff daß man die vermischung der naturen inn Christo vermeide/ Man rede von einer natur allein / oder von der ganzen person. Vñnd wird also nicht ein enderung im wesen oder eigenschafften der naturen / sonder nur ein vnterscheid im reden/ Nemlich/ Daß man von einer Natur nicht sagen kan / was der andern zugehöret/ Als/ Man kan nit mit warheit sagen/ die Gottheit ist von der jungfraw geboren / ist gestorben/ ist

Von der wahren gegenwertigkeit

zu einer zeit nur an einem ort / Item / die menschheit ist one anfang / Allmächtig / Schöpffer himels vnd der erden / zugleich an vielen oder allen orten / *re.* Aber von der person Christi kan man wol sagen / was nur der einen natur zugehörig ist / aber doch also / das es nur von derselben natur verstanden werde / welcher es zugehöret / Vñ diß von wegen der persönlichen vereinigung dieser zweyer vngleichen naturen / Als man sagt recht vñnd mit warheit / Christus oder Gott / das ist / diese person / die warer Gott ist / die ist von der jungsfraw geboren / gestorben / vñnd zu einer zeit nur an einem ort / Aber nicht nach der Göttlichen / sonder allein nach seiner menschlichen natur / Item / Christus oder dieser mensch Christus / ist ohne anfang / Allmächtig / Schöpffer himels vñnd der erden / zugleich an allen orten / Aber nicht nach der menschlichen / sonder allein nach seiner Göttlichen natur. Also sagt Paulus / Christus ist auß dem samen Abrahams / nach dem fleisch / Vñ Petrus / Er ist gestorben / hat gelitten / am fleisch. Vñ wird dennoch damit die person nicht getrennet / Denn die vngleichheit vñnd vnterscheid der naturen / verhindert nicht die verbindung derselben zu einer person / Wie auch der mensch darumb nit wird getrennet / ob er gleich verstehet / gedenckt / vnsterblich ist / nicht mit dem leib / sonder allein mit der seelen / Item isset / trincket / schlefft / sihet / sehet / *re.* nicht mit der seelen / sonder allein mit dem leibe.

Bericht.

Die weil dann der Göttlichen natur diese eigenschafft vnser widerprechlich zugehöret / das dieselbige Allmächtig / allenthalten sey / vñnd alles erfülle / vñnd aber ferner diese Allmächtige / Göttliche natur nach der menschwerdung Christi / sampt der menschlichen natur / mit deren sie vnser trennlich ist vereiniget / ein einzige person ist / welche heiße Christus

Ins Jesus / So folget ja darauff / daß beyder naturen eigens-
schafft / wenn man von der ganzen person redet / (wie Theo-
dorens pfleget zusagen) in gemein gebrauchet werden.

Erklärung.

Es folget aber nicht / daß sie in gemein von beyden na-
turen verstanden werden. Denn wie inn dem menschen / Leib
vnd seel ein einige person vnd ein einiger mensch sind / Also
ist in Christo die Göttliche vnd menschliche natur ein einige
person vnd ein einiger Christus / welcher Gott vnd mensch
ist. Darumb wie man von dem ganken menschen recht sagt
der mensch stehet / sitzet / isset / trincket / schlaffe / stirbt / ist sicht-
bar vnd greifflich / &c. Vnd verstehet dennoch diß nit von der
seelen / sonder allein von dem leibe / Item / der mensch ge-
dencke / zelet / ist vernünfftig / vnsterblich / Vñ verstehet den-
noch diß nicht von dem leibe / sonder allein von der seelen /
ohne alle trennung der person des menschen / Also sagt man
auch recht von dem ganken Christo / Christus oder Gott / ist
gekreuziget vnd gestorben / hat vns mit seinem blut erlöset /
Actoz. 17. &c. Vnd verstehet dennoch solches nicht von der
Göttlichen / sonder allein von der menschlichen natur / Jez /
Christus oder dieser mensch Christus ist von ewigkeit / ist All-
mechtig / ist alle zeit vnsterblich gewesen / &c. Vnd verstehet
dennoch diß nit von der menschlichen / sonder allein von der
Göttlichen natur / ohne alle trennung der person Christi / wie
oben ist gemeldet. Denn so mā beides vñ beyden naturen wolte
verstehē / so würde die vermischung vñ naturen darauff / Wñ wel-
che vñ gelert Christlich Scribet Theodoretus / nebē vñ Schrifte
vñ alle alte Lehrern vñ Christheit / also hefftig streitet / Vñ ist
daruff ein grosse künheit vñ diesen leuten / dz sie die einfeltige
zubetrogen / diesen vnd andere alte Lehrer dürffen nennen.

Bericht.

Von der waren gegenwertigkeit

Bericht.

Dann das fleisch / spricht Theodoretus / welches das wort an sich hat genomen / trennen wir nicht von der Gottheit / vñ vermischen diese zwei vereinigte Naturen doch auch nit durch einander. Hieher gehöret die ganze lere De communicatione Idiomatum. Das ist / So man die eigenschafft einer natur inn Christo zugehörig / vmb der persönlichen vereinigung willen auch der ander natur Christi zuschreibet / darnon wird anderstwo notdürffiglich gehandelt / Allein das wil ich jederman erinnern / daß man sich fleißig hüte / darmit man nicht in diesen falsche wohn gerate / als ob solche gemeinschafft der eigenschafften beyder naturen allein in blossen worten vnd gewonheiten zure den stehe / im wesen aber vñnd in den naturen selbst / finde es sich nicht also.

Erklärung.

Erstlich ist hie zubedencken / wie dieser Scribent mit sich selbst überein stimmt. Drogen hat er die vbiq̄tät / Das ist / die gegenwert des leibs Christi an allen orten verworffen / Alhie wil er / daß die gemeinschafft der eigenschafften nicht allein in worten vnd in der gewonheit zureden stehe / sonder finde sich auch im wesen vnd in den naturen selbst also. Nu ist aber die vbiq̄tät ein eigenschafft der Göttlichen natur / denn sie vnbegreiflich / vñnd zugleich vberall ist im himel vnd auff erden / Darumb wir auch recht sagen / Christus ist vberall. So denn diese eigenschafft beyden naturen in frem wesen gemein ist / warumb verwirft er diese lere / daß die menschheit oder der leib Christi / oder Christus nach seiner menschheit vnd mit seinem leib / vberall sey? Zum andern / daß communicatio Idiomatum heißt / diese gewöhnliche weise / von einer solchen person / in welcher vngleiche naturen vereiniget sind /

sind/ zureden / daß man vonn der ganzen person sagt / was doch nur der einen natur zugehört vnnnd eigen ist / wie zuuor von dem menschen / vnd von Christo ist angezeigt. Vnd ist wol zumercken / daß man der ganzen person Christi / Gott vnd menschen / vnd nicht / wie dieser sagt / der andern natur Christi / zuschreibet / was nur der einen natur zugehörig ist. Dann warumb hießen es sonst eigenschafften vnnnd vnterscheid / wenn sie mit der that beyden naturen solten gemein sein: Item wenn alle eigenschafften beyden naturen wesentlich vnd mit der that solten gemein sein / Wo würde der vnterscheid vnd die warheit beyder naturen bleiben / vnnnd was würde auß Christo vnd vnser seligkeit werden / wenn Christus nach beyden naturen ewig / Allmächtig / vnsterblich wäre / auch da er in dem grab lag

Bericht.

Darzu ist auch sonderlich wol zumercken ein herlicher spruch auß der i. Epistel Johannis am 4. Cap. Welcher diesen handel sein klar machet / vnd lautet also / Ein jeglicher Geist der Christum trennet / ist nicht von Gott. Diesen spruch haben welche / welche die Gottheit vonn der menschheit Christi haben wollen absondern / in den alten exemplaren der 3. Biblien auß geleschet / wie der kirchenhistorien Schreiber Socrates / Tripart. histor. lib. 14. cap. 4. solches bezeuget. Es ist aber / spricht Socrates / die menschheit mit der Gottheit vereinigt / also / daß es nicht mehr zwey sind / sondern eins / darumb dann auch *Matia* genennt wird *Theotokos*. Das ist / Gottes gebererin.

Erklärung.

Die persönliche vereinigung ist nicht ein vergleichung oder vermischung zweyer naturen / dadurch sie beyde einen eigenschafften bekommen / Sonder ein vnerforschliche

P verbin

Von der waren gegenwertigkeit

verbindung zweyer vngleichener naturen / darinnen sie beyde
ire sonderliche vnterschiedene art vnd eigenschafften behal-
ten / vnd dennoch ein einiges lebendiges vernünfftiges ding
mit einander machen. Darumb redt man recht / Maria hat
Gott geboren / das ist / ein solche person / ein solches kind / wel-
ches warer Gott ist / Sie hat in aber geboren nicht nach sei-
ner Gottheit / sonder allein nach seiner menschheit / Oder / das
eben so viel ist / seine menschheit / aber nicht seine Gottheit ist
von Maria geboren. Denn nach seiner Gottheit ist er nicht
von Maria / sonder von Gott dem vater von ewigkeit gebo-
ren. Dieser vnterscheid der naturen in syren eigenschafften /
trennet die person nicht / wie obgemeldet.

Bericht.

Nach dieser Regel des S. Euangelisten / vnd Apostels
Pauli / haben hernacher die Christlichen reyne Scribenten von
Christo auch geredet. Dann Johannes Marientius zeucht an
die lere Cyrilli / vnd spricht also: So jemand das wesen oder
substanz beyder naturen trennet / nach dem sie in der einzigen
person Christo Jesu vereiniget sind / vnd füget sie zusammen /
alleindurch die beywohnung / nach irer würdigkeit vnd macht /
vnd saget nicht viel mehr / daß zwo naturen inn einer person
mit einander vnzertrenlich vereiniget sind / der sey Anathema /
das ist / verflucht. Also schreidt auch Gregorius ad Didonium.
So jemandt saget / es seyen zwo naturen in Christo nicht na-
türlich mit einander vereiniget / der müsse von der rechten ver-
einigung gar nichts wissen. Fulgentius schreibet an den kö-
nig Trasimundum. Gott ist nicht vermischet mit dem menschen /
sondern vereiniget. Dann er hat mit gewissen anzeigungen be-
wiesen / daß in einer person beyde naturen bleiben / damit der
ware Gott / vol warer Göttlicher krafft vnd herligkeit / in der
angenommenen menschheit herlich glenze / vnd die ware ^{mensch}liche

liche Schwachheit waren vnd rechtschaffenen menschen inn Gott klärlich bezeuge. Weiter spricht er: Der mensch Christus hat gleich so grossen gewalt empfangen da er sein seel konnte von sich geben/als er wolte/gleich wie grossen gewalt auch hat die Gottheit Christi können haben/bey welcher allwegen wollen vnd können eins ist.

Erklärung.

Diese sprüch sagen alle vonn vereinigung der zweyen naturen/welche viel mehr vnd höher ist/denn die wohnung der Gottheit in den Heiligen/Item/sie sagen von Allmächtigkeit dieses menschen Christi / aber nicht seiner menschheit. Item/sie leren nicht / Sonder widersprechen / die vergleichung der naturen / vnd sind derhalben/wie auch alle dieser vnd anderer Alten Lerer Schriffien diesem Scribenten also stracks vnd öffentlich zuwider/das er sich billich sie zunennen schämen sollte.

Bericht.

Nach diesem allem wollen wir nun etliche exempel betrachten/vnnd gegen obgemeldter ersten obiection oder einred halten/Dann damit kan sie auch sein widerlegt werden. Gewis ist es / das einem natürlichen menschlichen leib ebenso wol der natur nach vnmöglich ist / durch verschlossene ort / ohn verfehrgung derselbigen zukommen / als vnmöglich ihm ist auff ein zeit zugleich an vielen orten zusein. Nun bezeuget aber die Euangelische Historien / Christus sey auß dem grab also aufferstande / das weder der stein noch das sigil vonn seinem ort beweget / oder entzogen worden / vnnd sey darnach auch durch verschlossene thür zu seinen Jüngern kommen. Derhalben folget / das auch das wider menschlichs leibes eigenschafft sey geschehen.

Von der waren gegenwertigkeit

Aber was Christus wil/das richtet er durch sein Allmächtiges wort auß/wider alle ordnung der ganzen natur/wie er auch befolhen vnd durch sein wort zuwegen bracht hat/das Petrus auff dem Meer/gleich als auff trucknem land/ist gangen. Cyrillus spricht von dem aufferwecktem leib Christi/Niemand sol fragen/wie Christi leib durch verschlossene thür sey eingangen/. Diweil man hört das der Euangelist solches nicht von einem gemeinen schlechten menschen/sonder vom dem Allmächtigen Son Gottes schreibet/Dann weil er warmer Gott ist/so ist er dem gemeinen lauff der natur nicht vnter woiffen/sond er heischet vber alles/wie seine ande wundwerck genugsam bezeugen. Dann was er gethan hat/ist weit vber aller Creaturen weißheit vnd verstand. Dann sage mir/wie ist er auff dem Meer gangen/als auff druckenem land/so doch des wassers natur ist/das es natürlicher weiß zureden/keins menschen leib embor tregt? So du nun in diesen hohen wercken/Gottes grosse krafft vnd allmacht nicht verstehen ober fassen kanst/warumb klagest du nicht viel mehr vber deine eigne blindheit? Warumb schweigest du nicht still/vnd leßest dir an der maß genügen/welche dir dein Gott vnd schöpffer gegeben hat? Solches alles sagt Cyrillus. Desgleichen schreibet auch Ambrosius im 9. buch de his, qui inuitantur mysterijs. Warumb fragest du hie/wie es der natur nach geschehen könne/so doch er/der Herz Christus/vber vnd wider die natur auß einer jungfrawen geboren ist? Verhalben so man rund darvon reden soll/ist dz die einfeltige/gründliche summa dieser ganze disputacion: Wenn Gott außserhalb gemeiner natürlicher ordnung etwas thun wil/so leßt er sich nicht binden an gemeinen lauff der natur/oder an die Regel/auff welche menschliche vernunfft inn allen natürlichen künsten sibet/wie solches alle Artikel Christlichen glaubens krefftig bezeugen.

Erklärung.

Diese beweisungen sind nicht so fein/ als M. Selnecker
meinet/ Denn sie mit vielfeltiger antwort leichtlich abzulei-
nen sind. Erstlich glauben wir festiglich von Christo alles
was die Schrift von im zeuget/ Daß er aber mit seinem leib
an vielen orten zugleich / oder im brot sey/ finden wir nier-
gend in Gottes wort von im geschrieben. Zum andern/
daß er seinen leib auß dem grab gefürt/ damit auff wasser vñ
luft gewandelt / vñnd was dergleichen ist/ sind solche ding/
die auch an anderer menschen leiben geschehen sind / vñnd an
vnsern geschehen werden/ vñnd folget darauß keines wegs/
daß vnser oder Christi leib/ auch zugleich an vielen orten seie.
Denn diß allein der Göttlichen natur zugehör. Zum drit-
ten/ daß der leib Christi durch dz verschlossen grab vñnd thür/
wie ein geist/ sey gedrungen/ also daß im der stein/ vñnd thür
nicht gewichen sey / mag auß der Schrift nicht erhalten
werden / Vñnd sollen wir den wunderbaren wercken Gottes
nicht vnser gedichte zulegen/ sonder so viel darvon glauben
vñnd sagen/ als Gott vns leßt wissen. Ob Christus vor oder
nach abgewelstem stein / wie etliche alte Scribenten niche
one vrsach halten/ sey erstanden/ sagt der text nicht außdrück-
lich / Aber dennoch weil die hütter erst vñnd dem Engel ge-
schreckt / vñnd gestochen sind/ der den stein hat abgewelket/ ist
nicht vermutlich / daß der Herr schon zuuor heimlich sey er-
standen gewesen/ also daß es die hütter nit gewar weren wor-
den. Da aber gleich der stein erst hernach were abgewelket
worden / hette doch niemand keine vrsach billicher zugeden-
cken/ daß der leib Christi zu einem geist worden/ denn daß der
stein/ so wol als die thür / die verschlossen war / da der Herr
zu den Jüngern kam / durch Göttliche krafft von einander
P. iij. gewichen/

Von der waren gegenwertigkeit

gewichen / vnd widerumb zusammen gangen were. Zum vierdten / Da gleich auch diß auß der Schrifft lönde bewiesen werden / daß er durch stein vnd holtz gedungen were / one weichung derselben / so folgete dennoch darauff nicht die leiblich gegenwertigkeit an vielen orten / Denn jenes auch etlichen andern creaturen / als den geistern / gegeben ist / Diß aber wil im das einige unbegreifliche Götliche wesen allein für behalten haben / sich damit wie mit andern mehren eigenschafften / von allen erschaffenen dingen / auch von dem leib vnd seele / die der Sohn Gottes an sich genommen hat / inn ewigkeit zuunterscheiden.

Vericht.

Es ist auch das gewiß / daß das Sacrament des Heren Nachtmals / nicht ein natürlich / sonder himelisch vnd Götlich werck ist / welches bestehet vnd krefftig ist / nicht diuvel es die natürliche ordnung also gibt / sonder diuvel es Christus also geordnet vnd eingesetzt hat. Soll vns derhalben die Regula des S. Apostels Pauli / wie der Alte Lerer Basilius sagt / immer inn vnsern ohren klingen / da er spricht: Ein weib sol still schweige in der gemein / Das ist / die philosophia oder menschliche weißheit sol die lehr / darauff sie gegründet / vnd damit sie natürliche ding vrtheilet / mit nichten also schendlich missbrauchen / daß sie damit die Artikel vnser Christlichen Glaubens vnterseehe zu widerfehren. Dann der Sohn Gottes ist warhafftig / vnd kan das so er verheissen hat / wol leisten / also daß auch beyder naturen eigenschafften in ihm ganz vnd vnueruckter bleiben. Es sol vnns aber niemands zumessen / als ob wir Christum on vnterscheid an alle ort vnd end vnterseehen anzubinden / Sonder wir sagen allein / daß er leiblich gegenwertig sey in dieser handlung / zu welcher er sich in seinem wort selbst verpflichtet vnd verbunden hat.

Erklärung.

Was allhie gemeldet wird/von der ordnung Christi/von der menschlichen vernunft/von d'warheit vnd macht Christi/bekennē wir so wol als dz gegenteil. Allein were zuwünschē/weil der Scribēt sagt/das Abendmal sey ein himlisch werck/vnd diß one zweuel von d'niessung Christi verstehet/Daß er dabey gedächte/das die himlische speiß Christus/nit von den gotlosen/welche der himlischen ding nit fähig sind/auch nicht mit dem jrdischen munde geessen werde/sonder daß der leib Christi vonn vnns wol könne geessen werden/ob gleich wir auff erden vnnnd er im himel ist. Auch weil er ihm nicht will lassen zumessen / daß er den leib Christi an alle ort vnd ende anzubinden sich vnterstehe/sonder wil in allein im brot des Nachtmals leiblich gegenwertig haben / so solte er billich bedacht haben / was diß für ein ströen argument vnnnd vergebliches / ja allhie von ihm selbst widerlegtes geschwehe sey/das er vnd seines gleichen fürgeben/Wenn der leib Christi nicht wesentlich bey dem brot im Abendmal were/so wol als die Gottheit / so würde die person Christi getrennt. Denn weil bey anderm brot/vnnnd andern orten im himel vnnnd auff erden wol kan die Gottheit sein / da der leib Christi nicht ist / vnnnd wird dennoch daselbst die Gottheit vonn dem leib nicht getrennet / warumb solte denn solche trennung folgen / ob gleich auch bey diesem brot der leib Christi nicht wesentlich gegenwertig ist / wie die Gottheit. Sētilich daß er sagt / Christus hab sich inn seinem wort zu der leiblichen gegenwert im Nachtmal verpfflichtet/da begeren wir dasselbe wort zuhören vnd zu sehen/

ist aber noch vonn niemanden

dargethan.

Bericht.

Von der waren gegenwertigkeit

Bericht.

Aber hie schreyen die Sacramentierer / So hieß ich wol/
ir meinet / der leib Christi sey allenthalben / sey Allmächtig / vnd
vermöge eben das alles was Gott selbst : Antwort / So man
allein mit den gedanken in Christo die menschliche natur von
der Gottheit vnterscheidet /

Erklärung.

Was dieses für ein rede sey / daß man allein mit gedan-
cken in Christo die menschliche natur von der Gottheit vn-
terscheidet / lassen wir alle Christen vrteilen. Den sind die na-
turen nit in d' that vñ warheit vnd in jrem wesen / sond' allein
mit vnseren gedanken von einander vnterscheiden / so wird
Christus nur mit gedanken wader mensch vnd Gott sein.

Bericht.

So kan ja nicht gesagt werden / daß Christi leib allent-
halben sey / So man aber in gemein redet von der ganzen per-
son Christi / in welcher die Göttliche vñnd menschliche natur
vnzertrenlich vereiniget sind / so ist's recht vñnd war geredt /
Christus ist allenthalben /

Erklärung.

Es ist aber nicht recht vnd war geredt / Die menschheit/
oder die seele vñnd der leib Christi ist allenthalben / Auch nit /
Christus mit oder nach seiner menschheit / seel oder leib / ist al-
lenthalben / wie zuvor erkläret.

Bericht.

Vnd kan machen daß sein leib sey allenthalben wo er wil.

Erklärung.

Daß er aber wil machen / daß sein leib im brot oder an
vielen

vielen oder allen orten zugleich sey / ist noch nicht bewiesen.
Dargegen daß er es nicht wil / die ganze Schrifft / vnnnd die
Artikel vnserer allgemeynen Christenglaubens zungen.

Bericht.

Warumb: Dann er ist Allmächtig / vnd ist auch warhafft.
eig / vnnnd helet gewiß vber seiner einsetzung / In welcher diese
wort außdrücklich stehen / Das ist mein leib / ic.

Erklärung.

Es stehet aber niergend / in oder vnter / oder bey diesem
brot ist mein leib. Vnnnd hat der Scribent droben im ij. Cap.
des j. teils selbst müssen zu geben vnd bekennen / daß die Alt
diese wort Christi / das ist mein leib / nicht vnrecht also haben
erkläret / diß brot ist ein zeichen meines leibs.

Bericht.

Darff sich aber hie niemandt vber der ubiquitate hoch be-
sinnen / das ist / disputiren / wie Christi leib allenthalben sey /
sond mā fraget hie allein von d ordnung vñ warheit Christi /
des Allmechtigen Herren.

Erklärung.

Diese ordnung schreibt er vns in seinem wort also für /
daß er im ersten Abendmal mit seinem einige / waren / mensch-
lichen / sichtbaren / vnnnd mit vnserer schwachheit beladenen
leib / vnter seinen Jüngern bey tisch geseßen / vnnnd nach sei-
ner aufferstehung mit demselben verklärten vnd herrlichen /
aber doch einigem / waren / menschlichen / fleischenen vnnnd
beinenē / greiffliche vnd sichtbaren leib / warhafftiglich von
der erden hinweg / hinauff gen himel gefaren / vnd daselbest
ist vnd bleibet biß ans end der welt / Vnd vns das brot vnnnd
Q wein

Von der waren gegenwertigk eit

wein ir seinem .h. Abendmal/ zum gewissen gedächtniß vnd
vrfund sei iewer wolthaten vnnnd vnser gemeinschafft mit jm/
hat heißen niessen/ biß daß er widerkومت.

Bericht.

Wiewol aber war ist/ daß ein leib ein leib ist/ vnnnd leibs
natur behelt/ jedoch so ist dargegen auch das war vnd gewiß/
daß/ wo Christus ist/ da ist er warer Gott vnnnd mensch/
Es kan auch niemande irgend ein einigen ort gedenccken oder
erdichten/ da er nicht zugleich warer Gott vnd warer mensch
sey/ Darumb so viel die natürliche weiß vnd art des leibs in
person Christi belangt/ sollen wir nichts vntersehen zuschlies-
sen/ So es aber je auff einer seiten müste geirret sein/ wolten wir
lieber vnserem lieben Gott mehr zueignen/ den daß wir seinem
S. wort nicht glauben/ vnnnd zu wenig trawen solten.

Erklärung.

Allhie ist zusehen/ wie gewiß diese Theologē irr lere sind/
vmb welcher willē sie alle/ die der selbe nit beyfallen/ für kēner
schelten/ So sie doch selbst nit wissen auff welcher seiten sie
jren. Wir aber wissen/ dz Gott eben so wenig wil dz wir vō
jm sagen/ das er vns nit geleret/ als daß wir das jenige von
jm leugnen/ das er vns in seinem wort zuglauben vnd zube-
kennen befolhen hat/ Vnd daß der Sohn Gottes nach sei-
ner menschwerdung zu allen zeiten vñ orten/ warer mensch/
das ist/ mit seiner ein mal angenommenen menschheit per-
sönlich vereiniget vnnnd verbunden ist vnd bleibet/ ob gleich
seine Gottheit vberall/ seine menschheit aber auff eine zeit
nur an einem ort ist/ als/ in der jungfrawen leib/ in der krip-
pen/ am creuz/ im grabe/ 2c. vnd sekund droben im himmel.
Denn eben dieselbe einige vnbegreifflche Gottheit/ die auß-
serhalb ihrem angenommenen leib an allen orten ist/ die ist
vnd

vnd bleibt auch zugleich inn dem leib / vnd mit demselben verbunden.

Bericht.

In der gelerten versammlung vnd gesprech zu Marburg / im jar 1529. gehalten / hat Oecolampadius jetz gemeltes Argument mit diesen worten vorgeworffen: Christi leib muß sein ort vnd raim haben / wie der Scribent Fulgentius in andern buch / de immensitate Dei. redet. Der halben folget / daß er einen gewissen ort vnd raim in habe im himel / vnd nicht im Abendmal. Hier auff hat D. Luther geantwortet / Fulgentius rede da selbst nicht vom Abendmal /

Erklärung.

Es leret aber Fulgentius / daß der leib Christi zu keiner zeit an mehren orten denn an einem sey. Der halben wil er diß auch im Abendmal nicht / wie auch alle Patres vnd die ganze Schrifft. Denn weil die lehr Fulgentij / daß Christus nach seiner menschheit auff ein mal nur an einem ort ist / nach D. Luthers vnd dieses Scribenten bekēnntiß war ist / So folget / daß er nicht inn allen oder inn vielen broten ist / es sey im Nachmal oder auff demselben.

Bericht.

Sondern hab also geredet wider die Manicheer / vnd andere Ketzer / welche laugneten / daß der Herr Christus warer mensch sey / damit zu beweisen / Christus hab einen waren menschlichen leib / dieweiler an einem gewissen ort / nach eines waren leibs eigenschafft gewesen ist.

Erklärung.

So aber denn gewiß ist / wie es ohne zweuel ist / daß zu einem waren menschen gehöret / Daß er zu einer zeit nur an einem ort sey / So würde folgen / daß Christus

Von der waren gegenwertigkeit

zum wenigsten dennoch zur selben zeit/da das Abendmal gehalten wird / nicht ein warer mensch bliebe / vnnnd also den Manicheern vnd ihres gleichen die thür auffgethan. Denn diese folge s/he jederman verstehen kan/ Eines waren menschlichen leibs art vnnnd eigenschafft ist diese / das er einmahl nur an einem ort sey. Tu ist aber nach des gegenteils meinung der leib Christi im Abendmal auff eine zeit vn sichtbar vnnnd vnbestndlich an vielen orten / Derhalben würde nach dieser lehr folgen / das Christus nicht einen waren menschlichen leib hette.

Vericht.

Zu dem so erkläret sich Fulgentius selbst/da er sagt: Christi laß vnd blut werde offeriert / das ist / dargereicht werden / nicht allein eine figur / gedächtniß / oder erinnerung heißt / als wenn man spricht : Heut ist des Heren Himelfart / Das ist / heut erinneren wir vnns der himelfart Christi / Sondern offerir heißt / dargebotten werden zu essen vnd zutrincken.

Erklärung.

Christus vnnnd alle seine Himlische güter werden vns auch in seinem Wort dargebotten vnd gegeben / Folget aber darauff eben so wenig ein leiblich dargeben vnd nemen / das mit Händen vnnnd Mund des leibs geschehe / als im Sacrament.

Vericht:

Über das alles / wenn Fulgentius vnnnd andere Lerer derselben meinung gewesen / wie sie doch mit nichten sind / so muß man doch wol wissen / das alles was die alten Lerer geschrieben haben / soll vnd muß gegen der 3. Schrifft gehalten vnd verglichen werden / vnd wo sie die Schrifft anders auflegen / dann sie sich selbst erkläret / soll es glimpflich verstanden werden /

den, wo es sein kan / Wo aber nit / soll man dieselben Schrifften ganz vnd gar lassen sabren / ehe wir von dem reinen / vnbetrieglichen wort Gottes abtreten.

Erklärung.

One zweifel ist allen Scribenten nicht mehr zuglauben / denn sie mit grund der Schrifte sagen / Warumb soll aber dis nicht auch in D. Luthers vnnnd aller newen Lere Schrifften vnnnd Lere gelten? Oder sind diese nicht eben so wol menschen / als die Alten? Derwegen weil wir gewiß wissen / das alle Alten Lere einträchtiglich / vnd mit der H. Schrifte die leiblich gegenwert Christi an vielen / oder an allen orten / verwerffen / Sollen wir billicher bey jnen bleiben / denn zu der nachkomen Newen Lere vns begeben.

Bericht.

Auß diesen kan man nun auch erklären / was es geredet sey so man spricht: *Christum esse perigrapton somati*. Das ist / Der Herr Christus könne seinem leib nach umbzielet vnnnd umbfangen werden / wie Nazianzenus / Theodoretus / vnd andere reden / Nämlich / nichts anders / denn daß Christus einen waren menschlichen leib haß / dieweil er wie Theodoretus redet / dz an jm hat / das einem menschlichen leib von natur eignet vnd gebürt / nemlich / das er seinen raum habe / etc.

Erklärung.

Die Lehr von der waren menscheit Christi / welche wir auß Gottes wort / mit der alten Christlichen kirchen bekennen / muß auch dieser Scribent / one seinen dank lassen war bleiben / wie wol er sie gern wolt glosiren vnnnd verstreichen. Denn es leren vnd reden die Alten nicht allein / wie er redet / daß Christus könne seinem leib nach / umbzielet vnd umbfangen

Von der wahren gegenwertigkeit

gen werden / gleich als wolt er sagen / der leib Christi könne wol umbzielet sein / aber sey gleichwol nicht umbzielet / die weil er zu einer zeit an allen oder an vielen orten ist / Sonder sie sagen rund vnd außdrücklich / daß die menschheit Christi für vnd für umbzielet sey vnd bleibe. Denn dis ist die art vnd eigenschafft eines waren menschlichen leibs / Ja aller erschaffenen ding / dauon die Alten reden / das sie nemlich / nicht allein können umbzielet werden / sonder sind auch mit der thadt allezeit umbzielet an dem ort da sie sind. Welches denn nicht allein erzwingt vnd so viel gesagt ist / das Christus einen waren leib habe / sonder auch das sein leib zu einer zeit nicht mehr denn an einem ort sey. Denn dieses heißet umbzielet / oder endlich / oder begreiflich sein / vnd eignet vnd gebüret einem jeden waren menschlichen leib / wie Christus selbst Luce am vier vnd zwenhifften / Da die ganze Schrifft von seinem leibe zeuget / Auch alle alten Lehrer sich erklären / Vnd alle vernünfftige menschen wissen vnd bekennen. Denn se / was an einem gewissen ort umbzielet / oder umbfangen oder begriffen sein sol / das muß nicht zur selben zeit auch an andern / oder außser demselben ort sein / inner welchem es begriffen ist / sonst were es nit an demselben ort begriffen oder umbzielet / Als wenn man sagt / die stadt ist inner der Ringmawer begriffen oder umbzielet / so versteht freilich jederman / daß sie nicht zugleich außserhalb der mawer ist.

Bericht.

Jetztund wollen wir die ander Einrede der Sacramentierer anhören / die lauter also : Christus ist auffgefahren gen himel / sitzet zur Rechten hand des Vaters / darumb so ist er nit gegenwertig im Abendmal. Also schreibet Caluinus / vnd sind das seine wort / Wenn wir sagen / daß man Christum im himel sehen

chen sol/geben wir dannit zuverstehen/dasß Christus weit von vns sey/ Dann wiewol philosophischer weisß/ vnnnd menschlichen verstand nach zureden / vberim himel kein ort oder raum ist/ jedoch weil der leib Christi seine gemessene größe hat (wie dann menschliches leibs natur vnnnd art mit sich bringet) vnd im himel/ als an einem gewissen ort begriffen wird / so muß er ja also weit von vns sein / als weit himel vnd erden voneinander sind. Darauff antworten wir runde vnd warhafftiglich / Die wort vnsers Christlichen glaubens/ sampt andern zeugnissen der Schrifft vonn des Herren Christi himelfart/ reden alle vonn der sichtbarlichen himelfart/ wie Christus nach seinem leide vnd seiner aufferstehung von seinen Jüngern sichtbarlich gen himel ist gefaren/ in welcher sichtbarlichen gestalt wir in widerumb sehen werden kommen zurichten die lebendigen vnd die todten.

Erklärung.

Christus ist nicht allein sichtbarlich. Sonder auch warhafftig von der erden hinweg/ hinauff in den himel/ mit seinem leibe gefaren/ Das ist / Nicht also/ dasß er sichtbar hinauff gefaren / vnnnd vn sichtbar hernieden blieben/ Oder sekund bis ans end der welt/ sichtbar droben/ vnd vn sichtbar hernieden sey/ Sonder also/ dasß sein leib in der that vnnnd warheit ein ander ort hat eingenomen / denn er zuuor innen hatte/ vnd an demselben ort nicht blieben ist / von welchem man ihn sach hinweg faren / Wird anch also wider herab kommen/ nicht dasß er zuuor vn sichtbar hernieden sey/ vnnnd als denn nur sichtbar werde/ sonder dasß er warhafftig in die wolcken herab come/ da er sekund weder sichtbar noch vn sichtbar ist.

Vonder waren gegenwertigkeit

Bericht.

Aber zur Rechten hand des Vaters sitzt er nicht an einem gewissen ort/nicht natürlicher/abgezirkelter/dargemessener weise/sondern herlicher weise/vnnd registert in gleicher Maier stet vnd gewalt mit Gott dem Vatter.

Erklärung.

Christus sitzt zur rechten des vaters/das ist/regirt seine kirch vnd alle ding/nach des vaters willen/vnnd erzeiget solch sein amt/in sichtbarer glori vn herligkeit/darin er auch nach seiner menscheit vber alle Creaturen erhaben ist/in an gesicht seiner Engel vnnd außermelten/welche in als ihren Herren vnnd Gott verehren/Aber doch vnuerlornere eigenschafft beyder naturen/Nach seiner Gottheit also/das er allenthalben gegenwertig/Nach seiner menscheit also/das er sekund nirgend denn im himel ist/wie die Schrift an vielen orten redet/Er hat sich gesetzt zur rechten Gottes/in der Höhe/im himel/rc.

Bericht.

Denn sihe/also erkläret Christus selbst/was er mit dieser rede/Ich sar auff zu meinem Vater/rc gemeinet/nemlich eben das/Wir ist gegeben aller gewalt im himel vnd auff erden.

Erklärung.

Allen gewalt haben/vnnd auffaren gen himmel/ist nicht ein ding. Denn Christus hatte diesen gewalt schon da er dieses redte vnnd auch zuuor/da er doch noch nicht war gen himmel gefaren/wie er selber spricht/Ich bin noch nicht auff gefaren zu meinem Vater. Item/Wir werden auch hinauff gen himel faren/vnd dennoch diesen gewalt nit haben/daruon hie Christus sagt.

Bericht.

Bericht.

Item / Ich bin bey euch bis an der welt ende.

Erklärung.

Mit seiner Gottheit vnnnd seinem Geist / ist er alle zeit / vnd vberal bey vns. Aber mit seinem leib / hat er die welt ver lassen / vnd ist jekund nicht darinnen.

Bericht.

Dieser auflegung Christi hat hernacher der Apostel Paulus nachgefolget / wie er sie dann widerholet in der Epistel zum Ephesern j cap. Mit welchem auch der 110. psalm ganz einmütiglich vber ein stimmt.

Erklärung.

Weder an diesem noch an andern orten der Schrifft wird mit dem kleinsten wort gemeldet / daß Christus mit seinem leib zugleich im himel vnd auff erden sey. Werden dervhalben die Schrifft vnnnd die Patres nur von diesen leuten genennt vnd angezogen / den einfeltigen ein farbe zumachen.

Bericht.

Also sind nachmals auch die alten Lerer der Christlichen kirchen bey dieser waren vnnnd rechten auflegung des sitzens zur rechten hand allwegen bestendiglich blieben / wie dann der Alte Scribent Basilius im buch vom h. Geist am 6. cap. am 25. blat mit außdrücklichen worten spricht / Die rechte Gottes heist nicht in einem niedrigen ort oder stand sein / wie etliche sagen / sondern mit Gott in gleicher gewalt vnnnd herligkeit regieren. Derhalben so man sagt / Christus sitzt zur rechten des Vaters / muß so viel verstanden werden / Diese person / welche hat menschlich natur an sich genommen / ist in dem geheimen rath Gottes des himmelischen Ewigen Vaters / wircket zu gleich

Von der waren gegenwertigkeit
mit dem Vater / ist ein König / welcher die Christliche Kirche
versamlet / beschützet vnd erhält / ic. Vnd wiewol er das thut
aus Göttlicher krafft / so thut ers doch in der menschlichen
Natur / in welcher die sülle der Gottheit somaticôs / dz ist / leib-
lich vnd volkomen wonet. Also das nicht eine Natur in
Christo / sonder die ganze Person / Christus Jesus / solchs al-
les wirket vnd aufrichtet.

Erklärung.

Den Spruch Basilij nemen wir gern an / bekennen auch
vnd rühmen mit der Schrift diesen vnsern höchsten trost /
das Christus in vnserm Fleisch vnd Blüt zur Rechten sei-
nes ewigen Vaters sitzet / als das haubt seiner gemein / vnd
ein Herz aller Creaturen / durch den der Vater alles erhält
vnd regiert. Diese Lehr aber bringt keines wegs mit sich / das
dasselbe vnser Fleisch vnd Blüt / welches der Son Gottes
an sich hat / an allen oder an vielen orten auff eine zeit / oder
der Gottheit an eigenschafften / krafft vnd wirkungen
durchaus gleich sey. Denn zu dem Amt des Mittlers
Christi gehören beider Naturen wirkungen / Derhalben
wircket vnd thut diese Person Christus / ein jedes stück jres
Amts nach derselben Natur / welcher es zugehörig vnd ei-
gen ist / wie in dem menschen andere wirkungen die Seele /
andere der leib hat / vnd dennoch der mensch nicht wird ge-
trennet / Vnd regiert Christus also im Himmel vnd auff Er-
den / das er mit seiner menschheit an einem ort ist zu jeders
zeit / wo vnd wie er will / vnd dennoch was er nach
seiner Gottheit vnd nach seiner Menschheit wil /
an allen orten durch die gegenwertige
krafft seiner Gottheit auf-
richtet .

Bericht.

Bericht.

So man aber dürffte gedancken / Christus sey also zur Rechten hand Gottes gesetzt / das er an einem gewissen / abgemessenen ort / nach natürlicher weis / sitze / so mußte ja auch die Rechte hand Gottes (welcher doch ein Geist ist / vnd keinen leib hat) an ein gewisses ort gebunden sein. Was es aber für ein grewliche Gotteslesterung sey / also von Gott gedancken oder reden / will ich meniglichen zuoberzigen heimstellen.

Erklärung.

Zur antwort ist allhie für das erste zu wissen / daß vnns vonn stehen oder sitzen oder anbindung Christi an einem gewissen abgemessenen ort im himel vnd dergleichen / zusagen oder zudencken in vnsern sinn nie ist komen / SOND diß alles des gegentheils sünde vnd spotwort sind / damit sie vnns bey den vnuerstendigen vermeinen in haß vnd verdacht zu bringen / Diweil sie mit der warheit nichts können schaffen. Für das ander / daß wir nicht desto minder glauben vnd bekennen / Christus sey also zur rechten seines Vaters gesetzt / dz dennoch seine menschheit zu einer zeit nie an mehr denn an einem ort / vnd nemlich jezund nicht hernieden auff erden sonder droben im himel ist / Doch nicht an diß oder jenes ort gebunden / sonder wo vnd wie es ihm gefelt vnd seiner Majeestet geziemet / vnd wir / wenn wir zu ihm hinauff komen / mit augen werden sehen. Diß aber ist keines wegs ein so grewliche Gotteslesterung als der Scribent gern darauß machen wolte. Denn solches die Schrift an vielen orten außdrücklich vnd klerlich zeuget / Die Jünger haben in durch die lufft sehen hinauff faren in die höhe / Sie phanus Act. 7. hat in gesehē stehē in göttlicher herligkeit im
 X ij himel/

Von der waren gegenwertigkeit

himmel/vnd Paulus spricht Coloss. 1. Suchet was droben ist/
da Christus ist/zur rechten Gottes sitende/2c. Wo aber vnd
wie der leib des Herrn im himel sey (spricht Augustinus De si-
de & symboio cap. 6.) ist ein fürwitzige vnd vnnotige frage/
Es ist genug das wir glauben/das er im himel sey. Denn es
gebürt vnserer schwachheit nicht/die himlischen geheimnis
zuerforschen/Sonder es gebüret vnserm glauben/vonn der
herligkeit des leibs Christi/was hoch vnd herlich ist/zugeden-
cken. Für das dritte/das die rechte Gottes in der Schrifft
auff zweyerley weise verstanden wird. Die erste ist/das die
rechte Gottes die gewalt vnd krafft Gottes heiße/wie auch
die hand oder der arm Gottes/wenn die Schrifft sagt/das
Gott etwas thue oder aufrichte mit seiner rechten hand/2c.
Diese rechte oder hand/das ist macht vnd gewalt/hat Chri-
stus alle zeit gehabt/so wol als der Vater vñ H. Geist/auch
ehe denn er ist verkläret vnd zur rechten Gottes gesetzt wor-
den/aber nach seiner Gottheit/nicht nach seiner menschheit/
Denn Christus warer Gott/vnd nach seiner Gottheit All-
mächtig war/auch da er sprach/Der Geist ist willig/aber dz
fleisch ist schwach/vñ da er am creus hangende schrie/Mein
Gott/mein Gott warumb hastu mich verlassen/ja auch da
er den Geist auffgab/vnd da sein leib tod im grab lag. Denn
die Gottheit von seiner menschheit nie getrennt ist worden/
auch da sein leib vnd seel durch den tod von einander geschei-
den waren/vnd dennoch die Gottheit vnd Allmächtigkeit
Christi gar nicht forderte oder machte/das sein leib vnd seel
zugleich an allen oder an vielen orten sein müßten. Denn da
der leib Christi am creus hing/vnd im grab lag/was er ohne
zweifel sonst an keinem andern ort/weder tod noch lebendig.
Zum andern/Wenn die Schrifft von Christo sagt/ Er sitze
zur:

zur rechten des Vaters / redt sie von ihm nach gewonheit
 der weltlichen Fürsten vnd Potentaten / welche die jenigen /
 durch die sie fürnemlich jr land vnd leut regieren / zu irer rech-
 ten pflegen zusehen / vñ wil die Schrifft damit nit anzeigen / dz
 Gott der Vater auff einem Königlichen stuel im himel sitze /
 vnd Christus neben jm zur rechten hand / (Denn Gott nicht
 ein leiblich ding oder wesen ist / welches ein rechte vnd lincke
 hand oder seite hette) Sonder sie wil durch diß von mensch-
 lichen dingen genomenes gleichniß / (wie denn Gott viel vñ
 oft von sich selbst in seinem wort vmb vnser schwachheit wil
 len also redet) zuuerstehen geben / die aller höchste Ehr vñnd
 herligkeit darein Christus nach seiner aufferstehung vnd hi-
 melfart eingangen ist / daruon er selber sagt / Luce 24. Hat
 nicht Christus diß müssen leiden / vnd eingehen in seine her-
 ligkeit. Diese herligkeit oder sitzen Christi zur rechten des Va-
 ters beschreibet Paulus zun Ephesern am ersten / mit diesen
 worten / Er hat ihnen gesezt zu seiner rechten / im himel / vber
 alle Fürstenthum / gewalt vnd macht vnd herrschafft / vñnd
 namen der genennt wird / nicht allein inn dieser welt / sonder
 auch in der künfftigen / vnd hat alles vnter seine füß gelegt /
 vnd hat in zum haupt vber alles gegeben der gemein / welche
 sein leib / vnd die vollomenheit ist desselben / der doch alles in
 allen volkomen macht. Vnd Philip. 2. Drum hat in Gott
 zum höchsten erhaben / vnd im geschenckt einen namen vber
 alle namen / daß in dem namen Jesu alle knie sich biegen des-
 ren die im himel / vnd auff erden / vñnd vnter der erden sind /
 vnd alle zungen bekennen / daß Jesus Christus der Herr sey
 zur ehre Gottes des Vaters. Diese vñnd dergleichen ort der
 Schrifft lehren wol / daß diß die herligkeit oder rechte Got-
 tes sey / zu der Christus nach seiner aufferstehung vnd himel-
 fart.

Vonder waren gegenwertigkeit

fare gesetzt ist / daß er jehund nicht allein nach seiner Gottheit / sonder auch nach seiner Menschheit sich des Regiments vber himmel vnnnd erden / vnnnd sonderlich vber seine kirche / öffentlich gebrauchte vnnnd anmasse / inn solcher ehr vnnnd herligkeit / die wir nicht mögen fassen / ehe denn wir sie mit augen sehen / vñ an welcher alle Engel vnnnd menschen müssen sehen vnnnd erkennen / daß diß ihr König / Herr / vnnnd schöpffer sey / der auß gleicher macht vnnnd gewalt mit dem Vater / vnnnd nach des Vaters willen / alles regiert / vnnnd derhalben vonn allen dem Vater gleich gehalten / geehret vnnnd angebetet werden soll. Daß aber durch diese herligkeit / der leib oder die menschheit Christi / seiner Gottheit durch auß gleich / vn sichtbar vnnnd an allen orten gegenwertig solte worden sein / wie die Gottheit ist / meldet nicht allein die Schrifft an diesen oder andern orten mit keinem wort / sonder ist auch öffentlich darwider / Denn allhie Paulus außdrücklich spricht / Gott habe Christusum (nemlich nach seiner menschheit / Denn die Gottheit das reich allezeit hat inen gehabt vnnnd behalten) zu seiner rechten / Das ist / vber alle Fürstenthum vnnnd hoheit der Engel vnnnd menschen gesetzt / Aber im himel / Daß ist / also daß er mit seiner menschheit nicht hienieden auff erden sonder droben im himel / nicht vn sichtbar / sonder in sichtbarer glori vñ herligkeit sey / vnnnd sich als einen Herren himels vnd der erden vnd aller Engel vnnnd menschen / für irem angesichte erzeige / Wie Actor. 7. stehet / Stephanus sahe auff gehn himmel / vnd sahe die herligkeit Gottes vnnnd Jesum stehen zur rechten Gottes. Item Johan. 17. Vater / ich wil / daß / wo ich bin / auch die bey mir seyen / die du mir gegeben hast / Daß sie meine herligkeit sehen / die du mir gegeben hast. Item / Johan. 7.

Wir

Wir wissen aber/wenn er erscheinen wird/das wir im gleich
 sein werden/ Denn wir werden in sehen wie er ist. Desglei-
 chen redt die Schrifft auch an andern ort/ das Christus zur
 rechten Gottes/ Das ist/ in Göttlicher ehr vñ herligkeit sey/
 Setzt aber darzu/ Drogen/ im himel/ in d' höhe/ 2c. Als Col. 1.
 Item Hebr. 1. Er hat sich gesetzt zur rechten der herligkeit/ in
 der höhe/ Vnd am 8. cap. Er hat sich gesetzt zur rechten des
 throns der herligkeit im himmel. 1. Petri 3. Der zur rechten
 Gottes ist/nach dem er gefaren ist in den himel/ vnd im vn-
 terhan sind die Engel vnd alle gewalt vnd macht. Der-
 halben auch die herligkeit darein Christus nach seiner auffe-
 rnehmung vñnd himelfart eingangen ist/ ganz vñnd gar nicht
 fordert noch bedarff/ das der leib Christi an vielen oder an
 allen orten sey/ Denn Christus / weil er warer Gott vñnd
 mensch ist/ nicht desto minder alles in himel vñnd auff erden
 durch die krafft seiner Gottheit regieret / ob gleich sein leib
 vñnd seel an einem ort im himel ist. Darzu ist vergeblich das
 das gegenteil disputirt vom sitzen Christi zur rechten des Va-
 ters/die leiblich gegenwert im brot des Abendmals dadurch
 zuerhalten/dieweil Christus im ersten Abendmal/das er mit
 den Jüngern für seinem leiden hielt / sich noch nicht zur rech-
 ten Gottes gesetzt/vnd seine herligkeit eingenomen hatte/in
 die er nach laut der ganzen Schrifft vnd der Artickel vnser
 Christlichen glaubens erst nach seiner auffernehmung vnd hi-
 melfart/ eingangen ist / Vñnd aber er sich vnns im Abend-
 mal bis ans end der Welt / nicht anders zuessen gibt / denn
 den Jüngern im ersten Abendmal / da er noch mit vnser
 schwachheit am höchsten beladen war. Letzlich ist auch
 diß wol vñnd fleißig allhie zubedencken / das der Scri-
 bent ein grosses zottergeschrey macht/ von gewlicher Gottes
 leßerung/das nemlich/ so der leib Christi zu einer zeit nur an
 einem

Von der waren gegenwertigkeit

einem ort sollte sein / die rechte hand Gottes an ein gewisses ort gebunden sein müste. Nu hat er aber droben im 1. cap. des 11. theils die vbiq̄t̄ / Das ist / diese leh̄ / daß des Herrn Christi leib zugleich allenthalben sey / als ein fürw̄rige v̄nd Gottsfürchtigen leuten nit gebürende disputation / verworffen / N̄n̄ kurz zuuor / in diesem capittel / protestirt er ernstlich / Es solle jm niemand zumessen / als ob er Christum one v̄nterscheid an alle ort v̄nd ende sich v̄nterstehe anzubinden / Sonder er sage allein / daß er leiblich gegenwertig sey inn dieser handlung des Abendmals / &c. So denn nu Got so grewlich gelestert / v̄nd seine rechte hand an gewisse ort gebund̄ wird / wenn der leib Christi nicht vberal / sonder an einem gewissen ort ist / wie der Scribent an fürhabendem ort schreiet / v̄nd aber er selbst nit wil dafür gehalten werden / daß er den leib Christi an alle ort / oder auch in dz brot sehe / außser der handlung des Abendmals / So wolten wir gern sehen / wie er den kopff auß d̄ schlingen ziehen / v̄nd sich dieser Gottslest̄rung entschütten will / daß er die rechte hand oder gewalt Gottes oder regierung Christi von allen denen orten außschliesse / da er bekennt / daß der leib Christi nit sey / v̄nd sie allein an dasselbe / oder an dieselben ort einschliesse / an welchen er den leib Christi gegenwertig setzt. Er muß freilich entweder auch vns mit sich dieser gottslest̄rung frey sprechen / oder in der v̄bit̄tisten zunfft t̄rett̄ / welche dieweil sie den leib Christi sonst nit trawen von himel in das brot zubringen / wolle sie die leut vberreden / er sey schon zuuor / auch außserhalb des Abendmals / im brot v̄nd an allen orten / Auff deren banc̄ doch der Scribent nicht sitzen wil / dieweil er greiffe / Daß sie nicht trawen sey.

Vericht.

Bericht.

Aber hie plaudern abermal etliche/vnnd sagen/wir reden wol rechte von der Göttlichen Natur in Christo / aber von der Menschlichen Natur werde es nicht zügelassen. Hierauff geben wir diese richtige / gründliche antwort / Die Göttliche Natur Christi ist nie sichtbarlich weder herab von Himmel noch hinauff gen Himmel gefaren / sonder sitzet von ewigkeit her zur Rechten Gottes des Vaters / Aber die Menschliche Natur/wie sie gelitten/gestorben vnd begraben worden/Also ist sie auch nach der aufferweckung gen Himmel gefaren/ vnnd sitzet zur Rechten des ewigen Vaters. Diese ganze Herligkeit/vnd hochheit der Menschlichen Natur in Christo/welche aller Engel Klarheit vnnd glantz weit weit übertrifft/nennet der 110 Psalm Exaltationem/ eine erhöhung/damit nicht allein angezeigt wird / das Christus nicht mehr sterben oder leiden könne / sonder das er auch nach der Menschheit/ in gleicher gewalt/ herligkeit vnd Maiestet sey.

Erklärung.

Das Christus auch nach seiner Menschheit über alle Engel vnd über alle Creaturen als jr Herr vnnd König erhaben sey / ist sekund genügsam gesagt vnnd bekant. Das aber diese erhöhung vnd Maiestet der Menschheit Christi/ sey Allmechtigkeit oder Gegenwertigkeit seiner Seelen vnd seines Leibs an allen orten/oder vergleichung mit der Gottheit/leret die Schrifft nirgend/ Vnnd weil dieser Scribent drobe selbst solche meinung von der Vbiquitet verworffen/ plaudert er wider sich selbst / so er sekund die erhöhung der Menschlichen Natur so weit will spannen / dz sie der Göttlichen natur an aller herligkeit vnd Maiestet gleich sey/vnd redet hierinn freuentlich wider alle Schrifft/welche lehret

S daß

Von der waren gegenwertigkeit
daß die Menschliche Natur Christi / der Göttlichen nicht
gleich / sonder zu der Göttlichen Majeestet vnnnd Herligkeit
erhabe sey / vñ die Allmächtige Gottheit sich in jr erzeige / doch
also / das sie jre art vnd eigenschafften jr nicht benimt.

Bericht.

Also siehest du / daß man diesen Artikel von Christi hie
melfart vnnnd dem sitzen zur rechten des Vaters / nicht mit los
sen phantastischen gedanken vmbgehen vnnnd grüßlen sol /
wie die rechte hand / vnd andere ort im himel außgeteilet sein /
sondern heilsame / vber auß tröstliche erinnerung sind es von
dem reich vnsero Heilands Christi / wie er / vnser haupt / vnser
fleisch vnd blut / vber alle vnsero seind herrsche / vnd sey Allmäch
tig vnd vberal gegenwertig / vnd das er vns bey Gott vertre
te / vns erleuchten / beschützen / vnd zum ewigen leben erhalten
wolle. Es leret auch S. Paulus / daß Christus auß gefaren sey
vber alle himel / das ist so viel gesagt / Christus ist an kein ge
wiß ort gebunden / sondern ist warhafftiglich verkläret / vnd
regieret mit Gott in gleicher gewalt vnd herligkeit.

Erklärung.

Wir wissen noch sagen von keiner außtheilung der ort
im himel / oder anbindung Christi an einen gewissen ort / son
der bekenen mit der Schrifft / daß Christus mit seiner mensch
heit hinauff sey gefaren vber alle himel / das ist / außser vnnnd
vber diese ganze sichtbare welt vnnnd himel / da die Heiligen
Engel vnd außserwelten / die herligkeit Gottes bis in ewige
keit schawen / vñ auch wir mit dem Herre ewig sein werden.
Von dannen regiert er himel vñ erden durch die krafft seiner
Gottheit / welche vberal gegenwertig ist / vñ erzeiget daselbst
solche seine herrschung auch mit sichtbarer herligkeit / Maje
estet vñ glantz seiner menschliche natur / es sey gleich diese an
welchem.

welchem ort des himels / vnd welcher gestalt sie wolle / Welches wir sekund nicht gedencen zu erforschen / sonder hernach mit augen zusehen. Dis sind weder phantastische noch lose gedanken / sonder ist die einfaltige / inn Gottes wort gegründte / vnd allezeit inn der Christenheit bekante warheit. Dargegen aber ist dis ein phantastische vnd lose folge / vnd öffentliche verkerung der Schrifft / daß Christus mit seiner menschheit vber all gegenwertig vnd Gott gleich sey / drum daß er alles regiert vnd seine Kirch erhalt / vnd Paulus sagt / Er sey auff gefaren vber alle himel. Denn diese regierung vñ wirkung Christi / nach der verklärung / eben so wenig erfordert das sein leib vber all gegenwertig sey / als vor der verklärung / vnd erhöhung / da er doch auch von sich selber sagt / Johannis am fünfften / Was der Vater thut / das thut der Sohn des gleichen. Vnd weil er hinauff vber alle sichtbare himel gefaren ist / folget darauff nicht / daß er noch mit seinem leib hernieden auff der erden sey / sonder viel mehr / daß er so viel desto weiter von der erden sey / als er höher hinauff gefaren ist.

Bericht.

Endlich disputieren hie etliche von dem spruch Damascenti / welchen Lombardus anzeucht / lib. 1. Dist. 22. *Christus ubi que totus est sed non totum.* Darüber mögen zwar alle die so lust daran haben / vnd sich an diesem einfeltigen vnd rechten berichte nicht lassen genügen / klügeln vnd zancken / bis sie müde werden. Der ganze Christus / Das ist / Christus / Gott vnd mensch / ist allenthalben. Dann das erste wort / *Totus, ganz /* redet in gemein von der ganzen person /

Erklärung.

Es redet aber nicht von beyden naturen. Wie man auch von der ganzen person Christi sagt / Christus ist gestorben /

S ij vnd

Von der waren gegenwertigkeit
vnnnd dennoch keines wegs von beyden naturen/ ic. Item
vonn der gangen person des menschen sagt man/ der mensch
ist vnsterblich/ ist vernünfftig/ vnnnd dennoch nicht von leib
vnd seel/ sonder nur von der seelen/ wie obgemeldet.

Bericht.

Darvon auch Nazianzenus spricht: Dann wo ist jetzund
der der leib Christi anders / dann bey dem/ welcher ihn hat an
sich genomen/ vnd wo der ist / der den leib oder menschliche na-
tur an sich genomen hat/ da ist auch gewislich der leib.

Erklärung.

Diz ist vnbescheidenlich an die wort Nazianzeni geffir-
cket/ vnd folget gar nicht auß denselben. Denn daß der leib
Christi allezeit bey der Gottheit sey / daran ist kein zweuel/
Darumb aber darff der leib nit vberall sein/ da die Gottheit
ist/ Denn er dennoch bey jr bleibet/ dieweil sie vberal ist/ vnd
von dem leib nicht getrennet wird.

Bericht.

Der ander theil aber des spruchs Damasceni / redet allein
von der abgesonderten menschlichen natur/ Dann so Christus
nur blosser mensch/ vnnnd nicht auch Gott were/ Könnte er nicht
allwegen vnnnd allenthalben sein da er wolte. Dieweil aber nun
der ganze Herr Christus / zugleich warer Gott vnnnd warer
mensch ist / so ist er vnnnd kan auch sein allenthalben wo er
nur wil. Das sey kürzlich auff der Widersacher einreden ge-
antwortet.

Erklärung.

Diz ist ein offentliche verfelschung des spruchs / wel-
cher also sagt/ daß Christus vberall gang sey / Aber nit alles
vberal sey/ was in Christo ist. Derhalben er nicht von der ab-
geson-

gesonderten/sonder von der angenommenen vnnnd persönlich
mit der Gottheit vereinigten Menschheit Christi sagt / daß
dieselbe nicht überall sey.

Bericht.

Das iij. Capitel/

Waz zu Christus im Abendmal ge-
wertig.

Waz zu Christus im Abendmal gegenwertig sey / leret
vns außdrücklich die wort in der einsetzung: Nemet/
esset/trincket zu meinem get edtmuß / Wie solt jr mein
gedencken: Also das dieser Leib/welchen jr nemet/sür euch ge-
geben / Vnd dieses Blut/welches jr trincket / für euch vergos-
sen sey zur vergebung der Sünden. Sie sind zwey ding bey
einander der ware wäsentliche Leib vnd Blut Christi/ welche
aufgespendet vnd empfangen werden/ Vnnnd darneben auch
die heil same/ tröstliche frucht/würckung/ vnnnd nutz in diesen
worten verfasst / Für euch gegeben / Für euch vergossen/ &c.
Dargegē aber hōrest du hie kein wörtlin von den Abgöttische
missbrauchen / das Christus sich in das Sacramentheußlin
einschliessen/ vmbher tragen / vnd in dem Brot anbäten lasse/

Erklärung.

Wo aber Christus leiblich gegenwertig ist/ da ist man one
alles warten auff einen sonderlichen befelch/ schuldig in an-
zubeten/ laut des allgemeinen Göttlichen befelchs/ Er ist dein
Herr/ vnd du solst in anbeten. Derhalben die jenigen/ so die
leiblich gegenwert Christi im brot verfechten/ Auch die Ab-
göttische anbetung Christi im brot bestätigen / ob gleich iren
euliche solches verneinen.

Von der Manducation Bericht.

Sondern dazu spricht er selbst / sey er gegenwertig / daß man seinen leib esse vnd sein blut trincke / 2c. vnd so viel von der gegenwertigkeit Christi in seinem Abendmal.

Erklärung.

Er ist gegenwertig / daß man in esse vnd trincke / Aber nicht leiblich vnd mündlich / Denn solches hat er in diesem Abendmal mit keinem wort verheissen. Derhalben er auch nicht leiblich darff inn oder bey diesem brot sein / noch solche gegenwert je gemeldet hat / Denn ein leiblich essen eine leibliche gegenwert / ein geistlich essen aber ein geistliche gegenwert erfordert.

Bericht.

Das Dritte theil.

Von der Manducation.

Jetzt wollen wir auch das letzte stücklein / welches ist von der Manducation oder messung / für vns nemen / vnd Erstlich anzeigen / wie dieselbige Manducation solle verstanden werden. Darnach wie mancherley Manducation sey. Zum dritten / was die vnwürdigen empfahen vnd essen. Zum vierdten / von frucht vnd nutz der empfahung dieses Sacraments.

Das j. Capitel/

Wie man die manducation verstehen
solte / das ist / wie Christi leib inn sei-
nem Abendmal gessen
werde.

Zu dieser zeit erhebt sich der hefftigste zwispalt vber dieser
frage / nemlich: Was das sey das im Abendmal gegenwer-
tig ist / den communicanten dargereicht / vnnnd mit dem
mund genomen vnd empfangen wird. Wir haben aber
diesen gemeldet / daß das eusserliche brot seine natur vnd sub-
stantz des brots behalte / welches man wider der Papisten Ab-
göttische Transsubstantiation wol merken muß. Darnach ist
auch angezeigt vnd bewiesen worden / daß nicht allein brot /
sondern mit dem brot empfangen vnnnd geessen werde Christi
warer leib / welches man wissen muß wider die Sacramente-
rer / Das ist / wider die so leugnen daß Christi leib im Abend-
mal gegenwertig empfangen vnd geessen werde. Dieweil dies
sein also / so fragen die scharffsinnigen disputierer / auff was
weise / oder wie dieses essen oder niesen zuuerstehen sey / wie
Christi leib könne gessen werden? Dann sie meinen man lere /
daß Christi leib (wie die groben gesellen zu Capernaum jnen
einbildeten) mit den zeenen zerrissen vnd gefressen / vnd sein blut
durch die gurgel in den bauch eingeschüttet werde. Lieber wo-
her haben sie doch das? Daher / dieweil menschliche vernunft
kein andere weiß zu essen verstehet / on allein die grobe / natir-
liche weiß / wie etwan ein hund od ein ander thier fleisch isset.
Wider diesen falschen wahn / sol man hie von diesen berichte
wissen / In des Herren Abendmal wird vnter dem sichtbaren /
empfindlichen Element des brots / vnsers Herren Christi leib
ansichtlicher / empfangen / vnd geessen / vnd doch vn-
sichtlicher vnd vnempfindlicher weiß / vnnnd wird nicht zerrissen /
noch

Von der Manducation

noch mit den zeeuen zerkerwet / nicht verzehret / nicht im magen / wie andere speiß / gekochet oder verdarwet / wird nit in fleisch vnd blut verwandelt. In summa leidet gar nichts / Den es fehet geschrieben. Der tod wird vber in nicht mehr herschen.

Erklärung.

Das nicht allein brot / sonder auch der ware leib Christi empfangen vnd geessen werde im Abendmal / darff wider vns niemand beweisen / denn wir dis so wol als jemand bekennen. Es hat aber der Scribent allhie die frage für geschlagen / was im Abendmal mit dem mund genomen vnnnd geessen werde? Da er auff diese seine eigne frage antworten sol / gehet er mit langen preambeln auffen herum / wie die kat umb einen heissen brey / vnnnd sagt / der leib Christi werde im Abendmal geessen auff himlische vnd vbernatürliche weise / so doch daran niemand zweuellet / noch ihn darumb fraget / Sonder er frey vnd deutlich solte antwortē / ob der leib Christi mit dem munde empfangen vnnnd geessen werde / oder nit. Dieweil er aber allhie mum mum sagt / vnd gnugsam damit anzeigt / das ihm das gewissen zittert / So müssen wir außdrücklich vnnnd verstendlich antworten / Das nemlich / im Abendmal zweyerley speiß vnd tranck sey / Ein jrdische / leibliche / eusserliche vnd sichtbare / nemlich das brot vnd wein / welche mit der jrdischen / leiblichen / eusserlichen hand vnnnd munde / leiblich / eusserlich vnd sichtbarlich / genomen vnd genossen werden / Vnd ein himlische / geistliche / innerliche / vnsichtbare / nemlich der leib vnnnd das blut Christi / welche nicht mit der jrdischen vnd leiblichen / sonder mit der geistlichen / innerlichen hand vnd mund des herzens / nemlich mit warem glauben an Christum / auff himlische / geistliche / innerliche vnd vnsichtbare weise / vñ wirkung des H. Geists in den

in den glaubigen/genomen vnd genossen werden. Denn also lehret vns Christus selbst sein leib vnd blut im Abendmal niessen / da er spricht / Es sey das newe Testament / welches durch sein blut vergiesen gemacht vnd auffgerichtet ist / Da Paulus / da er sagt / es sey die gemeinschafft des leibs vnd bluts Christi / ja auch alle ort der Schrifft / so von dieser gemeinschafft der glaubigen an Christo/reden/welche vns das newe Testament verheisset / vnd die niessung des sichtbaren brots vnd weins im Abendmal / als ein sigil dieses Testaments/bestätigen/ vnd in vnns/als ein werckzeug des H. Geistes / vermehren soll / Als Johannis am 6. Wer mein fleisch isset/vnd mein blut trinckt/der hat das ewig leben/der bleibt in mir/vñ ich in jm. Ephes. 3. Daß Christus durch den glauben in ewren herzen wone. 1. Johan. 1. So wir sagen dz wir gemeinschafft mit ihm haben/vnd wandeln im finsterniß/so liegen wir/2c. Vnd am dritten cap. Daran erkennen wir/das er in vnns bleibet / dieweil er vns von seinem Geist gibt. Hebr. iij. Wir sind seine wonung/so wir das vertrauen vnd rhum der hoffnung/bisß ans end fest behalten. Jez/ Wir sind Christi theilhafftig worden/so wir den anfang des vertrauens/bisß ans end fest behalten. Dargegen aber/das der leib Christi wesentlich im brot/ vnd in der hand des dieners sey / vnd durch den leiblichen mund/ in der glaubigen vnd vnglaubigen leib genomen werde / ist ein Abgöttischer/ von dem Pappst nicht für so langer zeit erdachter / vnd mit den Artickeln des Christlichen glaubens / mit aller Schrifft von Christo / vnd von gemeinschafft der heiligen mit Christo/ auch mit der einsetzung vnd dem brauch des Nachmals vnd aller Sacrament / streittender wohn. Derwegen dieser scharffsinnige Scribent/vns nicht für so grobe gesellen von

Von der Manducation

Capernaum / oder für so vnfleissige Leser seiner vñnd seines gleichen schrifftten halten darff / das wir meineten sie leren / der Leib Christi werde mit zeenen zureissen vñnd verdewet. Denn wir wissen wol / das die Pápstliche Abgötterey / nicht auff dem zureissen oder verdewen des Leibs Christi / auch nit auff der verwandlung des brots in das fleisch Christi / sonder auff der leiblichen gegenwert Christi im brot od in gestalt des brots stehet. Darumb ist es nit gnug / das man sagt / das brot werde nit zu fleisch / vñd das fleisch Christi werde nicht zerleuet vñd verdewet /c. Sonder man muß auch wissen vñd bekennen / das es auff keine weise / sie sey so subtil als sie immer kan / wesentlich inn oder vnter dem brot vñnd wein sey / oder inn vnsern Leib eingehe / Denn solches inn Gottes wort niergend geleret wird / viel aber darinnen zu finden / das solcher meinung zuwider ist.

Vericht.

Dieses ist ein sonderliche niessung / vñd heisset sacramentalis manducatio. Ein solche art zu essen / die allein zu diesem Sacrament eigetlich gehöret / vñ ist gegründet in den wort Christi / da er spricht: *Esset / Dz ist mein Leib / trincket / Dz ist mein Blut.* Nichts desto weniger muß bey dieser Sacramentliche Manducation / welche nit auff natürliche sond vbernatürliche himlische weise geschicht / die ande natürliche Manducatio vñ niessung / nemlich / des sichtbarlichen brots vñd weins / allwegen bey der vorigen bleiben / Können vñd sollen auch von einander nicht getrennet werden. So sind nu dreyerley Manducation oder niessung / darvon wollen wir jezund weiter etwas deutlicher reden.

Erklärung.

Die Sacramentliche niessung / heisset die niessung des Sacraments. Nu ist aber das Sacrament des Leibs Christi / nicht

nicht der leib Christi selbst/sonder das brot. Derhalben Sa-
 cramentis weise oder Sacramentlich den leib Christi niessen/
 heiße dieses brot niessen / welches ein Sacrament des leibes
 ist/ vnd daher auch der leib Christi heisset. Auff diese weise sa-
 gen die Alten / daß auch die Gottlosen den leib Christi essen.
 Also ist die Sacramentlich beschneidung/die eusserliche / Itz
 die Sacramentliche besprengung mit dem blüt Christi / der
 eusserlich wassertauff/ıc. Darzu ist die Sacramentlich nies-
 sung ein anbildung vnnnd bestättigung der Geistli-
 chen niessung Christi vnnnd muß derwe-
 gen eusserlich vñ sichtbar sein.

Bericht.

Das ij. Capitel/

Geistlichen dieweil der Herr Christus brot nimmet/dassel-
 bige bricht/vnnnd den Jüngern darreicht/ Auch dieweil
 S. Paulus spricht: So offte jr von diesem brot essen wer-
 det/ So ist kund vnd offensar/ das zum ersten sey *Manducatio na-*
turalis. Das ist/ Ein natürliche niessung/nicht des leibes vnnnd
 bluts Christi/sondern der sichtbarlichen Element brots vnnnd
 weins. Dann diese Element werden nicht verwandelt inn den
 leib vnnnd blüt Christi/sondern behalten ihr eigne natur/kom-
 men in den magen/ werden verdawet vnd verzehret. Darnach
 dieweil man im Abendmal nicht allein brot isst/sondern Chri-
 stus saget von dem brot: Nemet/esset / das ist mein leib. So
 muß zum andern zugelassen werden / daß da sey ein ober-
 natürliche / Himlische *Manducation*/ Welche / ob sie
 wol vn sichtbar vnd vnempfindlich ist/ so ist doch *Mandu-*
cation oder niessung des waren wesentlichen leibs Christi/laut
 der wort des H. Nachmals. Endlich dieweil inn den Worten
 S. einsatzig außdrücklich verheissen wird schenckung vñ zueig-
 nung

Von der Manducation

nung aller gutthaten Christi durch den glauben/ zum ewigen leben vnd seligkeit/ So folget/ das zum dritten auch ein Geistliche Manducation hie werde erfordert. Also/ das man rechte vnd wol drey vnterschiedene Manducationes, niessung oder essen/ in diesem Sacrament erzelet. Erstlich isset man im Abendmal natürlicher weise die sichtbare/ greiffliche Element/ brot vnnnd wein/ Darnach isset man/ nach besonderer weise dieses Sacraments/ den waren leib Christi / welcher mit dem brot dargebracht vnd empfangen wird/ vnd trincket sein wares blut/ welches mit dem wein gegeben wird. 3. Letztlich isset man auch Geistlich in diesem Sacrament den leib Christi / für vnser sünd gegeben/ vnd sein blut vmb vnser sünd willen vergossen/ welches aber allein von der wirkung vnd seligen frucht/ in denen/ so das 3. Abendmal zu irem heil vnd seligkeit empfangen/ sol verstanden werden.

Erklärung.

Wie nur zweyerley speiß vnd tranck im Abendmal ist/ Also ist auch nur zweyerley niessung/ Die sichtbare speiß vñ tranck/ brot vnnnd wein/ wird sichtbar vnd leiblich/ Die vnsichtbare/ der leib vnd das blut Christi/ vnsichtbar vnd geistlich genossen/ Wie in allen Sacramenten zweyerley ding empfangen werden/ die sichtbaren zeichen leiblich/ vnd die vnsichtbaren gaben geistlich / Vñ wie auch bey dieser niessung brots vnnnd weins / kein andere niessung Christi verheissen wird/ denn die geistliche / nach den worten Christi/ Dieser kelch ist das newe Testament/ vnd S. Pauli/ Disß brot ist die gemeinschaft des leibs Christi. Denn die leibliche/ vnsichtbare/ vnnnd vermeinte Sacramentliche niessung hat keinen grund/ dieweil Christus nie gesagt/ das entweder das brot wesentlich sein leib / oder sein leib wesentlich in dem brot sey. Das aber dieser vnnnd seines gleichen Theologen/ die geistliche

che niessung Christi/allein auff die wirkung vnd frucht ziehen/ vnd also wider alle Schrifft/ vnd lere der Alten reinen Kirchen/ Christum vnd seine seligmachende wirkung vnnnd frucht trennen/ vnnnd alle die glieder Christi/so zum Nachtmal nicht komen sind/ vnd noch nicht komen mögen/ der waren wesentlichen gemeinschafft des leibs Christi berauben/ ist ein grosse vnbescheidenheit vñ künheit/ die sie gegen Gott werden zuerantworten haben.

Bericht.

Das iij. Capitel/

Was die vnwürdigen im Abendmal
empfaben vnd essen.

Dieses fraget man nit on hohe wichtige vrsachen. Dann erstlich werden wir dadurch erinnert/ daß dieses ganze geheimniß der gegenwertigkeit vnd Manducation/ nicht ohne/ oder seine krafft vnnnd vorgang neme/ vonn würdigkeit oder verdienst/ weder dessen der es darreichet/ noch dessen der es empfabet/ sonder hab seine krafft vnd wirde allein von der einsetzung des stifters/ nemlichen des Sons Gottes. Zum andern/ werden dadurch/ alle die so das S. Abendmal brauchen/ ernstlich vermanet/ daß sie sich in rechtschaffener/ hertzlicher bekehrung/ vnnnd reinem glauben an Christum/ finden lassen. Dann S. Paulus sagt nicht vergeblich/ welcher vnwürdig isset vnd trincket/ der isset vñ trincket jm selber das gericht/ vnd ist schuldig an dem leib vnd blut des Heren.

Erklärung.

Es ist vergebens/ daß man disputirt/ was die lere vom essen der Gottlosen vns nuke/ ehe denn bewiesen ist/ daß die

Von der Manducation

Gottlosen den Leib Christi essen. Darzu bleibe nit desto mind-
er dieses gewiß vnd sicher / daß wir mit dem Leib Christi ge-
speiset werden / vnnnd das Sacrament seine krafft hat / nicht
von wegen vnser würdigkeit / sonder von wegen der barmher-
zigkeit Gottes vnd einsetzung Christi / vnd daß man sich für
mißbrauch der H. Sacrament / als damit man sich schwer-
lich versündiget / fleißig hütten solle / Ob gleich weder die glau-
bigen noch vnglaubigen / den Leib Christi selbst / leiblich vnd
mündlich essen. Derhalben vmb dieser vrsachen willen nicht
not ist / das essen der Gottlosen ohne alles Gottes wort ein-
zuführen.

Vericht.

Wer ist aber des Abendmals
vnwürdig?

Vnwürdig nennet man hie nicht die Türcken / nicht die
Heiden / auch nicht andere / die nicht öffentliche gliedmassen
der Christlichen gemein heißen vnnnd gehalten sein wollen /
Man redet auch nicht von meusen / welche etwan das brot
oder hostien nagen / sonder vnwürdige leut nennet man die / so
in der eusserlichen versammlung der Christen sein / oder vnter de-
nen so beruffen sind / Mangeln aber doch der widergeburt / vñ
sind heuchler / Gottlose vnnnd sichere leut / wiewol sie / so viel
die eusserliche profession belange / die Christliche lehr für sich
bleiben vnnnd men gefallen lassen. Von denen fraget man nur /
was sie empfangen vnd essen / wann sie in der Christlichen ver-
sammlung herzu gehen / vnd das S. Abendmal brauchen / wie es
Christus hat eingesetzt

Erklärung.

Keine vrsach kan herfürbracht werden / warumb die Tür-
cken vnd Heiden / so sie zum Nachtmal komen / den Leib Chri-
sti nicht äßen / welche nicht eben so wol in den Gottlosen stat
habe /

habe/die sich Christen nennen. Derhalben folget/das diese
 eben so wenig als jene Christum essen. Denn weil das Abend
 mal ist eingesezt zur bestättigung des glaubens / So ist am
 tag das es denen nicht ist eingesezt/so keinen waren glauben
 nicht haben/ Vñ derhalben jnen eben so wenig von Christo
 darin verheissen vñnd gegeben wird/ als den Türcken vñnd
 Heiden. Vñnd ist die Regel gewis/das keine Ceremonia/auf
 ser demselben brauch / darzu sie von Gott ist eingesezt / dem
 jenen der sie mißbraucht / eigentlich zureden / ein Sacra-
 ment ist. Aus diesem aber folget weiter / wie auch alle des
 gegentheils bekennen / so der leib Christi allein von den glau-
 bigen geessen wird / das die niessung desselben nicht leiblich
 sonder allein geistlich sey. Ist derhalben dieser vnterscheid
 der Gottlosen/ohne allen grund der Schrift/auf bösem ge-
 wissen herkommen/wie es pflegt zugehen / wenn man ein böse
 sach will flicken / Vñnd ist das gegentheil selbst/mit offent-
 lich außgegangenen Schrifften heutiges tags darüber hefftig
 vñneins. Denn etliche sehen wol/das dieses nicht bestehen
 mag/das der leib Christi also inn das brot gebannet sol sein/
 durch sprechung oder widerholung der wort Christi / wie für
 gegeben wird/das er damit auch in die leibe der Türcken vñnd
 Heiden vñnd aller öffentlichen Gotslesterer eingehe / weñ sie
 spotweise zu dem Nachtmal komen. Drumb machen sie auß
 schrecken jres gewissens vñ schew solches für dē leutē zusagē/
 diesen vnterscheid/den sie von Christo nie habē gelernet. Die
 andern aber sehen wol / wie weit die sach einreißen will / das
 nemlich/so man bekennen sol/das die öffentlichen vñchristē
 den leib Christi nit essen/auch die heimliche vñchristē nit viel
 würdē behalten/Darumb verwerffen sie diesen vnterscheid/
 vñ scheltē die jenige die jn mache/für Zwinglianer genossen.

Darne

Von der Manducation

Darneben aber nemen sie nicht war/das sie D. Luthern selb
best/für welches schüler sie doch allein wollen gehalten sein/
hiemit öffentlich verdammen. Den derselbe in seinem buch/
Das die wort/das ist mein leib/ noch fest stehen wider die
Schwermgeister/da er doch am heftigsten vber der leibliche
gegenwert vnd niessung Christi streitet/dennoch von dem
essen der Gottlosen/durch sterck der warheit also zuschreiben
ist gedungen worden/Erstlich ist dz auch ein nutz/das hoch
mütige/kluge geister vnd die vernunfft geblendet vnn
geschendet werde/auff das die hochmütigen sich stossen vnn
fallen/vnd nimmer des Abendmals Christi genießten/wider
rumb die demütigen sich stossen vnn auffstehen/vnn des
Abendmals allein genießten/Wie S. Simeon sagt/dieser
ist gesetzt zum fal vnd aufferstehung vieler in Israel. Dann
es ist nützlich vnd gut/das die hochmütigen Gottlosen lester
rer also abgesondert werden/das sie nit mit genießten des H.
Sacraments. Den man sol das heilighum nit für die hund
werffen/noch die perlen für die sew. Nu aber die Schwerm
mer glauben/es sey eitel brot vnn wein da/so ist gewislich
also/Wie sie glauben/so haben sie es/vnn essen also eitel
brot vnd wein/genießten des Herrn leib weder geistlich noch
leiblich. Das ist sehr gut vnd nutz/das vnser gut nit vnter
vnwürdige gestrewet/sonder heilig vnd rein bey den demüti
gen allein behalten werde. Dis sind D. Luthers wort/wel
che vnser achtens so klar sind/das sie keiner erklärüg bedörf
fen. Denn er je außdrücklich sagt/das die hochmütigen/
Gottlosen/lesterer/hund vñ sew/vnd vnwürdigen/des Her
r leib nimmer/weder geistlich noch leiblich/sonder eitel brot
vnn wein genießten/Bey den demütigen aber allein vnser
gut bleibe. Ja weil er wil/das keiner den leib Christi esse/der
die

die leiblich gegenwert nicht glaube / was werden denn die essen / die weder von der leiblichen noch geistlichen niessung Christi / oder auch von der ganzen Christlichen Religion / etwas halten / ob sie sich gleich oft für die besten Christen außthun / wollen geschweigen / die sich öffentlich mit vngebürlichem leben / als vnchristen / hund vnd sew erzeigen / sie glauben gleich etwas von Christo / wie auch die teuffel glauben / oder nicht? Was wird auch Judas geessen haben / den der Herr einen teuffel schild / vnd aber etlich so hefftig streitten / er hab den leib Christi so wol als Petrus / leiblich geessen?

Bericht.

Darauff antworten die Sacramentierer / die jenigen so vnwürdig zu dem Nachmal gehen / empfaben vnnnd essen nichts mehr dann die sichtbare zeichen / brot vnnnd wein / auß der vrsach / weil sie Christum nicht auch Geistlich / Das ist / durch den glauben / essen. Dargegen ist augenscheinlich anzusehen / daß auch die vnwürdigen / wie S. Paulus spricht / mit dem brot empfaben vnd nemen den waren leib Christi / vnnnd trincken mit dem wein das ware blut Christi. Darauff folget / daß die vnwürdigen / beyde d natürlichen Manducation d Element brots vñ weins / vñ auch d Sacramentliche Manducation des waren leibs vnd bluts Christi / mit nit beranbt werde / welches auß nachfolgenden vrsachen leicht ist zu verstehen.

Erklärung.

Das ort were wol darbey gestanden da S. Paulus dieses spricht. Denn er spricht wol / Wer vnwürdig von diesem Brot isset / der wird schuldig an dem leib Christi / vnnnd vernehret denselben / dieweil er jm angeboten wird im Sacrament / vnnnd er diese gabe verachtet vnd nicht annimt. Daß aber der leib Christi selbst vnwürdig geessen werde / findt wir nirgend geschrieben.

Von der Manducation Bericht.

Sür das erste / des menschen glaub macht kein Sacrament / bringt auch nicht die gegenwertigkeit oder Manducation des waren leibs vnd bluts Christi zuwegen / Sonder auß krafft der einsetzung Christi ist es ein Sacrament / so lang es gebrauchet / geessen vnd getruncken wird / Vnd bleibt die einsetzung / vnd ist warhafftig / kan auch durch würdigkeit oder unwürdigkeit vnd bosheit deren die das Abendmal brauchen / nicht geendert werden / sonder dierweil Christus spricht: *Esset / das ist mein leib / trincket das ist mein blut /* so ist auch sein leib gewislich gegenwertig / vnd wird warhafftiglich empfangen vnd genossen. Der glaub aber machet einen vnterscheid zwischen denen so da essen / die jenigen so das Abendmal würdiglich nemen / Das ist die an den Son Gottes glauben vnd in ernstler bekerung zu Gott stehen / die selbige nemen vnd empfangen Christi waren leib / vnd trincken sein waren blut / nicht allein mit dem mund / leiblich / sonder auch mit dem hertzen / Geistlich. Welche aber vnglaubig sind / vnd zu Gott sich nicht ernstlich bekehren / sonder sind entweder heuchler / oder Gottlose / sichere leut / die empfangen auch Christi waren leib / vnd trincken sein waren blut / aber nur allein mit dem mund / oder nur leiblich / nicht mit dem hertzen / noch Geistlich. Derhalben sind sie schuldig an dem leib vnd blut Christi / vnd essen vnd trincken men selber das gericht.

Erklärung.

Die Göttliche einsetzung macht Sacrament / Aber der glaube macht rechten von Gott geordneten brauch der Sacrament / außser welchem brauch Gott weder wil noch verheisset / daß mit den sichtbaren zeichen die vnsichtbaren gaben sollen empfangen werden. Derhalben als denn der ordnung vnd warheit Gottes ein genügen geschicht / wenn die
glaube

glaubigen der gaben mit den zeichen theilhaftig werde. Dagegen aber dieselbe verlest würde / wenn auch die vnglaubigen die vsichtbaren gaben empfiengen / welchen sie nie verheissen / sonder durch auß inn Gottes wort abgeschlagen werden. Wie auch S. Paulus sagt von denē die des Nachtmals ohne waren glauben vnnnd bekerung brauchen / daß sie nicht des Herren Abendmal halten / Item / daß sie nicht zugleich können theilhaftig sein des Herren vnnnd der teuffelisches.

Bericht.

Für das ander / Christus spricht nicht allein zu Petro / sonder auch zu dem verhäter Juda : Das (das ich dir gebe / vnd das du nimest) ist mein leib. Derhalben so empfehet Judas das vnd andere vnwürdigen eben so gewiß den leib vnnnd blut Christi / als die würdigen vnd fromen.

Erklärung.

Wort vnd Sacrament muß mit glauben angenommen werden / welches dieweil es Judas nicht thut / bleiben sie ihm beyde ein vergeblicher laut vnnnd Ceremonj. Also ist das brot der leib Christi Sacramentsweise / Das ist / den glaubigen ein gewisses zeugnis / daß sie mit dem leib Christi zum ewigen leben geistlich gespeiset werden. Judas aber ist ohne glauben / vnnnd dieser geistlichen speis nicht fähig / derhalben empfähet er nichts denn das sichtbare brot vnd wein / zu seinem gericht vnd verdammis / Vnangesehen / daß ihm inn diesen wortē Christi / das ist mein leib / so wol als Petro die gemeinschafft des leibs Christi angeboten wird. Wie auch Simon der zauberer nicht mit dem blut vnd geist Christi von sündē / sonder allein mit dem eusserlichen wasser zu seinem verdammis getaufft wird / vnangesehen / daß ihm vnnnd allen

Von der Manducation

die da getaufft werden / so wol als Paulo in diesen worten/
Wer glaubt vnd getaufft wird / sol selig werden / Item / Laß
dich tauffen vnnnd wasche ab deine sünde / Item / Der Tauff
ist das bad der widergeburt / ic. die vergebung der sünden vñ
ewigs leben angeboten wird.

Bericht.

Daher S. Augustinus recht vnnnd wol sagt: Judas der
verrähter nimmet den rechten guten leib Christi / vnd Simon
der zauberer empfehlet die rechte / gute Tauff Christi. Weil sie
aber das gute nicht recht / sonder bößlich angenommen vnd miß
brauchet haben / so sind dieselbigen böse leut / durch diesen
grewlichen mißbrauch verderbet vnnnd außgerilget worden.
Gut vnd Edel ist Christi blut vnnnd leib / gut ist auch das ge
sätz / so es recht vnd ordenlich gebrauchet wird. Dann erlich
ist es ein geruch des todts zum todt / etliche aber ein geruch des
lebens zum leben. Aberman spricht er auch: Gleich wie Judas /
welchem der Herr den eingetunckten bitten darreichte / dem
Sathan nicht damit hat in seinem hertzen raum gemacht / als
ob er vom Herren Christo etwas böses hette empfangen / Also
auch ein jeder / der des Herren Sacramēt vnd würdig brauchet /
macht darmit nicht daß dasselbige böß sey / weil er böß ist /
oder daß er es nicht zur seligkeit hat empfangen. Dann des Her
ren leib vnnnd blut war auch nichts destweniger bey denen / zu
welchen dazumal der Apostel Paulus sagte: Wer vnwürdig
isset / der isset in selber das gericht. Item sagt dieser Augustinus
weiter: Der Herr selber duldet Judam / seinen Teuffel vnd dieb /
der in auch verkauffete vnd leffet in vnter seinen vnschuldigen
Jüngern empfaben den werden scharz / durch
welchen (wie die glaubigen wiss
sen) wir erkaufft
sein / ic.

Das Dritte theil.
Erklärung.

79

Augustinus will nichts anders denn das Judas das
brot entpfahet / welches er mit dem Herrn Christo / den leib
Christi nennet / mit dem wir erlöset sind / darumb das es ein
Sacrament desselben leibs ist. Dis zeugen erstlich eben diese
angezogene sprüch / dieweil er des Judas essen vergleicht mit
Simons des zauberers tauff / welcher nit mit dem blut Chri-
sti / sonder allein mit wasser getaufft ward / Item / weil er sich
also erkläret / das des Herren Sacrament vnwirdig werde
gebraucht. Denn das Sacrament ist nicht eigentlich dassel-
be / das dadurch bedeutet vnd angeboten wird. Im andern
spruch sind diese wort Augustini / *Corpus enim et sanguis Domini ni-
hilominus erat etiam illis, quibus dicebat Apostolus, qui manducat indigne, etc.*
also verdeutschet / Denn des Herren leib vnnnd blut war auch
nichts desto weniger bey denen /c. Lauten aber also / Denn
es war (nemlich das Sacrament / welches das brot ist) niche
desto weniger auch denen der leib leib vnd das blut des Her-
ren /c. Damit Augustinus wil / das auch denen durch dis
brot bedeutet vnnnd angeboten werde der leib Christi / die ihn
doch nicht annemen vnnnd niessen / sonder an stadt desselben
mit vnwirdigem brauch des Sacraments snen selbst das ge-
richt entpfahen. Ober dis alles sind viel klare zeugniss Augu-
stini vorhanden / das die vnglaubigen den leib Christi selbst
nicht essen / deren etliche anderßwo erzelet sind.

Bericht.

Sür das dritte / Der Euangelist Lucas setzet von diesem
Sacrament diese wort Christi / Das ist mein leib der für euch
gegeben wird /c. Es ist aber Christi leib im den tod gegeben /
nicht allein für die glaubigē / sonder für das ganz menschliche
geschlecht.

Von der Manducation

geschlecht für fromen vnd bösen / für die widergebomen / vnd nicht widergebomen / für die so selig werden sollen / vnd für die so verdamt werden sollen. Derhalben so empfaben mich allein die würdigen / sonder auch die vnwürdigen den leib Christi in dem 5. Abendmal / Das es aber bey inen beyderseits so gar vngleiche krafft vnd wirkung hat / ist der mangel an jener argen natur vnd murrwilliger bosheit.

Erklärung.

Solte dieser beweiß gelten / so müßte zuvor bewiesen sein / daß alle dieselben den leib Christi essen / für die er ist gegeben / welches noch weit fehlet. Denn eben darumb komte das einig opffer Christi / welches genug were zur bezahlung für die sünde der ganken welt / nicht allen zu gut / daß sie nicht alle dieses opffer durch waren glauben annemen vnd niessen.

Bericht.

Wie dann auch die ganze predig des ganzen gnadenreichen Euangelij etlichen ein geruch des lebens ist zum leben / etlichen aber ein geruch des todts zum tod / vnd ist doch eben ein vnd gleichförmig Euangelium in welchem Gottes gnediger will / alle menschen selig machen offenbaret wird. Also daß die menschen nur ihre eigne bosheit verdammet. Item von denen / so wider das ander gebot der ersten Tafel sündigen / wird eben so wol des waren Gottes rechter name gemißbraucht / als der selbige ware Gottes name von den Gottesfürchtigen recht gebrauchet wird / welche in in jrem teglichen gebet vnd dancksagung preisen vnd ehren.

Erklärung.

Erklärung.

Diese gleichniß sind dem essen der Gottlosen stracks zuwider. Denn die Sacrament sind ein sichtbares wort. Derhalben wie die vnglaubigen die eusserliche predig hören / aber nichts empfangen / das ihnen darinn wird fürgetragen / vnnnd den Namen Gottes mißbrauchen können / Aber nicht denselben der dadurch bedeutet wird / Also können sie auch empfangen vnnnd mißbrauchen die sichtbaren Sacrament / aber nicht das jenige / so damit wird bedeutet / vnd wird dennoch Gott selbst vnd seine wolthaten verachtet vnd geschmähet durch mißbrauch des Sacraments / wie durch mißbrauch seines worts vnd namens.

Bericht.

Zierrwider aber behelffen sich etliche dieser einred : Der leib Christi ist auch für Türcken / Juden vnd andere feind der Christlichen Lehr gegeben. Derhalben wird man bekennen müssen / daß dieselbigen auch den waren leib Christi empfangen. Antwort / Das 3. Sacrament des Abendmals von Christo eingesetzt / gehört in die Christliche gemein / gehet die leute an / so da sind inn der öffentlichē versammlung / welche durchs eusserliche predigamt beruffen wird / darinnen doch erfunden werden viel vnglaubige / Item heuchler / veruchte / sichere leute / als Judas / die Gottlosen Corinthier / 10. Ein solche öffentliche versammlung wird gemeinet / darinnen das Sacrament des Abendmals gehandreichet wird / darinnen die predig des 3. Euangelij ankündiget vñ verkündiget jederman Gottes gnade / welche erworben ist durch den leib Christi / für das menschliche geschlechte gegeben / vnd durch das blut Christi / für dz menschliche geschlechte vergossen Darnach aber kommt es durch 3 menschen eigene schuld vnnnd bosheit darzu / daß sie nit alle durch die rechte Christliche Lehr sich beruffen vnnnd bekeren lassen.

Darumb

Von der Manducation

Darumb so erwelet im Gott nach seiner grossen barmherzigkeit durch das eusserliche predigamt ein gewisse versammlung/ oder Kirche/ Welche nun als gliedmassen sich zu dieser eusserlichen versammlung halten / denen ist das Heilige Abendmal eingesetzt.

Erklärung.

Die Sacrament sind eingesetzt zur bestättigung des glaubens. Derhalben sind sie denen allein zugebrauchen verordnet/welche diesen glauben haben. Item/dieweil Paulus befehlet/das sich ein jeder prüfe/ che denn er vonn diesem brot isset/ So manet er freilich die vnglaubigen vnd vnbusfertigen ab von diesem tisch. Derhalben ist er nit für sie bereitet/ vnd haben sie keinen theil daran.

Bericht.

Welche aber in dieser gemeine vntwürdiglich / vnd ihnen zum gericht/ Christi leib essen / vnd sein blut trincken / die fallen in Gottes zorn vnd gericht durch ire eigene schuld / durch ihren eignen vnglauben / heucheley vnd Gottlosigkeit. Wie Sane Chrysostomus sein vnd Christlich zeuget / da er spricht Gleich wie die gemeine natürliche / oder leibliche speyß / so sie einen magen findet / den mancherley böse feuchtigkeit zunoer haben angenommen / demselbigen leib nit allein vnbehülfflich / sonder auch noch schädlicher ist / Also auch die geistliche speyß / wenn sie ein bosshafftiger mutwilliger sündler braucher / so verderbet sie in viel mehr / doch nicht auß irer vndlichkeit / sonder dessen / welcher sie braucher.

Erklärung.

Chrysostomus nennt das brot die geistliche speise / von wegen der geistlichen bedeutung / vnd des geistlichen brauches / darzu es verordnet ist / ob es gleich den nit geistlich ist / die es fleischlich niessen / wie Augustinus redt.

Bericht.

Bericht.

Deßgleichen S. Remigius (da er den spruch/Weh dem/
durch welche des menschē Sohn verhatē wird/erklaret) sagt/
Weh denen/die Christum zum creutz vberantwort habē/Aber
weh denen/die Christum mit einem bösen gewissen empfabē/
welche ob sie in schon nit den Juden zum creutz vbergeben/so
vbergeben sie ihn doch der feind Christi vermaledeiten glied-
massen zur speiß/ vnd (wie S. Cyprianus redet) übren gewalt
vnd mitwillen an des Herren Christi leib vnd blut.

Erklärung.

Diese vnnnd dergleichen redē können anders nicht ver-
standen werden / denn also wie das brot der leib Christi ist
vnd heisset/ Nemlich Sacramentsweise/wie zuuor erkläret.

Bericht.

Für das vierdte/S. Paulus spricht/ Wer vnwürdiglich
von dem brot vnnnd kelch des Herren isset vnnnd trincket/ der ist
schuldig an dem leib vnd blut Christi. So nun die vnwürdigē
Christi waren/ leib vnnnd blut nicht empfiengen/ wie köndten
sie an dem leib vnd blut Christi schuldig sein: Oder wie könd-
ten sie in sich selbs zum gericht essen vnnnd trincken?

Erklärung.

Paulus sagt nicht/das man durch vnwürdige niessung
des leibs Christi / sonder durch vnwürdiges essen des brots/
an dem leibe Christi schuldig werde/vnnnd denselben nicht in
ehren halte. Denn wo das Sacrament verachtet wird/da
wird freilich auch das verachtet/welches vns Gott dadurch
anbeut. Drumb auch Ambrosius diesen spruch Pauli also er-
kläret/Was heist schuldig werden anders/den gestrafft wer-
den vmb des todtes Christi willen? Denn er ist für die getod-
tet/die seine wolthat verachten.

Von der Manducation Bericht.

Ja / sagen sie / S. Paulus spricht nit / wer vnwürdiglich den leib Christi isset / Sonder ernennet das brot vnd den kelch / Antwort / Lieber sag mir doch / von welchem brot vnd kelch redet er? was ist es für ein brot vnd kelch? ist es nicht dieses brot vnd dieser kelch / von welchem Christus gesagt hat: Das ist mein leib / das ist mein blut?

Erklärung.

Er hat aber nit gesagt / es ist mein leib selbst / vnd wesentlich / Sonder gedächtnisweise / oder Sacramentweise / das ist / also wie ein gedächtniszeichen oder Sacrament vnd warzeichen / das jenige ist vnd geneüt wird / welches damit angezeiget vnd bestätigt wird. Das diesem also sey / ist so offenbar vnd vnlaugbar / das auch droben der Scribent selbst hat müssen bekennen / die alten habē diese wort / das ist mein leib / recht also verstanden vnd erkläret / diß brot ist ein warzeichen meines euch zur speiß des ewigē lebēs für euch in dē tod gegebenen leibs / ꝛc. Nu ist aber ein zeichen je nicht wesentlich das ding selbst / welches dadurch bedeutet wird. Derhalben das brot nicht wesentlich vnd leiblich / oder nach laut der wort / ꝛc. der leib Christi ist. Darauß denn augenscheinlich zusehen / das ein grosser vnterscheid sey zwischen diesen zweyen reden / das brot welches ein zeichen des leibs Christi ist / vnd darumb der leib selbst geneüt wird / vnwürdig essen / welches Paulus den vnwürdigen zuschreibt / Vnd den leib Christi selbst vnwürdig essen / welches inen das gegenteil ohne vnd wider alles wort Gottes zumessen wil.

Bericht.

Item / von welchem Paulus selbst sagt / Das brot / ist nicht schlecht brot / sondern ist ein gemeinschaft oder aufsteilung vñ empfangung des leibs Christi / ꝛc. Das sein ja warhafftige vnd
ver

verständliche beweisunge/durch welche die rechte Lere bestetiget/
vnd dargegen sehr viel frembder disputacion vnd fragen wer-
den auffgehoben.

Erklärung.

Das brot kan weder die gemeinschafft noch ein außsteilüg
oder entpfahung des leibs sein / sonder wird die entpfahung
des leibs geneit/als ein Sacramēt/warzeichen vñ mittel od
werkzeug dieser gemeinschafft od entpfahung / welche nach
vermög desselbē ortz Pauli vñ d' ganzē Schrifft/nit leiblich/
sond geistlich ist/wie zuuor mehmal erkläret. Derhalbē bestā
tigē diese sprüch die obgmelte lere/dz mā durch mißbrauch des
Sacramēts dē leib Christi verachte vñ sich darā versündige.

Bericht.

Das iiii. Capitel/

Von frucht vnd nutz dieses essens
vnd trinckens.

Sofft man in der Christlichen gemeine die zuhörer er-
manet vñ leret/dz ein jeder Christ alle gutthatē Christi
durch rechtschaffenen glaubē auff sich selbst ziehē/vñ
im zweignē solle/also offt leret man auch von d' frucht vñ wir-
kung dieses 3. Sacramēts/wie Johā. 6. cap. dargegē wird.

Erklärung.

Zu erinnerüg vñ sterckung vnser glaubē / hat Christus
nit ein leibliche vnrichtbare niessung seines leibs vnd bluts/
sond die sichtbare niessung dieses brots vñ kelchs vns einge-
setzt/wie er spricht/ Dis thut zu meinem gedächtniß/ vñnd
Paulus / So offt ihr vonn diesem brot esset / solt ihr den
tode des Herren verkündigen / bis das er komt. Werden
derhalbē durch die lere von der leiblichen niessung / vñ dem
X ij vnricht-

Von der Manducation

vnſichtbaren pfand der gemeinſchafft Chriſti / die leute von dem rechten brauch des Sacraments / auff Abgöttiſche gedanken gefüret / daß ſie troſt vnd vergewiſſerung des glaubens ſuchen in menſchlichen gedichten.

Bericht.

Die Alten haben der geiſtlichen Manducation im Abendmal / dieſes / als ein überauß tröſtliche / ſonderliche frucht vnd nutzbarkeit / zugeeignet / Nämlich / daß dieſes Sacrament ein gewiß zeugniß vn̄ pfand ſey / daß Chriſtus mit allein geiſtlich (wie durch ſein heilig wort / vnd heiligen Geiſt) ſonder auch leiſtlich / oder nach natürlicher gemeinſchafft / wie Cyrillus redet / in vns ſey / wohne / vnd auch bleiben wolle / vnd daß wir jezund ein lebendige hoffnung der auferſtehung vnſers leibes / lebens / vnd herligkeit / haben können vnd ſollen.

Erklärung.

Daß die Alten der geiſtlichen Manducation diß habe zugeeignet / daß Chriſtus nach natürlicher gemeinſchafft in vns ſey / wone vnd auch bleiben wolle / c. vnd diß die meinung Cyrilli ſey / da er von dem leiſtlichen wonen Chriſti in vns redet / dem iſt one zweifel nit anders / vnd wolt Gott dz gegen teil bliebe bey dieſem bekentniß / vnd ſtritte nit wider die warheit vnd wider ſich ſelbſt / in dem ſie diß bleiben vnd wonen Chriſti in vns / vnd die hoffnung des ewigē lebens dem leiſtlichen eſſen des fleiſches Chriſti zuſchreiben / So würde dieſe ſpaltung bald hin zulege ſein. Deñ one zweifel Chriſtus ſich vns darumb zu eſſen gibt / Daß er ewig in vns ſey vn̄ wone. Nu iſt vn̄ bleibet er aber nach dem brauch des Abendmals nit leiſtlich / ſonder durch ſeinen Geiſt in vns / daß wir glieder ſeines leibes ſind / wie erkläret iſt / Derhalbē vnwiderſprechlich folget / daß auch ſein leib nit alſo geſſen werde / dz er leiſtlich
in vn̄

in vnsern leib eingehe. Sonst müste er entweder für vnd für also in vns bleiben/ oder in vns nach dem essen verschwindē/ oder widerumb von vns weichen/welches alles vnchristlich ist zudencken.

Bericht.

Also haben wir nun die lere vō des Herren Nachtmal auff's kürzest gefasset/vñ dz jenige so zu dieser zeit in viele fragen dar von disputirt wird/einfeltiglich berüret vñ erkläret. Es köndte aber/ ja es solte auch billich/alles weitläuffiger erkläret werdē/ dan in dieser meines leibes vnuermöglichkeit/vñ geringen verstand hat bestehen können/ Jedoch hab ich dz fürnemste in einer summa nur kürzlich wollen begreifen/vnd ist Gott mein zeuge/dz ich erfahren hab/ daß sich dieses alles/darvon jetzt gesagt/mit vnzelichē wunderbarlichen fragē disputiren vñ handlesset/also dz sich kein mensch vñ mag darauf außzuwickeln/es sey dan das er allwegen die wort vñ einsetzung vñ die erklärting des Apostels Pauli widerum vor die hand neme/betrachte/vñ daran sich halte. Dieses ist einfeltiglich der richtigste/sicherste weg/welcher vnserm Herren Christo angemē/darzu vnserē gewissen tröstlich vñ heilsam ist. Zum beschluß wolle mentiglich beherzigen/dz wir alle schuldig sein vnserm himlischen Vater herzlich vñ ernstlich zubitten/dz der Son Gottes diese lehr durch seinen h. Geist in aller Gotsfürchtigē prediger hertzen anzünden vñ bekräftigen wolle/damit wir ja nit wid dz Heilige wort des Sons Gottes/schädlichen/spizfindigen vñ gotlosen gedankē vñ fragen den zamm nachhengen/Sond viel mehr als vnnsündige kinder vñ seugling bey seinem seligmachenden wort beständiglich verharren/ Vnd allwegen bey vns betrachten/ auß was herzlichem bienender bewegung/er vnser Heiland Christus Jesus/für vns alle gebeten/als er sich zur auffopfferung seiner selbst einstellen vñ antretten wolte. da er schreiet: Heiliger Vater/Heilige sie inn deiner warheit. Dein wort ist die warheit.

Von der Manducation

Erklärung.

Es hat freilich Magister Selnecker mit diesem seinem buch bewiesen / das er einen gar geringen verstand der lere vom heiligen Abendmal vnnnd allen andern Sacramenten hat. Denn er in demselben / nit die in Gottes wort gegründete lere vom Abendmal / sonder seine von menschen geschepffte vñ hergekommene gedancke / gefasset. Vnd ist on zweiuels viel mehr vnd anders von diesem handel zureden / denn von ihm beschehen. Welchs auch billige vnd bewegliche vrsache gegeben hat diese Erklärung seiner irhume vnd der rechte lere vom Abendmal gemeldtem seinem büch entgegen zusehen. Darinnen mit Gottes hülff gründlich dargethan vnnnd erhalten / das des gegentheils beweisungen / welcher die fürnemste M. Selnecker in einer summa gefasset vnd erkläret / noch sehr vnbewiesen vnd vnklar sein. Wie er denn selbs bekennet / das sie billich solten besser vnd weitläufftiger erkläret sein worden / vnnnd Gott zu zeuge ruffet das er sich auß den verwirreten fragen vom H. Abendmal nicht außwickeln könne. Welchs vns nicht wundert / Denn es allezeit also pflegt zugehen / wenn die menschen nicht die rechte meinung auß Gottes wort schepffen / sonder ihr eigene meinung inn Gottes wort tragen. Drumb ich mich denn auch versehe / das er nicht zuklagen hab / dieweil hiemit beschehen / welchs er selbs bekennet nötig sein / Vnnnd derwegen diesen rath gibt / das man sich nicht an seine beweisungen / sonder an die wort der einsetzung vnnnd erklärang des Apostels Pauli halten soll. Weil aber offenbar vnnnd vnwidersprechlich ist / das die wort Christi vnnnd erklärang Sancti Pauli mit keinem büchstaben melden oder leren / das der leib Christi im brot verborgen

borgen sey/sond wie droben gnugsam erwiesen/der Herr das
 brot seine leib hat genennt/damit die geistliche nussung vnd
 gemeinschafft des leibs Christi im Abendmal zuleren vnnnd
 zubesstättigen / welche auch in der predig des Euangelij vnd
 allen andern Sacramenten verheissen wird vnd geschicht/
 So folget das ihre meinung ein zusatz ist zu den Worten Chri-
 sti / vnd sie auff einen vorgegründten grund bawen / der end-
 lich nicht bestehen wird. Vnnnd derwegen nicht das gegen-
 theil/sonder wir für Gott vnd jedermeniglich vns mit war-
 heit rühmen mögen / das wir auff dem grund Gottlichs
 worts / welches die ewige warheit ist / stehen / vnnnd ewiglich
 bestehen werden / Vnnnd bitten vonn herzen vnsern himl-
 schen Vater/das er die reine lere seines Euangelij vnnnd der
 Heiligen Sacrament inn der prediger vnnnd zuhörer herzen
 bestättigen vnnnd versiegeln / auch aller Abgötterey vnd er-
 gerrissen zu ehren seinem Heiligen namen wolle wes-
 ren. Welchs vnser gebet vnd seuffzen wir
 gewis wissen das er nach seinem
 gnedigen willen wer-
 de erhören /
 Amen.

Don


Von den sprüchen der alten Christlichen
Lerer so Philippus Melanchthon vorzeiten zu-
samen bracht/ vnd den Articulu M. Buceri/ auch von
der Wittenbergischen Concordien / welche an
M. Selmeckers buch vom Abend-
mal angeheugt.

Diese der alten Scribenten zeugnis/ diene dem gegen-
Theil nichts zu seiner sachen. Denn sie eins theils von
der nießung des sichtbaren Sacraments/ brots vnn
weins/ eins theils von dem geistlichen essen des leibs Christi
reden. Hat auch Philippus selbst/ nach dem er Iohannis Occo-
lampadij antwort darauff gelesen/ die sache besser bedacht vnn
verstanden/ welches nicht allein seine hernach außgegan-
ne Schrifften/ Sonder auch seine eigene wort eben von die-
ser collectur genugsam zeugen / welche er Anno/ 16. 42. an
Johan Herwagen büchdrucker zu Basel / geschrieben hat/
inn der Vorred auff seine bücher/ Dieselben lauten also: Es
sind auch newe sprüch zusammen gelesen vom Abendmal des
Herren/ darunter etliche in denselben Scribenten / so ange-
zogen werden/ zusäze sind. Diese vnn etliche dergleichen
ding/ wolte ich daß sie werē auffen gelassen. Mich gedenckt/
daß vns vorzeiten zu Tübingen einer / mit namen Lempius/
die verwandlung des brots in den leib Christi auff eine tafel
malete/ ich wunderte mich schon zur selben zeit vber des men-
schen tölpischen vngeschicklichkeit / Vnd wolte jekund nicht
gern/ daß vnter dem namen Cypriani/ oder Ambrosij/ oder
Theophylacti/ sprüch angezogen/ welche diese Lerer nicht ge-
schrieben haben / vnn damit die mißbreuch des Nachmals
bestättiget würden/ Ich hab erfahren/ das die jenigen / so die
Allen

Alten bücher haben abgeschrieben/zumal künne vnnnd vnuer-
schämt in diesem gewesen sind/das sie / die vngelernten zube-
erlegen/viel auß ihrem kopff haben darein geschrieben/wel-
ches denselben Scribenten ganz zuwider ist.

In den 17. Articulu Buceri/ist nichts das nicht möge
zugelassen werden / da es nach Gottes wort verstanden
wird.

In der Concordia mit Luthero weiß vnnnd siset man
wol/das mehr vertrag denn erklärung der sachen gesucht ist
worden. Ist derhalben Buceri meinung nicht auß diesen vñ
der gleichen/sonder auß seinen zuuor vnnnd hernach außgan-
genen Schrifften zuerkunden/Welche die leiblich
nießung Christi / vnter Buceri man-
tel nicht lassen be-
decken.



¶

Beden-

Bedencken

Herrn Philippi Melan-
thonis vber der spaltung vom
Abendmal.

Dem Durchleuchtigste Hochgebornen
Fürsten vnnnd Herrn / Herrn Friderichen Pfaltz-
grauen bey Rhein / des H. Römischen Reichs Erzdurchs-
essen vnd Churfürsten / Herzogen in Baiern /rc.
seinem genädigsten Herrn / Philip-
pus Melancthon

Enad vnd fried von Gott /rc.



Durchleuchtigster / Hochgeborner
Churf. Genedigster Herr / Es sind one alle
zweuel rechtmässige Regiment / in der war-
heit ein werck Gottes / welcher ehliche zu-
sammenhaltung des menschliche geschlechts
genediglich erhelt. Derwegen ich den ware
Gott / den ewigen vater vnser Herr Jesu Christi / der ein
Schöpffer ist des menschlichen geschlechts / vnd im ein ewi-
ge kirche samlet durch die sijn des Euangelij / von gankem
herken bitte / das er E. Churf. G. an leib vnnnd seele stercken /
vnd inen heilsamen rhat / vnnnd seliges Regiment verleihen
wolle. Ich frewe mich auch / das die Herrschafft meines va-
terläds / zu erkantnis des Sohns Gottes beruffen ist / Gott
recht anrufft / vnd schus hest der kirchen Christi / welchen ich
bitte /

bitte/das er das ganze hauß der Pfalz bey Rhein/regiere vñ
 schütze/ vñ in meine Vaterläd nit eine Barbarische verwü-
 stung werden lasse. E. Churf. G. schreib hab ich vnterhän-
 nigst gelesen/auch den Ernhaftē Herrn Stephanū gehört/
 vñ schicke E. Churf. G. schrifftliche antwort. Wündsche dar-
 neben zum höchsten / daß die zarten kirchen vberall friedlich
 seien. Zu welchem dienstlich sein wird/so die Obzigeiten nit
 zulassen / daß widerwertige meinungen gestritten werden.
 Derhalben daß E. Churf. G. beiden teilen zuschweigen ge-
 boten haben / auch ich für gut ansehe. Wündsche aber / daß
 einmal mit rath vnd züchun weiser Fürsten/auf vnsern vnd
 anderer Nationen Kirchen / Gottselige vnd geleerte mēner
 zusamen gerüffen/vnd von alle streitigen articuln vnterres-
 dung gehalten / vnd eine einhellige/rechte/klare vñnd auß-
 drückliche form der lere / den nachkommen hinderlassen werde.
 Vnter des sollen wir / so viel möglich / mit bescheidlicher
 handlung / einigkeit in vnsern kirchen erhalten. Hiemit E.
 Churf. G. Gott dem allmechtigen treulich befolhen. Das
 tum den 28. Octobr. im jar 1559.

Bedencken vber der spaltung vom Abendmal.

Es ist nicht schwer/aber gefährlich zuantworten. Doch
 wil ich sagen/ so viel ich sekund / die spaltung desselben
 orts belangend / erinnern kan/ vñ bitte den Sohn Got-
 tes / daß er rhat vnd that regieren wolle. Es ist kein zweifel/
 daß vber der spaltung vom Abendmal grosse streit vnd krieg
 inn der ganzen welt werden erfolgen / Denn die welt wird
 gestrafft von wegen der Abgötteren vnd anderer Sünden.
 Drum sollen wir bitten/das der Sohn Gottes vnns lere
vñ

vnd regieren wolle. Weil aber an allen orten viel schwache
sind/vñ in Christlicher Lere noch nit vnterwiesen/ja auch in
irthumben erstarte/ So muß man im anfang der schwachen
warnemen. Darumb Thurf. G. fürnemen mir wol gefelt/dz
sie den zankenden auff beiden teilen zuschweigen haben ge-
boten/auff das trennung der zarten kirchen verhütet/vnd
die schwachen am selben vnd vmbliegenden orten nit irre ge-
macht werden/Vnd ich wolte das die zänkischen beides teils
les abgeschafft werē. Nach abschaffung aber der zänkische/
ist rathsam / das die andern sich vber einerley form der wort
vergleichen. Vnd were in dieser spaltung am besten/die wort
Pauli zubehalten/ Das brot das wir brechen/ist die gemein-
schafft des leibs. Vnd so viel gesagt werdt vñ nutz des Abē-
mals/damit die leut gereiket werden/dieses pfand lieb zuba-
ben vñ offtzñgebrauchen/ Sol auch dz wort **GEM. E. M.**
SCHAF erkläret werdt. Paulus sagt nit/ das die natur
des brots verendert werde/wie die Papiſten sage. Er sagt nit
wie die zu Bremen / Das brot sey d'wesentliche leib Christi/
Er sagt nit wie Heshusius/ Das brot sey der ware leib Chri-
sti selbst/Sond'er sagt/es sey die gemeinschafft/ dz ist/ dassel
be / dadurch die vereinigung geschihet mit dem leib Christi/
welche geschihet im brauch/vñ nit one betrachtung/ als wenn
die Weuse das brot nagen. Es streitten die Papiſte/ vnd irer
gleichen hefftig darüber / dz man sagen solle / Der leib Chri-
sti sey auch außershalb der niessung eingeschlossen in d'gestalt
des brots oder in dem brot / vnd fordern die anbetung/ wie
Mörlin zu Brunschwig hat gesagt/ Du mußt nit sage Num
Num/sonder du mußt sagen/was dieses ist/das der Priester
in der hand hat. Sarcerius beſilhet die abgefallene Brotsame
auffzuklauben / mit samt dem auffgekrakten Erdrich zuuer-
bren-

brennen. Da wir zu Worms waren für zweyen jaren/ ward
 ein frag an vns geschickt vß einem Hoff/ Ob der leib Christi
 auch hinab in den Bauch käme. Es ist besser/ daß man solche
 vngeheure fragē hinweg werffe/ behalte die form v wort Pau-
 li/ vnd lere die leut recht von dem nutz. Man mag auch anse-
 hen/ wie vom Abendmal geredt ist in der Ordinanden Exa-
 men/ da auch erinnerung gethan ist vom nutz des Abēdmals.
 Der Sohn Gottes ist bey dem Predigamt des Euangelij/
 vnd ist daselbst gewiß krefftig in den gläubigē/ vñ ist gegen-
 wertig nicht von wegen des Brots/ Sonder von wegen des
 Menschen/ Wie er spricht/ Bleibet in mir/ vnd ich in euch.
 Item/ Ich bin in meinem Vater/ vnd sñ in mir/ vnd ich in
 euch. Vñ in diesem warē trost/ macht er vns zu seinē gliedn/
 vnd bezeuget/ Daß er vnser Leibe wil lebendig machen. Al-
 so erklären die alten das Abendmal des H E X X E N. Aber
 diese ware vnd einfältige Lere/ nennen etliche/ Schüch die an
 beide füsse gerecht sind/ vñ wollē kurtzum/ man solle sagē/ Ob
 der Leib im Brot oder gestalt des Brots sey/ Gleich als were
 das Sacrament von wegen des Brots/ vnd von wegen der
 Papißtschen anbetung eingesetzt. Darnach dichten sie/ wie
 sie in in das Brot schliessen/ vnd haben etliche die verende-
 rung des Brots in den leib Christi/ Etliche die gegenwert des
 leibs an stadt des Brots/ Etliche die Vbiquitet/ dz ist/ die ge-
 genwert des leibs an allen orten erdacht. Diese vngeheure
 ding alle/ sind den gelerten alten Scribten vnbekant. Hes-
 husius sagt/ er halte es nit mit Dugene/ welcher dz Brot vñ
 wein warzeichen des leibs vnd bluts neñt/ Er wirfft schmä-
 lich dahin Elementem Alexandrinū. Desgleichē vrtail wird
 er fellen über Augustinum/ Ambrosium/ Prosperū/ Diony-
 sum/ Tertullianū/ Bedam/ Basilium/ Nazanzenum/ wel-
 chē

Her es neit ein gegenbild des leibs/ Vnd vber Theoboretii/
 v von dem brot sagt/ dz seine natur nit verwädelt wird. Wer
 Ist aber den Heshusius/ dz wir eben jm sollt mehr glaubē/ denn
 so viel löblichen alten Scribenten/ welche klärlich zeugē/ denn
 zu iren zeiten/ die Päpstliche Lere vñ rede/ in der Christenheit
 nit gewesen ist/ welche dieweil sie in der kirchen new sind/ Ist
 zubedencken/ ob die newen sind befüget gewesen/ ein newe Le-
 re in die kirchen einzufüren. So weiß ich auch wol/ das viel
 beischläge vnter dem Namen der alten Lerer angezogen wer-
 den/ daruon die geleerten mögen vrtheilen.

Ich hab aber sehund nit weitlauffig zudisputieren für ge-
 nommen: Wil auch nit disputieren mit den zänckischen/ so Ab-
 götterey vnd Christenmord bestätigen/ welcher leute witten
 auch ich erfare/ Sond' hab allein wollen anzeigen/ Wz mei-
 nes erachtens/ am selben ort/ angesehen die schwachheit der
 zarten kirchen/ zuthun sey/ Vnd beruhe auff dieser meinüg/
 das man gezenck auff beiden theilen verbieten/ vnd einerley
 vnd gleiche form der wort gebrauchē solle. So etliche solches
 jnen nit lassen gefallen/ vnd nit zum Abendmal gehen wolle/
 die lasse man jrem gutduncken nachgehen/ allein das sie nit
 trennungē machē vnter dem volck. Ich bitte aber den Sohn
 Gottes/ vnsern Herrn Jesum Christum/ der zu der Rechten
 des ewigē Vaters sihet/ vñ samlet ein ewige kirche durch die
 stimme des Euangelij/ Das er vns leren/ regieren vñ schüt-
 zen wolle. Ich wündsche auch/ das ein mal in
 einer Gottseligen versamlung/ von
 allen dieser zeit streittigen
 puncten gehandelt
 werde.

Bedruckt in der Churfürstlichen Statt
Heidelberg / durch Johannem
Mater / Im jar
1565.

1867
 1868
 1869
 1870
 1871
 1872
 1873
 1874
 1875
 1876
 1877
 1878
 1879
 1880
 1881
 1882
 1883
 1884
 1885
 1886
 1887
 1888
 1889
 1890
 1891
 1892
 1893
 1894
 1895
 1896
 1897
 1898
 1899
 1900